

@ayedh105

الطبعة السادسة

# سألفة وقصيدة

الراوي  
محمد بن علي الشرهان

الجزء الثاني



٢ مكتبة العبيكان، ١٤٣٣هـ

فهرسة مكتبة الملك فهد الوطنية أثناء النشر

الشرهان، محمد علي

سألقة وقصيدة: الجزء الثاني. / محمد علي الشرهان. - ط٦. - الرياض، ١٤٣٣هـ.

٢٨٠ ص: ١٦,٥ × ٢٤ سم.

ردمك: ٩-٣٢٩-٥٠٣-٦٠٣-٩٧٨

١- السيرة النبوية

أ. العنوان

رقم الإيداع: ٥٤٥١ / ١٤٣٣

ديوي ٨١٣,٠٩٥٥٣١

الطبعة السادسة

١٤٣٣هـ / ٢٠١٢م

حقوق الطباعة محفوظة للناسر

الناسر  للناسر

المملكة العربية السعودية - الرياض - المحمدية - طريق الأمير تركي بن عبدالعزيز الأول

هاتف: 4808654 فاكس: 4808095 ص.ب: 67622 الرياض 11517

موقعنا على الإنترنت

[www.obeikanpublishing.com](http://www.obeikanpublishing.com)

متجر  على أبل

<http://itunes.apple.com/sa/app/obeikan-store>

امتياز التوزيع شركة مكتبة 

المملكة العربية السعودية - العليا - تقاطع طريق الملك فهد مع شارع العروبة

هاتف: 4160018 - 4654424 - فاكس: 4650129 ص.ب: 62807 - الرياض 11595

جميع الحقوق محفوظة للناسر. ولا يسمح بإعادة إصدار هذا الكتاب أو نقله في أي شكل أو واسطة. سواء أكانت إلكترونية أو ميكانيكية، بما في ذلك التصوير بالنسخ، فوتوكوبي، أو التسجيل، أو التخزين والاسترجاع، دون إذن خطي من الناسر.

# سالفه وقصيدة

الجزء الثاني

الراوي

محمد بن علي الشرهان

العبد  
Obeyan





## مقدمة

بعد ان لاقى الجزء الأول بطبعتيه الأولى والثانية الرواج الكبير غير المتوقع وتلقاه القارئ العزيز بقبول منقطع النظير رأينا في هذا كله ما يدفعنا لاصدار الجزء الثاني من الكتاب (سألقة وقصيدة) على نفس النهج والاسلوب الذي نهجناه في الجزء الأول، وهو ان الرواية تقرأ وكأن الراوي يلقيها على مسمع القارئ حرصا منا على امتاع القارئ العزيز، ونكرر القول ان في مثل هذا الاسلوب متعة وسهولة في متابعة القصة او بتعبير الكتاب السألقة وزيادة في اجتذاب انتباه القارئ العزيز خاصة من محبي ومتذوقي هذا الفن من الرواية وفن الالتقاء، ولا شك ان سماعها من الراوي بصوته ابلغ في ايصالها الى المستمع واكثر متعة ومتابعة الا ان اتباعنا لهذا الاسلوب من العرض قربنا الى ذلك بالقدر الذي يكفل للسألقة بان تحظى بالقبول والرضا من قبل القارئ العزيز.

واود الاشارة هنا الى ان هذه السوالف ليست فقط للتسلية بل انها لتبصير الاجيال وخاصة الشباب منهم لينهلوا مما فيها من عبر وقيم وحث على مكارم الاخلاق والتحذير من بعض السلوكيات والممارسات الخاطئة ففيها توجيه غير مباشر لهم ولغيرهم.

ونكرر تأكيدنا وتأكيد الناشر ان في مثل هذا الاسلوب محاولة لارضاء عشاق هذا الفن وليس كما اشار بعضهم بان الاسلوب المتبع يتعارض والحفاظ على اللغة العربية والحرص على الذود عنها، فلم نك يوما من الايام دعاة هدم اللغة او لضعافها وحاشى لله ان ننجرف الى هذا الدرك من التوجه والمفهوم،

ولو رأينا ان في هذا القول ولو شيئا يسيرا من الصحة لتوقفنا عن اصدار الكتاب  
ولكننا أول المنافحين والذائدين عن لغتنا الجميلة .

ان ما يهمننا هو الاستمرار بتقديم ما يرضي عشاق هذا الفن وهم كثر والذين  
باقتنائهم للجزئين تعبیر عن ثقتهم بالمؤلف والناشر مما كان له اطيب الأثر  
واحسنه .

لهم منا جزيل الشكر والامتنان والله ولي التوفيق .

المؤلف

محمد بن علي الشهران



## الدبلة

كنت مرة معزوم انا ورفيق لي عند واحد من الأصدقاء، ركبت انا واياه  
 السيارة في شارع عام فيه محلات ودكاكين والشارع مليان وكنا في وسط حارة،  
 وقفنا الاشارة والى فيه واحد راعي صالون عند الاشارة واقف جنبنا هاكالصالون  
 الاسود ازياقه بيض ممسحة جنوطه كروم ويلق وقزازه نظيف، هالصالون فيه  
 عايلة اطفال وحریم، وصار يقدم على شوي شوي ولاحظنا ان فيه بنت شابة بين  
 من ذرعانها اللي مطلعتهن مرتكية على الباب ما شاء الله عليها وحاطة دبلة بيدها  
 وقامت البنت تفر الدبلة باصبعها وسألت رفيقي وش ظنك يوم انها تفر الدبلة ليه  
 وش السبب؟ قال يمكن انها تبي تعلمنا انها مخطوبة الحاصل فتحت الاشارة  
 وجينا عند الاشارة الثانية ووقفنا كلنا جنب بعض وقال صاحبي تصدق انا اشوف  
 هالصالون كل صبح اتوافق انا واياه عند هالاشارة كلما رحت اودي عيالي  
 للمدرسة واهيانا تتلاقى انا والسواق عند باب المدرسة وهم ساكنين عندنا في  
 الحارة شمال عنا وسواقهم اجنبي والبنت هذي دايم هذا مكانها في الصالون  
 والظاهر انهم بدو هالعايلة ما هم بحضر تدري ابسأل واشوف، المهم انا رحنا  
 وخليناهم يوم فتحت الاشارة كل راح في سبيلة هم في جهة وحننا في جهة،  
 وخوي هذا شاعر ولكنه ماهو من الشعرا المهبل لا من الشعراء العقلاء المحترمين  
 تخبر الشاعر الى شاف شي يتأثر ويقول قصيدة وبس ما يروح يوذى الناس  
 ويلاحقهم، خوي كان معه بالسيارة شريط في المسجل قال ابسمعك هالشريط  
 فيه سامرية، شغله والى السامرية تقول:

يا من يسليني عن الهم لو يوم  
يعد عن القلب الحزين اشتغاله  
اربع ليال ماتهنيت بالنوم  
والدمع من عيني تزايد هماله  
لا قلت يا قلب العنا مانت ملزوم  
اترك هوى الخفريات مالك وماله  
كم واحد خلنه البيض مهموم  
لو كان صافي حبهن ما صفا له  
الحب الاول به تعاليل وسلوم  
واقفى زمان اول ولا جا بداله

يوم خلصت قلت له هذي سامرية يغنونها منول والظاهر ان باقي بها بيت او بيتين وهي لشاعر معروف اسمه عبد العزيز بن محمد الغنام شاعر معاصر من اهل سدير شاعر معروف قال والله كلماتها زينه هو صادق قام يرد القصيدة ويبيدي اعجابه بالشاعر وقال عز الله اني تولعت باللي انا شفت، هاه وصلنا اللي عازميننا وسمرنا عندهم وتعشيننا والعزيمة مناسبة زواج ولقيننا فيها شعار ومنهم واحد يقال له عبد المحسن العوهلي الله يرحمه وجيت وجلست جنب هالشاعر الشايب قعدت اسولف انا واياه وخويي لقي له واحد يعرفه وقعد جنبه يسولف هو واياه، جلست عند الشايب والى قدامنا كنبه فاضية ما عليها احد تاخذ لها ثلاثة انفار يوم اوفينا شوي ويدخل ذاك الرجال الحشيم يظهر انه شيخ قالوا له اجلس هنا على الكنب وبعد شوي دخل شيخ ثاني قال له تعال يا شيخ اجلس هنا وجلسه جنب

الشيخ الاول وبعد شوي جا شيخ ثالث يبدو انه زميل لهم وقالوا له تعال وجلسوه  
بينهم ، التفت علي العوهلي وقال شفت يا محمد قلت هاه قال :

الشيخ هو والشيخ جا بينهم شيخ  
وصاروا على الكرسي ثلاثة مشايخ

يعني بعض الشعار يطري عليه بيت طريف في لحظة وكلماته سهلة مثل قول الشاعر:

الزين ماودك تحطه مع الشين  
ودك تخلي كل شي لحاله

المهم سرينا انا والرجال والى هالحين يهوجس بالذراع اللي هو شاف والدبلة  
اللي بالاصابع ويوم ودعته قال هاه يا محمد انا ملزوم انشد عن هالدبلة وش  
سنعها والظاهر ان خويننا هذا قد شاف البنت اكثر من مره ولمحها لمحات خفيفة  
وسريعة بس ماهو معلم ، المهم راحت الايام يوم اخذت فترة حوالى اربعة ايام  
واتصلت عليه قلت هاه قال ايه يا محمد سألت عنهم واحد من جيراني يقال له  
ابو صالح قال أي بالله اعرفهم هذولا ناس اجاويد بدو ومحترمين واهلهم رجال  
طيبين وقد خطبت بنتهم ، بس هاه ليالك تولع بهم ، قال والله اني قد تولعت وش  
تهقا قال لا وابوهم راعي بر وحلال واكثر وقته في البر واهله بعد الى جا خميس  
وجمعه يروحون لابوهم في البر واللي انت شفت راعية الدبلة تروح لابوها في  
البر اللي على ما قال الشاعر :

تبع اللي يشي الرجل عند ابله  
العمائر والفلل ما يدانيها

ماهوب يداني البلد، قال وينهم بعيد قال أي بالله بعيد :

في خليّ تنبت الشيح والريلة

بعد والله يابو صالح حراويها

الحاصل خويي قال الايات هذي وهو شاعر معاصر معروف وهو الشاعر

عبد الله بن محمد السيارى ويقول :

من لكبد من هالايام مندبلة

ما يشيل الهاف لو ربع مافيها

لي صديق كل ما ضقت ابتدب له

وانشده عن ضيقتي ويش تاليها

واشتكي له حب لباسة الدبلة

انتحت عني وانا مولع فيها

من يضيع عشقه ضيع القبلة

الله اكبر ينعش الروح طاريها

كل ما ابعد قمت اوصي وانجب له

دايم رجلي على الدرب محفيها

وان قرب عندي وعزمت اقرب له

خفت من علم يجيها ويوذيهها

نون عين صويحي يرح العبلّة

طلعها ممشات يوم لراميها

في خلي تنبت الشيح والربلة  
بعد والله يابو صالح حراويها  
ويش رايك لو حصل منه لي قبلة  
ناري اللي بالحشا ماتطفيها

قال ابو صالح الابس ماهوب حاصل لك . طبعا الشاعر عبد الله السياري  
من الشعراء اهل العفة والادب والكرم واللي مثله يقول الشعر هذا بسبب نظرة  
ويس ماهو من اللي يبي يتابع والا يلاحق والا يكلم مثل للاسف بعض الشباب  
الله يهديهم المهم ان الشاعر عبر فقط عما بخاطره لا اكثر .







## جلد حرمني كامل الزين مابيه

في البداية احب ان اذكر انني كنت اسمع من وانا صغير قول اهلنا ان الله سبحانه يعين العبد في شئون حياته عامة ولكن بالاختصاص في امور ثلاثة وهي اذا نوى يحج الله سبحانه ييسر اموره ثاني شي اذا كان ساكن في بيت اجار وعنده عيال ونوى يبنى او يشتري بيت يظل به على هالعيال يرزقه الله ويسهل امره بسبب هالعيال او يره بوالديه، الامر الثالث هو موضوع الزواج دايماً اذا نوى الواحد يكمل دينه ويتزوج ويستقر ان الله يعينه .

اللي انا ملاحظه ان زواج الشباب البنت والولد الى تزوجوا وهم صغار في السن ولا حولهم من يرعاهم ان فيه صعوبة شوي الحقيقة من الخطأ تزويج البنت وهي صغيرة مرة والا الولد قبل العشرين الواجب يأجل لين يثبتون ويدركون ويعرفون ان الزواج مسئولية اما اذا صاروا صغار يحصل كل يوم منافر ومشاكل عند الاهل، قالت بتتكم قال ولدكم، واللي بعد ما ينجح احياناً هو الزواج المكلف بعضهم يتدين ويتسلف مسكين لاجل حفلات ماترضي، اكثره يفشل والله ان احسن الزوجات اللي تتم عائلياً ولا فيه داعي للتكاليف اللي مالها لزوم.

بعض الناس الى بغى يتزوج ينقز هناك ويروح لناس بعيدين عن عائلته ولا يعرفهم ابد، ليه عليك انك تدور من قرايبك او من خوالك أو من عمالك من ناس قريين عارفينك وباخصينك ثاني شي هم مايحتاجون ينشدون عنك، من اللي يبلش اللي الى راح لهم الواحد وهم من البعيدين يبلشون بالتنشيد عنه وشو

من رجال وش سيرته وش اخلاقه وينشدون عنه بالعمل وعند زملاه بالدراسة هو راعي سهر نزيه والا لا واحيانا يوفقون واحيانا يتوهقون، احيانا بعض الناس يروح لديار بعيده او ناس ماهم في مستواه، ياللي تطمر هالحين انت تدري ان هالبنت اللي تبي تاخذ اكيد تبي تتفق مع اهلك او مع وضعك وطريقة حياتك المختلفة عنها يمكن انها عايشة في بيت غنى تبي سيارة فخمة تسافر وتصيف برا وتبي وتبي لكن اذا اخذت من بيتك ومستواك احسن لك .

الحاصل فيه واحد اسمر يحب له وحدة من اهل البادية عن طريق المراسلة والمراسلة ترى ماهيب جديدة من زمان، مثلاً يمكن واحد الى شاف وحدة بالبر قال لحدى الحريم يافلانة خذي هالهدية عطيتها فلانة تراي احبها اما قارورة طيب او ما اشبه ذلك او أي شي وصار يرسل للبنت هذي اللي يحبها وهم يحبون بعض مثل ما قلت بالمراسلة ما شاف بعضهم بعض المهم بعد ما تلاقوا الاثنين الولد الاسمر والبنت على جمعة ربيع قالوا لها البنات يا بنت ترى اللي يرسل لك الهدايا تراه ذك الولد الاسمر ذك شوفيه، والاهي بنت جميلة جدا، قالت هذا الاسمر قالن نعم قالت اوه والله انا احسبه ابيض مثلي قالوا لا بالله هذاهو ان كان فيك او ما فيك فشوفي لك دبرة ان بغيتي تهونين فهوني من هالحين ازين لك لا توهقين المسيكين ويقعد بيني على هالحب، جاء من جاء وعلمه بالسالفه وان البنت استغربت وتفاعت والاهو ولد جيد ولا فيه خلاف بس ان لونه اسمر قال وش بها ماتبيني ؟ ارتاع المسيكين وانخرش وتفاعاً قالوا البنت بين انها ما تبيك وهي حرة ياخي قال وبس ماتبيني على شان جلدي ؟ يقولون انه قصد قصيدة ما اعرف منها الا هالبيت يقول :

## جلد حرمني كامل الزين ماييه الحـوه مني لين ياصل عظامي

بعد سالفه ثانية في نفس الموضوع ومعها ابيات هذا الفارس المعروف من  
الشرارات يقال له خلف بن دعيجا هذا رجال سيرته طيبة وراعي فزعة واحيانا  
يسوق من ماله لاتمام الواسطة ولا يبخل بجاهه وكل علمه طيب مرة من المرات  
شكى عليه واحد ما يعرفه بس سمع أن الناس يروحوون له ويشكون عليه الحاصل  
انه شكى على بن دعيجا مثل هالناس وتقدم له بابيات وهي :

لا يا خلف يوم ان كل عنى لك  
انا علامي يا خلف ماتنصاك  
لا ريد من مالك ولا من حلالك  
الله بلاتي يا خلف مثل بلواك  
ياريف هجن نوخوهن قبالك  
اللي تخنيهن من الدم يميناك  
يابن دعيجا غن هب الهوا لك  
وحنا على ذكر من البعد جيناك

وهو يوم يقول :

ياريف هجن نوخوهن قبالك  
اللي تخنيهن من الدم يميناك

يعني قبال بيتك من اول الرجل الكريم الى جاه ظيف وذبح له ذبيحة مثلاً  
يقوم يغط يده بدم الذبيحة ويخضب رقبت ذلوله بالدم بيديه يعني ان حنا اكرمنا  
فلان وذبحنا له ، قال خلف من هذا اللي يقصد ويبيني افزع له ، نشد عنه وجاه من  
جاه وقال يا رجال لا تستعجل ، ويمكن ان العلم بان له ، المهم ان خلف بن دعيجا  
رد عليه وقال :

بالعبد لا تغويك هومات بالك

اقصر هوى رجلك على قد ممشاك

هذك لو وليت ماهو بحالك

يسني بقلبك سنية الدلو برشاك

يقول يعني لا تفكر اللي انت طالبها ماهي بحولك ، ويستمر بالقصيدة  
ويقول :

عليك باللي بالمودة صفالك

لاشاف غيضك بدل الغيظ برضاك

وزول يعقبك لا يخيله خيالك

لو هو يشاد الشمس والا القمر ذك

ولولا ردى عقلك ولولا هبالك

ماخلت برق ينبت العشب لحذاك

يقول انت غلطان تدور ناس ماهمب يمك وهي مثال على اللي يدور ناس  
ماهم بمستواه او ماهم بييمه والوسط مطلوب والايات تين ان الانسان لا يطلب  
شي مستحيل ولا يطلب من ناس يتكلفون لك في شي صعب التحقيق .

## صفقة القرع

هذي قصة توسع الصدر ولا اجزم انها صحيحة مية بالمية، وهي من السوالف  
 الاولة، هذولا ثلاثة اشخاص توالفوا فيما بينهم معيشتهم سوا وروحهم وجيتهم  
 كذلك وشغلهم مع بعض، مرة من المرات دخلوا هاكالديرة وهم اول مرة  
 يدخلونها، دخلوا السوق، والديرة ذك الوقت عليها دراويز وهم داخلين مع  
 الدروازة الغربية والناس من اول الى دخلوا ما يطلعون منها الا لروحة سفر مثلا  
 كانتك داخل بيت، تشوف الناس كلهم بالديرة والاسواق كل في حرفته هذا يسف  
 وهذا يخرز وذاك يصلح زبلان وذاك يقتل حبال وذاك يذرا عيش واللي جالب غنم  
 واللي يبيع سمن، المهم يوم دخلوا الثلاثة ماحد يعرفهم لقوا لهم هاكالشيبان،  
 ولاقامهم شايب قال لهم اقلطوا قالوا لا والله نبي نروح للمجلس مجلس الديرة  
 والمجلس هو السوق ومحل البيع والمشترا وتشوف الناس اللي في دكانه واللي في  
 وسط السوق يبيع واللي يتمشى واللي عابر سبيل وعادة المجلس يصير فيه مثلا  
 على اليمين بيت الامير وجنبه الجامع او انه في جهة ثانية تشوف صفقة دكاكين  
 ومكان يجلسون فيه الناس كذا، المهم قال لهم الشايب هاه نفزع تبون شي تبون  
 تمر والا عيش؟ قالوا لا مشكور جزاك الله خير حنا نبي فلان بن فلان وسموه  
 اظنه واحد اسمه عبد الرحمن قال ايه فلان تعالوا شفتوا الشيبان اللي جالسين  
 جنب المسجد اللي صافين هناك قالوا نعم قال الشايب هاه شوفوه معهم، ماهوب  
 الاطرف من شمال لا ولا اللي عقبه، اللي عقبه قالوا ذك اللي ماد رجله قال بس  
 هذا هو، ترا يقال له ابو عبد الله، والى الديرة اكثر سكانها شيبان اصغر واحد

فيهم يمكن عمره سبعين او خمس وسبعين سنة لا واغلبهم فوق التسعين ولكنهم  
 ماشاء الله نشاط والديرة هذي جوها صحيح والاكل فيها مري وهوها طيب  
 ولذلك اهلها صحتهم طيبه وزينه .

الحاصل اقبلوا على الشيبان والى هذا الرجال اللي بيونه قاعد عليه شماغ  
 متتف ولا بس بشت قديم حات زريه وماد رجله وعصاه عنده الي يشوفه يقدر  
 يعطيه ثمان وتسعين سنه الى ميه وثنين كبير عود ولا عليه لحم لو تقبص جلده  
 وقف كنه سماط المهم اقبلوا عليه ووقفوا قالوا سلام عليكم قال عليكم السلام  
 قالوا عبدالرحمن ابن فلان بن فلان ايه منكم؟ قال الشايب نعم انا عبدالرحمن  
 قالوا الله لا يهينك نبيك بكلمة راس قال ان شاء الله يا عيالي بس اقلطوا اقعدوا  
 قالوا لا نبيك بكلمة راس مستعجلين قام ووقف عصاه عشان يرتكي عليها وهو  
 نحيف ولا عليه الا جلد وعضام يوم انه مسك العصا وارتكى ويزلق جلده  
 ويطلع من على العصا المهم وقف يسلم عليهم قال يالله حيهم وش لونكم وهو  
 اكبر من في المجموعه شايب قاضي قالوا حنا والله جاينك من هكالديرة الفلانية  
 قال ياهلا يامرحبا ياهلا مرحبا قالوله مذكور لنا عندكم قرع وجاين نبي نشريه من  
 عندك عشان نترزق الله ونشتره ونبيعه قال تبون شوي ولا واجد؟ قالوا نبي القرع  
 كله قال مادام تبونه كله لازم نروح يه لانه حاط القرع في نخله وراحو للنخل  
 وهو يمشي قدامهم ويوم مشا مسافه قصيره جلس يتلين لانه كبير مره يالله يمشي  
 وصاروا يمشون ويمشون ومادروا الا وهو مطلعهم بحياله وسيعه وادخلهم بحياله  
 على مزرعة ومن المزرعة على محل به قت (برسيم يعني) وثم يطلعهم على نخل  
 ثاني المهم الين وصل هاك القصر كبير بيت طين كبير قال ادخلوا وراكم جافلين

اقلطوا ترا غداكم عندنا اليوم قالوله الله يغنيك حنا عجلين نبي ناخذ البضاعة وغشي قال يالله يالله وكل شوي يتلين ويرتكي على الجدار ويوم وصل الباب ويدخل بهم على دهريز والى جدران الدهريز ماملطت بس مشبعه تشبيع بالطين والسقف به خشب ومطموم بفروش حصا وجريد نخل والى المكان اظلم والى فيه محاحيل وحبال ثم طلعا على محل مسفر ثم ادخلهم على محل مظلم قالوا ماقدامنا حريم؟ قال ماقدامكم احد ادخلوا تفضلوا.

الاولين من اول يسكنون في علو البيت واسفله يكون مثل المستودع للحاجات المهم صاروا يمشون وراه يوم دروا ويطلعهم على سفر والى هكا البقرة الله يكرمكم والدة والى هنا عزز ودبش ثم طلعه على هاك الحوش وفيه قرو ماء ثم يطلعهم على دهريز اظلم ثم طلعه على سفر شوي المهم وقفهم قال وراكم خافين جافلين امشوا امشوا قالوا بس نخاف ان قدامنا حرم وحنا كلفناك الله يهديك اسمح لنا لو درينا ان فيه كلافه عليك ما جينا الله يعظم اجرک ويجزاك بالجنه ويلاه يالله يلقط انفاسه من مرور السبت والاحد قال لا يايعالي الساعه المباركه يوم دروا يوم وقف قدام هاك الصفه والصفه هي الحجره الي تصوير في اسفل البيت ولها درايش ويحطون الاولين فيها التين والعشب الى حشوه وجابوه من البر ويدخلون فيها احيانا الدبش عن البرد واحيانا ينامون فيها ومالها درايش ولها بس باب واحد واحيانا مايكون فيه باب المهم هاك الصفه المظلمه مرتفعة عن البيت يجي حوالي ٢٠ ستي ظلمه ماحد يشوف احد حتى لو تاقف قدام خويك ماتشوفه مادروا هم الا يوم وقف الرجال عند باب الصفه وقال اقربوا يايعالي اقربوا نبي نوريكم البضاعة ولا انتم طالعين الا وحنا خالصين حنا ترا ناس

سمحن في بيعنا ومشترانا ومدامكم من هاكا لديرة الله يوفقكم يا عيالي ويرزقكم  
 قالوا بس ترانا عجولين وطولنا عليك وكلفنا عليك قال هالحين ابرويكم البضاعة  
 مادروا يوم صاح ييه ييه، قالوا هه هو لك بو انت؟ قال اي بالله لي ابوي اجل انا  
 مقطوع من شجرة يوم دروا يوم جا ذاك الشايب من داخل الغرفة شايب كبير، هاه  
 التفتوا يوم طلع عليهم هاك البليه مايشي حاط له جاعد تحته بس يحيي شايب  
 رجليه غادية كنها كلى مادروا الا يوم فاض عليهم الحقيقه انهم انبهروا كيف ابو  
 في ذا العمر وابوه في هالهيئة ولا هالابو هذا وجهه حمر وماله ولا ضرر كنه  
 نسر هرم قل بلا والله من مرور السبت والاحد عليه يوم هالشايب انطلق على  
 هالولد وين انت؟ الله لا يصلحك تاركني من الصبح وانا لحالي مخليني في  
 هالصفة اقلب بذا القرع وينك فيه؟ ولا رحب بالرجال اللي جاين وهم مايدرون  
 وش السالفه قال هاه وش تبون الهانا هالولد اسمحولنا ماخلانا نرحب بكم خير  
 يا عيالي؟ قالوا ابد سلامتك حنا نبي نشري منه هالبضاعة وقال انها في ذي  
 الصفة قال أي والله ذا الولد الله يصلحه تراكتي وين لقيتوه فيه؟ قال واحد منهم  
 لقيناه يلعب مع العيال عجيب لقيناه مع شيبان معه مرتكين على جدار هناك في  
 السوق قال المهم تراكم عندنا للغدا قالوا الله يغنيك حنا مستعجلين قام الولد  
 وادخلهم وقال هذولي وقام يفهق القرع برجليه وقال هذولا ثمان مبيوعات  
 وهذولا ٣٥ نبي نبيعهم على واحد قد واعدناه والى فعلا قرع جبر ممتاز كبار فيه  
 وحدة مفقوعة ومبين جها على كبر ازارير البالطو قال هذا القرع اللي عندنا المهم  
 اتفقوا هم واياه وشروا البضاعة والا ه يفهقهن برجليه ماها انشط منه انشط مافيه  
 رجليه ويحيي على يديه ويفهق في ذا القرع يقول هذولي نبيعهم وذولا بنذر .



الحاصل اتفقوا معه وشروا والى فيه واحد من العيال منفهق عنم ومنبهر كيف هذا  
عنده ابو ناداه الشايب قال تعال ورا ماتحي مع اخوانك اقرب، منبهر من عمر  
هالشايب كيف عايش و على كل حال الاعمار بيد الله .

عاد انا على طاري هالسالفه ذكرت قصيدة للشاعر الكبير حميدان الشويرع  
يقول فيها :

ياشن في راسي له رنه  
كنه يومي به دوار  
ان قمت فلا بد الونه  
والمشى كنه بي جار  
اشبه لي هرش في عنه  
وان شاف المرعى ماثار  
وسنوني كبر طاحنه  
واكلي نتش بالاظفار  
ياويل مغل بالسنه  
ووفي فرضه كنه نقار  
الصدق خطام للجنه  
والكذب خطام للنار  
وشوفوا هالحكمه بهالبيت الاخير صحيح انها حكمه بليغه .



## بياع الدهن

في السنين الماضية يوم كانوا الناس يشتغلون بالحجر والطين والفلاحة وشغل الحرفة لاهل الديرة نفسها مهوب للناس اللي برا، فمثلا استاد البنيان ياخذ العمال القويين والنشاط واذا شاف له واحد ضعيف قال له باكر لاتصبح ولا تجي للعمل تراك ماتصلح وفيه ناس مثلا يشتغلون مع العمال بالجاجة اللي هي انه يشتغل بملي بطنه يعيشونه او يغدونه بدون راتب، الحاصل، انه مره من المرات هاك الولد جا لقرية من قرايا نجد ولد شاب عمره في حدود ١٩ سنة او عشرين الى واحد وعشرين سنة لكنه ماشاء الله زارق شبابه طويل ونحيف وجاي يترزق الله من قرية الى القرية ولا لاهله الا هو والى اهل هاقرية مشهورين ببيعهم وتجارتهم، اهل بيع وشرا دائما مع البدو، في السمن والاقط والصوف فالولد هذا يدور شغل وطبعا مافيه شدة لشغل الطين وشيل اللبن والشبي الثقيل وصار يدور شغل وكل من شافه نحيف قال مايصلح للشغل، لو ييشغل مع واحد يبني ماله شدة يشيل لبن ولا له شدة يخلط الطين فجلس الولد يترزق الله لعله يشوف شغل، قعد له يوم يومين ثلاثة ايام ويوم من الايام مر واحد من تجار الديرة في السمن والاه يدور عامل رخيص يبي واحد بالجاجة ان حصل، يعني ملي بطنه لانه شحيح وبخيل ولا وده يتحمل راتب العامل، هالتاجر دور ولقى ذا الولد يوم شافه قال يا الله حيه من انت ولده؟ قال انا ولد فلان قال مالقيت شغل؟ قال لا مالقيت قال والله يا وليدي انت الظاهر بجسمك هذا ما مازنيت انك بتلقى شغل ان كان هذا مشيك وجسمك ما هقيت تلقى شغل، وكنك بعد متتب تاكل المهم

انه حطمه زيادة ولا شجعه ، قال شف الله يصلحك يا وليدي اذا جا واحد بالجاجة قل ما يخالف اشتغل عنده ودور الرزق وهو قصده يبي يوبده وعقب يومين او ثلاثة مر من عند الولد الصبح والاه في وسط الديرة حول المسجد ، هاه يالله حيه قال انت الى هالحين ما لقيت شغل قال لا والله ماكتب لي الله شغل ، قال التاجر الظاهر اني ابشير عليك قم ياولدي دور لك ديرة ثانية غير هذي يمكن ماكتب الله لك فيها رزق قال الولد لا بيرزقني الله ان شاء الله المهم عقب يومين رجع التاجر ولقاء الى هالحين الملقى شغل قال له تدري عاد مهوب باكر ، عقبه ابلقى لك شغل ان شاء بس هاه الله الله لايدري احده هاه قال زين ويوم جا نهار ثالث ويجيبه والى الولد من اسرة طيبه وعليه ثوب خفيف حتى انه ذا جا يجلس يرفع ثوبه لا يتقطع ولا يرتكى على الجدار واجد ولا يتحكك به في الجدار ماعنده الا هذا الثوب وقام التاجر الشايب قال تعال وانا ابوك ، يبي يشغله عنده وفعل راح معه لبيته يوم دخله ذاك الدهريز في بيته والى الشايب هذا شديد على الدنيا ، قال شف يا ولدي انت في هالمكان لاتعلم احد ، يخاف انه يطلب راتب يركده يبيه يرضى بالجاجة قال ان شاء الله مالك ياعم الا اللي يرضيك والولد هذا صحيح انه ضعيف ولكن جسمه نظيف ولا فيه عرق المهم ان التاجر هذا دخله في الدهريز والى فيه اللي يسمونه الاولين منقوله ، المنقوله مثل الجمادان الي بجي فيها موية البطاريات بس انها كبيرة هالرجال هذا الي حنا نحكي عنه يشري من البدو السمن رخيص ويجمعه في هذي المنقولة ويخلطه جميع واذا امتلت المنقولة بدا يفرغه في تنك ويلحمهن ويجلبهن ويبيعهن .

المهم نادى الولد قال شف ترا هالدهريز مافيه احد ولا يترك ولا يشوفك احد من اهل البيت وخلق مراتح افصح ثوبيك وعلقه بهالوتد لاتخلي عليك الا

هالسروال ، قال شف هالتنك المصفوفة ترا ماهنا شغل يسوا وهو يبي يركده على شان ما يطلبه شي قال شفت ذي اللبنة ارق عليها واغرف السمن من المنقولة وعبه في التنكة وانتبه قم جب التنكة وقربها من المنقولة وصب السمن في التنكة شوي شوي وانتبه لا ينكب السمن ترا السمن غالي شريناه بهاكالعهده ، يوم قرب الود التنكة شاف التاجر ان الولد بيغرف السمن بسرعة قال لا لا اصبر اوقف تعال خل التنكة ، شف وش تحت المنقولة قال الولد هذا اللي تحت المنقولة هذا غمل قال الشايب ايه غمل بس هو حي والا ميت . ؟ قال ميت قال شف ليه ميت قال هذا ميت من الجوع لانا ماننقط السمن ومات من الجوع ، هاه انتبه اذا جيت تصب صب بالهون وغط المغراف وقربه من اثم التنكة فهمت وانا ابوك ؟ قال فهمت ودلى الولد يغرف ويصب السمن لين ماعاد بقي الا شوي بالمنقولة بس في قاعتها وصار ماعاد يطول ودلى يتطويل كنك تشوفه يعض برطمه الى صار يصب ، المهم عبي التنك وقال للشايب هاه ياعم خلصت المنقولة قال لا لا افصح ثوبك وطب في المنقولة وابد اسلت السمن من جيلان المنقولة ، الين الولد غرف كل شي قال هاه خلصت قال ايه قال لا والا كلما غرف شوي عطا مغرفة اصغر ويوم نشده هاه خلصت قال ايه قال لا خذ الملعقة كمل المهم يوم جا بيطلع الولد من المنقولة والى جنوبه مليانة دهن قال خلاص ياعم مابقا شي ابطع قال لا تستعجل الحين ابديريك من المنقولة للشمس وشفني جايب طشت اطمر من المنقولة للطشت انت تدري ان نصف دهنتا في جسمك بس لاتعجل لين اقول لك قال زين

قام الشايب يدريه لين حطه بالشمس قال هاه لاتطمر ولا تلمس رجلك الارض اطمر من المنقولة للطشت على طول ترا كل دهنتا على جسمك قال طيب

وطمر والاه في الطشت وقعد في هالشمس، شمس حارة، الحاصل قام الشايب  
يسلت ويحك جلد هالضعيف الوليد بهاك الملعقة لين صار جلده حمر كنتك  
مطلعه من ماء حار المهم ان الرجال اوذى هالضعيف الوليد اوذاه بالشغل ما  
صدق الولد يفتك منه المهم هالولد قال الله لا يعيده ولا شغله وراح يدور شغل  
ثاني.

المهم ذكرتني هالقصة بابيات حول الموضوع فيه بيتين لحميدان الشويعر وهو  
حمد بن ناصر السيارى يقول:

الى جاك الولد بيديه طين  
ومن حرثه وشغله بالحفارة  
ترا هذاك ما ياخذ زمان  
الا هو جامع عنده تجارة  
والى جاك الولد زملوق خندق  
ومن نوم الصفر غاش اصفارة  
فحذرا يا اديب تحط عنده  
الك بنت تموت بجحر داره  
هذا قول حميدان، وقول ابراهيم بن جعيشن الله يرحمه يقول بهالموضوع:  
خطو الولد يامال هزل الغظاريف  
بالعجز يلحقه الكتب في ضلافه

يمشي بذل وعيشة الراس تكسيف  
 والبيض يسقته من الماء عذافه  
 ماشاف شوفات العيال الغطاريف  
 للرزق ييذل همته واحترافه  
 يعذر الا طق الصفا بالمغاريف  
 بالبعد عن دار كثير عيافه  
 قلته وانا مالي على الناس تصريف  
 انصح وسيفي مغمد في غلافه  
 اسعى لرزقي بالمشي والتواقيف  
 ارجي لعل الحظ تسمن ضعافه  
 في نجد حول وتارة نسكن السيف  
 عن تاجر يدور فينا الحتافه  
 اصبر ولو ثوبي على الساق ورهيف  
 بالستر يا زينه ولو هو لفافه  
 الى ان قال:

الرزق عند محزم الغرس يالليف  
 جميع مايخفى على الناس شافه  
 وصلاة ربي عد ذار العواصيف  
 على النبي ما حصى الملبي طوافه

هذي قصه فيها عبره حقيقه للحث على طلب الرزق وعن بعض هالناس  
المقترين البخلاء ولاشك ان شغل هالولد عند هالرجال البخيل طلعه رجال  
وعرف ان القرش يجيب القرش واللي علموني بهالسالفه هذي يقولون ان هالولد  
صار من اكبر تجار الدهن بسبب ما تعلمه من هالشايب ومن حرصه على الريال .





## البربري

مره من المرات أنا وايا رباعي طلعلنا في مكشحات كلنا زملاء مكتب وموافق ذلك السنة ربيع بالحليل قريب من الرياض وطلعلنا، حنا نجى خمسة او ستة ترا اذا كثرنا الناس في المكشحات اكثر من ثمانية مثلا تختلف الراء واحد يقول نبي الشجرة ذلك وواحد يقول لا هناك واحد يقول نبي خيمة واحد يقول نبي نقص منك وواحد لا من هنا، اما اذا كانوا شويين يتفقون بالرأي المهم انا طلعلنا واخذنا معنا فراش من المكتب اسمه ابو راشد وحنا بارينه وهو حبيب ونشمي وعشيري نشاما يغسل القدور ويشارك معنا في الطبخ ويسوي القهوة .

الحاصل يوم جينا نبي ناخذ ذبيحة او ذبيحتين قلنا وش راياكم ناخذ ذبايح نجد قال واحد نجد وشو له وثنين بعد النجد الثنتين غاليات يالله لو نبهين ضحايا دوروا لنا ذبيحات عادية قلنا ناخذ من نجد الشام وحنا يمكن بنقعد اربعة ايام حتى لوجبنا نجد يبيصيرن راهيات علينا قال واحد وش راياكم ناخذ برابر ، المهم رحنا للسوق اخذنا من هالبربري جلده اسود راسه ابيض وذنبه صغيرة كنها اللي تجي على القيع والبربري حليل زين بس ما تدري عنه الكبر والصغر ما يظهر لو تصفهم ما يبين منهم اللي عليه الكبر الحاصل خذنا خمسة شريناهن من واحد في مجلبة الغنم وطلعلنا العصر في هكالروضة اللي ما عندك احسن منها ونصبنا خيمتنا قال هاللي جايبينه معنا وش تبون العشاء قلنا سلق وضبط السلق خله ناعم مرة كنه مخ جريوع والا الغنم محطوطة في شبك جايبينه معنا والبربري تراه غثيث لو انطلق منك ما عاد تحببه الى انطلق كنه فشقة من بندق لا عاد تدوره الا

ان كانك تبي تدعسه الحاصل جمعناهن في هكالشبك والا الارض ربيع واثر  
الغنم ضعاف ماهن سمان قال واحد اطلقوهن يرعن قال الاخر لا بس خلوهن  
في شبكهن وولعو عليهم اللمبات على شان يشوفن العشب لان البربري ما يرفع  
راسه بس ياكل وهو مدق قبل ، وخلوهن يرعن هاك الليله قي الشبك قالوا اية  
اللي ناخذ منهن للعشا اياهن اكبر اياهن اصغر قلنا شف هالصغير خذه، تطيح  
عينه على واحد قلنا هذا هو اصغرهن خذه وذبحه والا ابو راشد دبق ولبق سريع  
ووذف سريع تصدق انه يذبح الذبيحه وثوبه ما يجيه نقطه دم ولا يجيه شيء من  
خفته وودافته حتى رجليه ما يجيها شيء ويقضب ذياك البربري ويثني يده من تحت  
رقبته ومن جهة صدره من ورا ما يقضبها وهو يوجهه للقبله ويقول بسم الله والله  
اكبر وهو يذبحه المهم شوي والا معلقه فعاد يقول لا عمركم تجيبون البرابر فكوني  
منهم قلنا ليش قال انه غثيث ما ينصلخ جلده بالله بزراديه لازق فيه لزق الحاصل  
طبخه وسوى السليق على مرقه اللحم .


وتجي الساعة عشر وحننا نقول هاه يا ابو راشد العشاء قال شوي مابعد استوى  
للحم كل ما لمس بالسكرين والا ماش ما استوى قال يمكن انه عود وذا اكبرهم المهم  
ويحط عليه صرار شاهي ويحط عليه كسرة فنجال تخبرون هي اللي تذوب اللحم  
قلنا حطه لو هو ني حطه بس خلنا نتعشى اخلص نبي ننام تعبنا من المشوار حط  
العشاء وطلع المفتح واليدين لحال والا هذا المفتح وظهيره كنه صاجه تغريز  
صاير من الكبر ومع الطبخ اثنتي ظهيره، بربري يكمش مع الطبخ ما ييقى فيه  
شيء، قال اقربوا اقلطوا سموا .

فيه واحد من الربع متولي الامور الماليه وهو اكبرنا وقلنا ناد ابو سليمان ماحنا  
بمسمين الين يجي ناده يوم اقبل وشاف والى ظهير الطلي غايص في السليق قال

لابو راشد وين الذبيحة قال شفها ذبيحة كنها مرسومة رسم عاد اكلوا اللي قدروا عليه . و من بكره وانا جي والاحظهم والى البربري ما يرفع خشته من الربيع دايم يرعى وصار لهن ثلاث ايام ودلن يربضن من الشبع لكن طول النهار والليل ملاحظهن، ترى قليل ربضه البربري، لاحظ البربري دايم يدنق خشته في الربيع ودايم بينن ذنبه تقل مصنع ازارير الحاصل هو البربري زين للبيت والكشته واذا وافق وصار صغير بصير طعم واكثر الناس يشرونه ويحطونه للمرق يحطونه في الثلاثه مع انه يكمش ما يبقى فيه شئ.

عاد في المناسبة واحد من الشعراء قال ابيات عن موضوع البربري وهو الشاعر مرزوق بن جرييع الحنيني الحربي ينصح ويقول ان مرة من المرات ان ربه واصدقاه سألوه وش رايه وش اطيب الغنم قال النجدي في مقدمه ويجي عقبه الغنم الشامى ويجي عقبه مناب مسميه ويجي عقبه البربري الحاصل يقول الحربي في القصيده:

يوم الجماعه وجهولي سوالي  
ابديت رايبى والاجابة صريحة  
قلت اسمعوا يا اهل الفعول الجزالي  
يا عزوتي يا اهل الوجيه الفليحة  
البربري نعمة وذبحه حلالى  
لو كان ماهو للنشامى ذبيحة  
ذبحه الكشتات وام العيالى  
ويقضى لزوم اهل اليدى الشحيحة



## ماجد وجديع

تخبرون في السنين الاوله كان الناس اذا بيتزوج واحد يمشي معه ربهه ويسمون جنب يروحون معه من قرية لقرية ثانية قل انها تبعد مسافة تقريبا ساعة على الذلول انا اهرج بهالكلام قبل لا تحي السيارات ، المهم هذولا مجموعة من الناس بيون يروحون مع رجال ولده يبي يتزوج من قرية ثانية عاد ابو المعرس عزم ربهه اللي حوله من اقاربه ييمشون مع ولدهم لقرية ثانية وتجهزوا الشباب من ربهه ، طبعاً الشيبان والكبار في السن ما يروحون معهم لانه كلفة عليهم لكن يعززونهم اذا جو ، اذا رجعوا ومعهم المعرس وعروسه خطوا من باكر عزيمة ونادوا كبار السن ونادوا امير القرية ومطوعهم والناس الكبارية لكن في حزة الجنب ما يروح معه الا الشباب ويتنقون من الناس اللي نظرين واشكالهم زينة حتى يصير لهم شان في العرس .

الحاصل تولوا يبي يروحون مع المعرس وابوه واخوه الكبير وعمه مثلاً ويبي يروح معه خمسة او ستة من الزكركت الي يتشيكون ويلبسون لبس زين فكانوا من اول الناس يعني احوالهم شحيحة في مسالة الملابس والبشوت مثلاً اذا صاروا مجموعة من الاخوان او العايلة تلقى ما عندهم الا بشتين اللي يبي يروح يصلي الجمعه ياخذ البشت فهذولا اللي بيون يروحون معهم للمعرس اكثر ملابسهم الزينة سلف هذا آخذ بشت فلان وهذا متسلف ثوب فلان وخاصة الجنب اللي قريين من المعرس تلقاه لابس بشت صوف والناس في القيص بس علشان يشكل فهذولا هم رايعين يجون في حدود عشرين الى ثلاثين نفر رايعين على

هالركايب اللي عاد معه ذلول واللي معه زمال كل حسب قدرته واللي اثنين مترادين على ذلول وحدة المههم هذولا هم راحوا وهم ياصلون بالعادة قبل المغرب لان العزجة تصير في الليل ويصير اهل العروس حاطين عشاء واذا اقبلت على السوق اللي فيه العرس تلقى اهل البيوت اللي في السوق من يمين ومن يسار عندهم خبر ان فيه عرس بيصير هناك في اسفل السوق ولهذا العيال الصغيرين اذا جو وشافوهم يقولون هذولا هم جو الجنب يقولون للي في البيت عاد يتفرجون عليهم الناس ويطالعون الجنب، الجنب يبينون يصير لهم خبة ببشوتهم ويصير لهم حس وريحتهم طيب ويحكون يصير لهم حركه وخابرين يصير في العرس ناس يطلون تشوف الباب المنفتح شوي والدريشة المنفتحة.

في مجموعة الجنب اللي جاين مع المعرس شاعر اسمه ماجد بن عضيب توفي وماجد يشكل هنادمه زين يلبس ثوب يلقي وشماغه زين وكان ما شاء الله مقتدر عنده ثلاثة بشوت ويغير قبل ويدل بين البشوت فهاك اليوم يوم يروح للعرس كان شاكل ومتزكرت ويمشي وعينه على الدريشة اللي يطل منها سواد ويناظر وهم ماشين وصاير هو على الطرف وشاكل البشت وعليه زهاب النعال النجديه والشماغ والمرام مصلحها وريحته طيب تفوح فيوم اقبل على هاك السوق والى فيه جذع، بيتهم على اليمنى راح ودخل على الحريم قال جو جو الجنب اللي مع المعرس هذولا هم اقبلوا والى هاك البنت جميله جمالها فاضح سوت نفسها انها تبي تصك الباب عاد بعض البني ترى تعمل هالحركات مثل اللي تقول شوفوني ولا تشوفوني فجأت تركض ويقبالتها على الباب الى الرجايل مقبلين يوم شهقت ورجعت مثل المرتاعة والى بقبالة ماجد يوم شافها وهي في

الباب لمحها لمح بسيطه وراحوا الجنب وحضرو العرس وجوا المعازيم اللي من  
الديرة نفسها وكان من ضمن المعازيم اهل الديرة شاعر ثاني اسمه جديع بن سودان  
العززي من الخمشة من قبيله عتزه كان حاضر معهم سولفوا ودخلوا المعرس  
وقهوهم وعشوهم و كان جديع جالس جنب ماجد طول فترة العرس يسولفون ما  
شاء الله وش هالازوال اللي لمحناها تخبر عاد دايم اهل الهوى على قولتهم سوا  
يستعرضون قصيدهم وش قلت عقبتنا من قصيد اسمعنا ومن هالكلام . الى حصل  
لهم مجال في العرس يحكون الحاصل رجعوا الجنب وجا عقب يومين ويقوم  
ماجد ويرسل ابيات لجديع يشكي له عن المنظر اللي هو شافه لكن ما بين في  
الابيات بشكل واضح من أي البيوت البنت ما قال شفت ولمحت بنت زينه في  
ذلك البيت ، الحاصل انه كتب الابيات هذي وارسلها لجديع يقول فيها :

يا جديع يا مستندي بشكي لك الحالي  
وش عندنا منك يا شوق الهواوية  
الجادل اللي حليه ظبي الاسهالي  
ساعة لمحته ضربني بالقديمية  
الجادل اللي نهدها صوغ فنجالي  
العين خرسا كما عين النداوية  
من ضربته دوك فكر سايفت حالي  
والعين عن نومها صارت شقاوية  
بالله عسى جبهها بالوصل ينجالني  
من يوم شفته وجهه باضع فيه

الله على لزمته في مائع خالي  
 الله على لزمته يا جديع يديعة  
 يا جديع طرد الهوى والصيد غربالي  
 راعيه حاله كما العيدان مبرية  
 دايم شفاياه بباس ونحالي  
 من طردهن بالخلا في كل داوية  
 هاه قام جديع ورد على ماجد بالابيات التالية :  
 حي الجواب اللذي يطرب له البالي  
 ترحيبه من لبيب الصدر مثنية  
 يا صاحي اكتب وزين كتب الامثالي  
 واسطر جواب معنينه بطلحية  
 واليا شمعته ترحل فوق مهذالي  
 ما مونة من حرار الجيش عملية  
 كلف عليها ومس الكور بحبالي  
 وارفع جرير الرسن والحبل مقطية  
 يا زين دفلاجهما مع جرهد خالي  
 توصلك في ساعة بنت العمانية  
 ملفاك قرم بدرب المرجلة عالي  
 ماجد اليا عارضك بادرك بتحية



واليا لفيته لقيت رجال ودلالي  
 مثل الغرائق فيها كيف برية  
 سلم وقله يخبرنا عن الحالي  
 وعطنا منه كلمة حرشا وبرحية  
 بين لنا صاحبك يا طيب الفالي  
 هي وين مدهالها عنز الرماحية  
 ان كان هي بالثمن سقنا لها المالي  
 لو كان يبغي ثلاث امية فرنجية  
 وان كان ما اكفى جلبت البشت وعقالي  
 وابع شقران لك يا القرم عانية  
 وان كان من دون خلك ضرب وقتالي  
 لي لابة كلهم للحرب منقية  
 جيناك في لابتني حماية التالي  
 اولاد وابل يسرونك ضحى الهية  
 والله لو دونها تسعين خيالي  
 جنباه فرعية ماهيب شرعية  
 ساعة لفى الخط جا في القلب ولوالي  
 جدد صوابي جواب كاتبه لية  
 من عقب مانيب عن طرد الهوى سالي  
 ذكرتني جادل عاقت بي صطية

بس اتوجد وخلي ما تهياالي  
واليا عنا لي حكوا فيه وحكوا فيه

هذا هو جواب العقل والجواب الصحيح وهذا الرد المتوقع وابرجع للقصيدة  
اوضح فيها بعض الكلام لبعض الشباب الطلحية الورقة والمهذال الذلول والرسن  
اللي يوجه الذلول والعمانية من عمان وهي ذلول طيبة ، الكلمة الحرشا معناها  
صامل العلم والفرنجية عملة وشقران بعير لجديع  
واولاد وابل عنزة لان جديع عنزي ومثل ما قلت هذا الجواب المناسب .



## وجوب الكتمان

هذولا مجموعة من الناس من ابناء البادية في سنين مضت يمكن قبل خمسين سنة في الحدود طلوعوا بالمجموعة اللي يترواح عددهم بين ١٩ الى واحد وعشرين الى اثنين وعشرين لكن انهم طلوعوا على ركائب واجيين من جهة بر الكويت بيدخلون المملكة وهم ناس يترزقون الله معهم بضاعة والبضاعة محملة على جنوب هالنجايب ومختارين هالوقت هذا اللي طالعين فيه بالذات خاصة قرب ايام عيد فطلعوا ببضاعتهم وهذولا هم مجموعة يقودهم ويدلهم رجال دليل دائما يصير في مثل هالحملة يسمونه امير الحملة وهذا واجب حتى لو كانوا ثلاثة لازم يأمرهم واحد و كان من ضمن هالمجموعة شاعر علم من اعلام الشعر اسمه صقر النصافي وهذا صقر يوم جا يطلع يمكن احد اقاربه من النسوان وصته وقالت خذوا هالولد هذا معكم ولد جذع عمره يمكن عشرين لكن شبابه زين ودايما التعليم يكسب الشاب خبرة وتجربة من اهله ومن اقاربه ومن الناس وخاصة تعليم المرحلة فالمره هذي تقرب لصقر قالت يا بو مهلي (صقر يقال له ابو مهلي) خذ الورع معك عاد البدو يسمون الولد او الشاب ورع من يوم يولد الين يعرس بس حده الى العرس وعقبها ما يقال له ورع فقالت خذ الورع اكربه وعلمه المرحلة وخله يعرف ويطلع رجال وخله يروح معكم في السفر واومروه، قال ما يخالف .

خذوه معهم وجوا هالحملة طالعين على ركائبهم يمشون بالهون وعلى سعتهم وكل اربعة او ثلاثة في خبره وعلى عزبة لحالهم لكن اللي يقود هالحملة

ويدبرهم هو الشويب اللي قدام واحد ييخص البر ويعرفه وصله وصله ويعرف  
الضلع الفلاني والجو الفلاني ولو هو في ليل يدل شايب عليه بشت مهلهل زريه  
رايح، عليه هاك الشماع اللي متقطع ولا بس قبع ازرق فوق هالشماع بس العلم  
عنده ان قال نوخوا ينوخون شدوا يشدون بعد يجي عقب هالشايب هذا واحد  
عنده دبرة في الركايب هو اللي يسنع موضوع علفهن والرجال الثالث في الحاملة  
اللي هو صقر هو الي يدبر ويسنع ويلاحظ الركايب ويلاحظ لا يفقد احد هذولا  
قدام لكن لو يتاخر احد يدركه صقر ويشوفه نظره زين وشوفه زين وصقر من  
حينه من طبيعته رجال جرم طويل له حس جرش وهذا حسب ما سمعت عنه انه  
له حس صلف ورجال يدبر ويعرف.

الحاصل ان الورع هذا دايم مع صقر حوله كل ساعة كل ما وقفوا في مكان  
نادى ياورع اكر ب عليا الركايب.. يا ورع لقط لنا حطب.. يا ورع جب لنا ماء  
المهم شبووا عليه في هالرحله شبووا عليه شبة قدر وكل ساعة يقولون له جب شل  
حمل، لاحظ صقر ان هالورع كثير حكيه وبربرته ويسولف مع هذا وذلك،  
وييعلمه الصمت لان البضاعة اللي معهم وهي ما تخص صقر لانه فقط مأجر  
بعيره على اهل البضاعة، المهم ان في وسط البضاعة شيء ما ودهم يعلمون به وهو  
تتن يعني دخان ومنول يستحون الناس والتتن ما يشرب الا خفية واهل البضاعة  
مايون احد يدري وشي لين انهم يبيعونها خفية على زباينهم وبعد يمكن يخافون  
يوخذ عليه جمرك هاكا الحين قد طلع الجمرك فما ييون الورع يحكي ويبربر  
ويعلم بكل شيء وكل ساعة يكرهه صقر يقبص اذنه بعنقه ويقول انتبه تحكي وين  
حنا جايين قل مدري وين حنا رايعين مدري كم انتم مدري انتبه تعلم بشيء والا  
تحكي انت عرفت لا تبعد عني خلك هنيا لا تقوم الا معلمني.

المهم الحاصل وصلوا في الوقت اللي بيون ياصلون فيه وكان هذاك اليوم يوم عيد ويوم نوخوا ركايهم كل اربعة ثلاثة في جهة صلحوا عشاها تعشوا في الليل وناموا.

فيه واحد في الحملة ما يركد بعد يعني تقدر تقول انه نبيه شوي سريع الملاحظة كل ساعة وكل شوي ينشد صقر يصقر الورع وين راح، هو علمك قبل لا يروح يخافون الورع ذا يروح منايمين يسار الحاصل يوم جا في الليل تعشوا ونامو كلهم الا ذا الورع والى اليوم عيد والورع ما نام جت الساعة عشر حدعش في الليل ما نام عليه ذاك الغتيره صفراء شوي الدنيا كلها ضعفه اللي عليه ثوب وسيع واللي عليه ثوب ازرق واللي لابس ثوب شتا وهو في قبض والورع عليه هاك الغتيره الصفرا اللي كنها عجيئة سمبوسة من صفارها الحاصل رابطها على راسه ولا حظوه قالوا له انت وراك ماتر قد قال انا مافيني نوم قالوا ارقد ارقد نبيك الصبح في شغل مهم قال زين وناموا.

يوم جا الليل ليلين والى هناك حس غنا قام الوليد وتسلسل عمره الورع ويروح هناك صوب الحس ويوم وصل المحل والى عرس بدو وهو ياقف حول طراف العرس والى هناك صفة رجال ومناك صفة حريم والعرس منول فيه اختلاط شريف مهوب اختلاط غير نزيه كل اجتماعهم على نقا وشرف يعني مثلا الرجال يصفون ثم البنات يصفون صف بعيد شوي ويرقصون ويغنون تعرف عرس وفرح والى هاكا البني ثلاث وحده منهن قصيرة ظهرها قصير ومربوعة وفيها بياض، والحمار والبياض يتهاوش فيها والى هي حاطة عشر جدايل وفيها دناديش الى رقصت قامت تقلب وكل شوي يقومون الرجال ويقولون لهم قصيدة والى قالوها رقصوا هالبنات.

المهم جا الورع وجلس يناظر في هالبت ام الدناديش جازت له وجاز له  
رقصها والى فيه اثنين في طرف المجلس قاعدين في العرس ينقشون العلوم هذولا  
من اللي يحكون العظم ويطلعون العلوم شافوا الورع ذا طير غريب يوم شافوه  
قالوا يالله حيه انت وش اسمك اقعد تفضل يالله حيه صب له الشاهي ياولد  
اقرب اقرب وانا ابوك وراك بعيد انت وش اسمك قال انا علي قال والنعم ويقرب  
عند واحد منهم يطلع علوم قال انت اسمك علي قال ايه قال والله والنعم قال  
شفت اللي يرقصون قال ايه قال اياهن ازين قال ام الدناديش ذي زينه وزين  
رقصها المهم يقربونه وشوي شوي يحكون له العظم لين علم بكل شئ قال حنا  
جايين ومعنا بضاعة ومدري وش المهم اخذو علومه كلها سروا الناس في الليل  
عود هو ورقد مع ربعة اللي نايمين .

يوم جا من باكر الصبح والى كل اللي في العرس دارين عنهم وش جايين ،  
كله من هالورع ومن حكيه قال له صقر وين رحت انت يوم تروح ليه قال الورع  
ابروح هذا عيد وش عليكم مني عجيب والله انا استانست وشفت الرقص  
وياسلام على وحدة من البني جميلة ذيك ام الدناديش .

هذي السالفه تدل على ان الانسان يجب ان يلتزم الصمت ولا يعلم بالاسرار  
وفيها تنبيه وخاصة للشباب • هما المثل يقول خذ علوم القوم من سفهاها هذا من  
سفهاها .

هاه درى صقر النصافي عن روحة الورع وتعليمه للناس وش مع الحملة  
ووش فيها ووين هم رايعين ، فعاد صقر النصافي باعتباره شاعر وباعتبار هالولد  
هذا يقرب له ينصحه بالابيات هذي ويقول فيها :

يا علي خل العيد لام الدناديش  
 اللي تنظف كل يوم جسدها  
 تبغي تماري ناقضات العكاريش  
 في كل ملفاح تنقض جمدها  
 العيد عيد الله ولو فات حتيش  
 من حسبة أيام يترك عددها  
 نبي نعلمك المساري على الجيش  
 تمشي ذلولك لين يفتر جهدها  
 خابرك متب ضاري للمطاريش  
 نبيك تونس حلوها من نكدها  
 ليلة على مسرى وليلة مغايش  
 وليلة نخلي نومها لمن رقددها  
 وليله على ثمره وليلة على عيش  
 وليلة نوكلك الشحم صيد يدها  
 يا علي وان جيت العرب لاتصير ديش  
 خبل اليا جاب السوالف سردها  
 احفظ لسانك لا يجي فيه تبطيش  
 تصبح عيونك كايدات رمدها

يجيك من ينشدك نشدة تفاتيش  
يبي يسنع هرجه يعتمدها  
خله يقوم امقلت في يده ريش  
يروح منك وحاجته ما وجدها  
ترى دعاييل الخبول الفوانيش  
تبدي بمافيها ولا احد نشدها  
يجيك واحدهم يورش تواريش  
سحابته يسبق مطرها رعددها  
اللي لغمزات السوالف مناقيش  
قراية الكلمة على اول عددها  
تجي سوالفهم بضحك وتبهيش  
وقلوبهم ما احد يفكك عقددها

في البيت الاخير قصد صقر يقول ان كانك صادق رح طلع هرج من هاللي  
سألوك وخذ منهم علوم ان كانك جيد فالواحد ما يجب انه يعلم بقصياه حتى  
ولو ما وصاه أحد وش لون عاد وهو موصى .





## الرجال مخابر

هذا واحد من الشعراء المخضرمين شبه معاصر اسمه عبدالله بن راشد الدحام، الدحام راعي ثادق، دأب اسم الشاعر يجيبون باخر اسمه اسم ديرته، توفي عام ١٣٧٨ هـ، كان الرجال هذا حبيب ووسيع صدر وطيب وعشير نشامي وكان مشهور بسمعته الطيبة، وكان معه جمل كبير حاط عليه مزاد يمين ويسار على جنوبه ومعه بضاعته حاطها على الجمل غادي مثل اللي معه بضاعة متنتقة، يطلع ويسافر على ظهره الجمل وما يهيمه يوم اسبوع عشرة ايام يروح يطلع من ثادق الى الصمان وهو رجال يدل يعرف الشعبان والمعالن في هالصحاري.

الحاصل ان هالرجال معه بضاعته ويدور على هالبدو في مكاناتهم وبضاعته هاللي بيعها كانت عبارة عن قهوة هيل مسمار دارسين مثلا ومعه شمع وكباريت وفتايل سرج الاغراض اللي ماخف وزنه وغلا ثمنه ويقعد يوم يومين يبيع ويصبر عليهم ويوسع الصدر ويرجع بعدين يستافي منهم الحاصل، الرجال هذا اللي اسمه دحام صفته يقولون مهوب جميل ويميل الى السمار وانه كريم عين وخلق الله حسن وانه رث الهيئة ولكن الرجال محك ذهب ويعرف الرجال وسريع الملاحظه ومنطقه زين ودقيق ويرى لنفسه قيمة الحاصل في احدى روحاته هذي جا عند راعي هكالبيت الشعر الكبير راعي حلال وابل وغنم، بيت الشعر هذا ما فيه الا المرة، استقبلته المرة وقالت له رح للمجلس هناك، وجلس عندهم يومين ثلاثه وعادة يروح لجيرانهم ويغيب فترة ويعود لهم، دأب راسي عندهم.

وفي مرة من المرات يوم جا من حدار روحاته سأل وين راعي البيت قالت المرة  
 هناك في هاكالمحل، المهم نوخ بعيره اللي يجي له معه خمس سنين ويعرفه زين  
 يعادل عنده سيارة فورد كراون فيكتوريا هالبعير في ذرابته ومشيته وهزته،  
 الحاصل نوخه وقلط، واسم راع البيت اللي دحام جالس عنده اسمه فريج وفريج  
 هذا شايف هيئة دحام، رث الهيئة وملاحظ المره تكلمه كلام رجال تقدره وتحترم  
 ودحام ما بين نفسه الحاصل يوم جا يوم من الايام حل عند فريج ضيوف وقلطهم  
 وهو يجيب الدله ويصب لهم القهوة لهاضيوف ودحام ملتزم احترام المجلس ولا  
 راح لرأس المجلس، قعد في طرف المجلس، هاه يوم حس فريج اللي يصب  
 القهوة ان الدلة قضت ما بقى الا سريبها ومار يصب لدحام في هاك الفنجال  
 سريب قهوة عطاء اياه يعني حاقره ما شاف له قيمة وصارت في خاطر الدحام اخذ  
 دحام الفنجال وكبه، وكتمها في نفسه هاك الساعة ولا قال شئ وخلا الضيوف  
 لين راحوا وبقي في المجلس هو ماعليه قاصر القهوة والهيل كل شئ معه على  
 الذلول لكن انغبن كيف ان راع البيت حقره وصب له من السريب فلا بد يدافع  
 عن حقه.

الحاصل ان الرجال دحام علم المره وقال ان رجلك هذا سوا كذا وكذا وش  
 اسمه قالت اسمه فريج والى هي قد اوحته يقول ابيات قالت انت شاعر قال اي  
 بالله شاعر وقال لها يوم ان رجلك حقرتني وصب لي من سريب الدلة اسمعي  
 هالابيات وعلمي بها اياه قالت وشي قال:

يا فريج شب النار لا جوك عجلين

قهو الطروش وما بغى الله يجيبه

وبالك تقهوي الزين وتخلي الشين  
اصحا تراها بالسنافي مصيبة  
كم سلة جوهر وهي غلفها شين  
والى قطعت بها تقص الضريبة  
وكم خوصة بيضاء وتلعج بحدين  
لا حل تقطيع اللحم ما تشيه  
وبالك تقول اعور ولاله حذا عين  
ولا كملت صبت له من سريه  
تراي راعي الكيف والبن من حين  
وسوالفي عند الشامى عجيبه  
اقصد على الحكام والذم بعدين  
للي وراده ما يورد قليببه  
يا شوق مركوز النهدي كامل الزين  
اللي نهوده مثل بيض الربيبه  
ملا المبرد بن والهيل تسعين  
وجاب الخطب والمما وتمره وطيبه  
وقالت لي انت حضيري يامسيكين  
ومن دور العيشة عسى الله يثيبه  
واثر الحضر بالقول ماهم بسهلين  
يا زين قول الحضر عجله وجيبه

قلت اقعدني واوحى قصيد المحبين  
 ذكرت من مثلك هروجه عجيبة  
 حضرية في وسط قصر من الطين  
 عجاجة لعباة لي حبيبة  
 هواي مضموني مع اللي مقيمين  
 واللي يشد ويرتحل ويش ايبيه  
 وضحكت بغر كنهن القحاوين  
 واشافي مثل البريسم لبيبة  
 صلو على المختار سيد النبيين  
 عد النخيل وعد ما ومى عسيبه

هذي قصيده الدحام ويوم يقول القحاوين يعني نبات القحويان نبات ابيض  
 بياضه ناصع صافي بالحيل ويستفاد من هالقصيدة أن الرجاجيل مخابر مهوب  
 مناظر ولو انه ما حقره ما قال هالكلام.



## شاعر وشعر غزلي عفيف

هذا واحد من كبار الشعراء هو ابراهيم بن عبدالله بن جعثن كانت وفاته عام ١٣٦٠هـ مره من المرات (طبعاً الرجل انا ما لحقت عليه لكن اللي لحقوا عليه الوالد وجدي) وهو من اهل سدير وشاعرهم ومعروف عنه أنه رجل نزيه ودين وحبيب وعفيف وخير جداً، ولكن أكثر قصيد الغزل اللي يقوله هو واكثر الشعراء هو من الخيال ويقولونه لانه مطلوب ويرغبونه الناس وتخبر الشاعر احياناً يتخيل شي ولو هو ما هو صدق وبينني عليه قصيدة غزلية جميلة والعبرة فيها مشدّها أو بيان القصيدة أو الحكمة فيها أو قوتها أو قوافيها القصيدة اللي تلفت الانتباه وتكملها من حيث مبنى القصيدة.

هذا الشاعر كبير في السن كان يمشي مرة في شارع في احد الأسواق في قريته (وهو طبعاً قد ترك أمور الغزل وقصيد الغزل كله وتفهم من القصيدة أنه ترك أمور الغزل) وهو يمشي كان قدّامه حرمة تمشي وعليها عباتها وهي على يسراه، لاحظ هو أن المره وراها طفل صغير عمره يعني ثلاث سنين تقريباً حليل ومتزكر من العافية هالوليد متعافي بالحليل وماشالله جميل وحليل، وعليه ثوب زين على قد جسمه (أحياناً إلى لبس الولد ثوب وصار راهي عليه وغسل مره مرتين يشمر ويصير بالحليل لابق على جسمه ويكبر الوليد شوي فيصير الثوب عليه زين فيوم شافه أعجبه وصار الولد يبتسم والولد بعيد عن أمه فحاول بن جعثن يسرع بي يقضب الوليد ويسلم عليه ويحبّه، دايماً عاد ترا بعض الحرير تستانس إلى جا رجال أو أحد يعرفها وحب ولدها تدري أنه يغليه، أحياناً الغلا

يصير من غلا الأم بعد، المهم أنها يوم حسست انه هذا هو يناظر الوليد وهي تلتفت  
وتطمئن وترفع ذرعانها وتشيل الولد وشالته ولا أمداه عليه، هو يوم شافها مطمئة  
على الولد بتاخذه تركها وخلها تمشي في حال سبيلها وفعلا هي طمنت وشاف  
ذرعانها يوم شالته عليها حلي ذهب، وراحت في دربها لكنه عاد تصوب من  
هالمنظر فيعبر بالآيات هذي ويقول:

يوم المقادير والأسباب ساقنتني  
وانا عن أهل الهوى مقفى ومنحاشي  
البكرة اللي تبوج السوق لاقتني  
تمشي على هونها ييرا لها حاشي  
اسرعت ابجود الحاشي وعاقنتني  
يوم أنها تلتفت وتناظر الماشي  
حليها بان والذرعان ساقنتني  
درت بي أنني من أهل الصنف قماش  
طمعت أبي بوقها لاشك باقتني  
وانا نصوح لها مانيب غشاشي  
قلب الخطا يوم عاقتني ولا أسقتني  
هافت غصونه وزرع القلب عطاشي  
يوم اني أقنص وبارودي على متني  
وانا تراي آخذ الشوكة بمنقاشي

واليوم صديت والأيام أراقتني  
 ما عاد لي بالهوى ومتابع اللاشي  
 عديت في مرقب العشاق وأرقتني  
 راع الهوى لو تعلّى فيه ما عاشي

مرقب العشاق دائماً يعني الشعراء البارزين اللي ما تنفتح قرائحهم للشعر إلا  
 الى مثلاً عدّي على مكان أو قال بعدّي راس الرجم أو بروح في راس الرّجم،  
 الحقيقة هذا الوصف الجميل من ابن جعيش في هالقصيدة عن هذي البكرة اللي  
 معها الحاشي طبعاً هي راحت في حال سبيلها وهو كذلك بس انه نقل هالصورة  
 واحساسه بهالقصيدة وعبر عن ذلك الموقف بالأبيات الجميلة هذي لكن أرجع  
 لموضوع تعدات الرجم اللي يقول، شاعر ثاني آخر قبل ابن جعيش بينه وبين ابن  
 جعيش فترة اللي هو الشاعر: فهيد بن ابراهيم السكران، هذا الشاعر من مشارف  
 تميم من شعراء منطقة السرمات عام ١٣٢٤ هـ فيه له قصيدة غزلية جميلة من  
 قصايد الغزل الجميل وفيها قولته انه يعدي الرجم يقول:

يا ويل من غبنه يطاول حياته  
 لو راحوا الأسلام ما والله اريح  
 راع الهوى ما احد يسوّي سواته  
 لا حال له من دون خلّه سواميح

ويقصد بكلمة الاسلام يعني المسلمين يعني الناس وهو تعبير درج عليه شعرا

واجد يقول:

يا ويل من غبته يطاول حياته  
 لو راحوا الأسلام ما والله اريح  
 راع الهوى ما احد يسوي سواته  
 لا حال له من دون خله سواميح  
 ترا التواجد والتمني غناته  
 وهجس أني أرقى نايف الرجم واصيح  
 اقنب لمن كن النضا قالعاته  
 عني نحنه شمع الفطر الفبح  
 على اللذي كن الضبا مرضعاته  
 كنه ضنا لدقيقات المذايح  
 كن المها من درهن غاذاياته  
 عز الله انه فيه من ريجهن ريح  
 يا زين والله لدته والتفاتيه  
 في ماقف ما طالعوه المشافيح  
 في ماقف له خالي من رعائه  
 أجني ثمر طلع التفافيح ومريح  
 يا عود ننبوب حسين نباته  
 تنسف عليه الجهم فرق مراويح  
 العنق عنق غزيرل في فلاته  
 والعين عين مرايعة للملاويح



عوق لطّراد الهوى في حياته  
الى التحض له بالعيون الذوايح  
يا كيف اباسلم منه وروعة هواته  
من يوم صوبني وانا اقوم واطيح  
عيشي مراعاتي ثنايا شفاتيه  
الى تبسم بالثمان المواضيح  
خده يقادي لون صافي مراته  
والا كما برّاق سحب مراويح  
أزكى سلام الله وتتبع صلاته  
على نبي وضّح الحق توضيح

هذي قصيدة فهد بن ابراهيم السكران شوفوا وشلون جمال القصيدة الغزلية  
العفيفة وترايط الأبيات مع بعض ولاهيب طويلة يملّون منها الناس ، أنا دائما يا  
جماعة حريص على أني أسمعكم من قصايد الغزل الرقيق الجميل اللي يكاد  
يندثر ، ما عاد تسمعه اليوم أو قليل وروده "وبعدين جمال القصيدة والشعر الغزلي  
الشعبي ترا لذته في سماعه أكثر من قراءته ، يوم يقول في الأبيات هذي "على  
الذي كن الضبا مرضعاته " يصفه بوصف الغزلان هما يقول "هجنس اني ارقى  
نايف الرجم وأصبح " من الغبن اللي هو يوجسه اللي سبب أنه يقصد فيقول "   
على الذي كن الضبا مرضعاته كنه ضنا لدقيقات المذاييح " الغزلان " كن المها من  
درهن غاذاياته عز الله انه فيه من ريجهن ريح " يعني فيه من حركات هالغزال ومن  
ريحة المها " كن المها من درهن غاذاياته عز الله انه فيه من ريجهن ريح " شوفوا

وشلون هالوصف الجميل ، أنا اعتقد ما مر علي مثل هالوصف ويمكن أقول ما  
احد سبقه على مثل هالبيتين لكن بيتين جميلات .

سمعتوا قصيدة ابن جعثن الله يعفو عنا وعنه وسمعتوا قصيدة ابن سكران  
الله يعفو عنا وعنه وكل ترا القصيدة هذا كله عبارة عن تمني والا الأولين عندهم  
عفة وأدب وكرم ولا يمكن في قصايدهم يضايقون الناس أو يغثونهم أبداً ولكن  
هذا كله مجرد قصيد غزلي وأحياناً يمكن يمثلته تمثيل .



## فاجعة بن دويرج

هذا هو الشاعر عبدالله بن علي بن دويرج من أهل جفن من إقليم السر في نجد عاش الحقيقة فترة فيها قل وشح في أسباب المعيشة، اشتغل في النخيل واشتغل مع اللي ينون يعني جرب أنواع الحرف المعيشية ألين أنه كبر وتوفى الله يرحمه فمثلاً اشتغل في النخيل منوّل يوم أنه نشيط يرقى النخل ويلقح ويصرم ويشوك وعقب ما انه كبر شوي ما عاد صار فيه شدة للشغل ثم تزوّج حاله حال غيره مثل الناس، وجاء عيال، منوّل قليل اللي يعيش من العيال لأن الأمراض والصخاين مثل الجدري وغيره الله يدفع البلا منوّل تموت المواليد مافيه مقاومة والعلاج منوّل شحيح هالحين الحمد لله الناس بخير ونعمة وأسباب الوقاية باذن الله موجودة، فهو جاء ولد عاش عندهم فترة لين صار جذع وطلع من عندهم من قريتهم وراح للرياض ما ادري او راح للظهران واشتغل هناك، وعقب مدة توفت زوجته الأوله وقعد له مدة البين الله سبحانه وتعالى وفقه ورزقه الله ولقا له زوجة وخذاها وجابت له عدة عيال لكن ما عاش له إلا بنت من هالذرية.

ويوم أنه كبر ووصل عمره فوق السبعين عاشت هالبنية عنده في هالبيت والبنية، دايم اذا صارت البنت حنونة ولها رحمة تصير قريه من قلب ابوها دايماً ويشفق عليها أكثر لأنها هي اللي في وجهه هي اللي تلبى طلباته وهي اللي عنده قبل وحتى الأم تحبها لأنها تساعدوا وتصير معها وتصير يدها الثانية في البيت قربي لي هذا يا بنتي وجيبي لي هذا يا بنتي، وابن دويرج عايش مثل ما تقول في بيت شعبي في قريتهم من اول كل بيوت القرايا مثل كذا مصاييح وعمد وحوش

في أسفله سدره والانخلة وحوش مناك مكشوف فيه غنمهم وحطبهم ومنا  
ديوانية ومجلس وغرفة على عمود فهذي الديوانية وهذا المجلس وهذي الخارجة  
اللي يقعد فيها، والحرمة هذي اللي هو متزوجها حرمة حبسية دينة وصاحبة دين  
وظفرة وذربة بيتها نظيف من أول الباب لين اخر البيت تخمه وترشه ودايم فيه  
طراوة وفيه حياة هذي القربة معلقة ونظيفة وهذا محل القهوة نظيف والمطبخ  
نظيف ومواعينها دايمًا نظيفة وذربة حتى في طبخها وشغلها وملاحظتها لزوجها  
ومحلها وهي عشرة دايم يجون عندها الجيران وترحب بأقارب زوجها وتهلي بهم  
الى جا تلقته عند الباب واخذت بشته وعلقته ونعاله هذا هي في مكانها والى جا  
قبل الظهر غسل وان كان امدها يتقهوى قبل صلاة الظهر تقهوى والا راح وصلى  
ورجع يتقهوى.

انا ابتكلم عن البنت اللي هو قال فيها القصيدة البنية هذي عقب ما صار  
عمرها ست سنين فزت سبحانه الله، الله معطيها جمال بالحيل جميلة يعني  
وجهها مدور وأبيض وعيونها وساع وحليلة ومريتها أمها تربية حشيمة ملبستها  
ثوب ضافي الين يدها والفتستان واصل الين رجليها وتخنيها مع يديها، ما عندها  
الا هالبنية وتلاحظها تخنيها مع يديها ومع رجليها وتحط لها في يديها مواطي طيور  
بالخنا قبل تنام وتربطهن تصير كنها تبي تلاكم وامها دايم تجملها وتكحلها  
وملبستها خاتم ومعاضد هذي البنية وهي عندهم في البيت في لعبها وحركتها ما  
لها حس مهيب توذيههم ولا تكسر شي ابد مالها حس.

هناك عند أهلها شنيطة زرقاء لونها سماوي منقشة بأصفر فيها وردات  
الشنطة ذي كانت للأبو حاط فيها اوراق له وحاجاته الخاصة من اوراق

ومكاتبات، يوم جا يوم من الأيام ولاه ضايح مفتاح قفل الشنطة ويبي يفتحها وهو عجل قام وخرعها مع ركزة القفل وصارت ما عاد تصلح لشي وقال للمرة خذوها ان كان ودكم تحطون فيها شي قالت البنية لا انا ابيها ابخط فيها ألعابي قال خذها الله يصلحك خذتها وحطت فيها لعيياتها ،وشي لعيياتها كلها نجر صغير غضير صغيرة دليلة صغيرة كل شيء صغير يحبونها البزران منول ولعبة حاطة لها شعر ورأس قطن يجيبون خرزة ويحطون فيها قطن يحشونها على شكل دمية ويسمونها لعبة وتقعد البنت تتخيل أنها أعرست وجاها بنت تلعبها وتكددها وترينها ولعيياتها مالها حس جامعتها في مكان وإلى جا الظهر جابتها وفكتها ولعبت فيهم ثم رجعتهم وحطتهم في محلها مالها حس ولا توذي ولا شيء ولا تكسر جا الأبو مثلا يتقهوى وهذي الأم بتصب له تلقاها هي وري الأم من الحياء تويق على أبوها من وري كتف أمها تلبسها الشيلة وتخلي ريحتها زينة تطيبها تحط فيها طيب منا ومنا إذا بغى ابوها يسلم عليها كل ما بين كلمتين " جعلك في الجنة يا أبوي " إلى نادها تقول لبيه طق مثلا أحد عليهم من الجيران وإلا إن كانه غريب ما ترد هي علشان ما يبين صوتها تخلي أمها اللي ترد جا أحد من حريم الجيران تلقتهم هي وجابتهم يا هلا ومرحبا هالبنية فزت صار عمرها ثمان سنين تسع سنين وتعدت التسع سنين وصلت الـ ١٢ صحتها زينة وبدا يبين عليها امارات البلوغ يصير عندها استدارة الورك وبروز الصدر ولبسوها ثوب وسيع شوي خلوها تحشم ولاتين إلى صار عند أمها حريم واجد ماتين تصد في الغرفة هناك تتعلم التخفر من هالحين صار عمرها في الطعش ثلاثعش أربعطعش المهم ان أبوها يغليها تسوى عنده عيونه .

الحاصل يوم جا ليلة من الليالي وإلى أيام شتاء وإلاه متزهب هو للبرد قبل بشهر  
جايب حطب سمر وجايب رمث وجادعه في الحوش وعندهم ثلاث معزا في  
الحوش ماشاء الله الحليب راهي وكل شيء راهي جا عقب الأخير وجلس ارتكى  
على المركى على هالسريع عندهم في هكالقهوة دافية بالحيل والجمر يتلضى  
تقهوى صبت له شاهي يسمونه حلو الأولين يخدرونه في بريق ويحركونه بقطعة  
خيزرانة عصا يسمونه الأولين محرك يحطونه في مكان ما يجونه البزران ولا  
يلعبون فيها وإلى عندهم في هالدلة حليب قالت تبي تقهوى الحليب وإلى إذا  
صليت الأخير قال لا إذا صليت الأخير يوم جا عقب صلاة العشاء وجلس شوي  
بغى الحليب وإلى والله أنه بارد قال يا بنتي قالت سم لبيه قال جيبي لنا حطب من  
الحوش لا تروحين في الظلما خذي السراج جيبي لنا حطب قال تعالي تعالي  
اعلمك يا بنتي قالت سم قال جيبي من العويدات اللي يدخلن تحت المركى ،  
المركى مثل ما تقول مثلث حديد .

راحت البنية وحطت السراج جنبها وتلمست تجيب من الحطب عودان  
تدخل تحت المركى لقت عود عودين وإلى هذا هالعود طويل وإلاه زين وجت تبي  
تكسره أخذته على ركبته وإلى عليها ثوب راهي هي هذيك الساعة حافية لكن ما  
شاء الله متعودة على الممشى مع العلم مافيهامشق ويدياتها بيض وش حليلها  
مرربة يوم جت بتكسر العود صاير طويل ونقر العود وطق السراج وانكفى  
السراج وانكب القاز منه وطفى وهي ما بعد جمعت العودان اللي هي تبي قامت  
تلمس في الحطب تدور عويدات على قد الي هي تبي أثناء ماهي تلمس وإلى  
تنقرص من يدها وتزقق ذيك الزعقة ويجون يركضون أثرها منقرصة من داب

قرصة كايده وما فيه هذاك الوقت علاجات المهم حزموا يدها وسرى السم في  
جسمها ويوم يومين ما ابطت وتوفت الله الدائم .

بعدها حشت نفس أبوها عقبها فالأبو إذا بغى يجلس وشاف الدريشة تذكر  
وقفته عنده إن كان يبي يشرب في ماعون ذكرها يوم تحببه له إن جا عند المجلس هذا  
تذكر حسها يوم تقول لبيه ويقعد له شهرين أو ثلاثة أشهر أو أكثر على الحال إلى جا  
الليل الأظلم يصلي ويدعي لها دعاء عسى الله لا يحجبه ويقول في القصيدة هذي :

عفا الله عن عين حلا النوم جافيتها

كراها قليل وذارف الدمع محفيتها

إلى قلت ألا يا عين هيلدي وهودي

جرى دمعها الصافي وهلت عباريتها

تبين فروع الصبح ما ذاقت الكرا

ولا ألوم عين فارقت شوف غاليها

ولا زل يوم أو ليلة ماتعبرت

عن النوح أعزيتها ولانيب قاويها

وانا في رجا جزل العطا عالم الخفا

يلطف بحال خافي الهم باريها

على نور عيني لب قلبي ومهجتي

نحن الضماير كل ما حل طاريها

حين الخلوج اللي عن الضير فاخنت  
إلى غاب عنها ساعة ما ياربها  
وأنا كيف ما أبكي طفلة غضة الصبا  
حورية سبحان رب مسويها  
نشت بالهدى والدين والحق والبها  
فلو طالت الايام مانيب ناسيها  
فيها طبوع كاملات حميدة  
حنون على الجيران ووصال عانيها  
عفيفة نظيفة جيب ما داست الخطا  
ولا هوجست بالمذهب اللي يردبها  
حشى ما بها من خافي العيب ذارب  
سوى حشمة الوالد فهذا فهو فيها  
كمل عمرها ثنتين مع عشر وأربع  
سوى محترمها تسفه لو يحاكيها  
خذت هجرة بالبيت عندي قليلة  
أمانة وأخذها الخير اللي عطانيها  
فلانيب جزاع فلا شك ولعة  
أعرف الأمانة مالها غير راعيها



فيا سامع دعواي في مظلم الدجى  
تمحاً خطاياها وثبتت حسانها  
وتجعل لها في جنة الخلد منزل  
تقطف ثمر جنات طيبة وتجنّبها  
وتعوضها في ما قصر من شبابها  
برضاك يا خلاقها وانت واليهـا  
إلهي ودودي دعوتي تستجيبها  
على النفس كله من غلاها مبدئها  
الا وتكدر خاطري من فراقها  
ولو لا غلاها ما تكلفت رائيها  
سمية دموع المزن في غبة البحر  
سوى البنك ما يدرك ثمنها ويشربها  
وأنا ما أبي إلا يوم يطري سميها  
عفى الله عن عين حلا النوم جافها  
وصلو على من لا افتري سيد الورى  
عدد ما جرا من رايح المزن واديها

هذي من قصايد الرثاء الجميلة والل توضح غلا البنت عند ابوها وامها وتبين  
وش كانوا الناس عليه من حسن تربيتهم للاولاد والبنات ولله الحمد .



## عزة النفس

هذي سألقة سمعتها من الشاعر سويلم العلي السهلي رحمه الله يقول حنا  
سنة من السنين وافق عندنا ربيع ونازلين في هكالجو يحدنا من شرق ضلع مطاول  
من الجنوب للشمال نازلين بمحل ربيع ارضه طيبة بالحيل خابرها أبوي قبل ، يقول  
جينا ونزلنا في طرفها من الجنوب وكل يوم تزين ومعنا غنم وحلال ويوم قعدنا لنا  
مدة ويتزل عنا شمال ناس وعنا غرب ناس من كل عرب نازلين حولنا لكن حنا  
اللي اطرفهم من جنوب يقول العرب هذولا أكثرهم عندهم حلال ورعيان  
يروحون منا يمين ويسار وإذا جا الليل بعض المرات يسير بعضهم على بعض  
هالعرب يعزمون بعض والى فيه ناس توهم نازلين من شمال ويوم جا مرة من  
المرات توافق عزيمة عند القرييين ويعزمونا ونروح لهم انا وابوي وقعدنا عندهم  
وراعي البيت يرحب وإلى عنده عيال وله حريم وماشاء الله عنده عيال واجد  
وقاعدين يصبون القهوة في بيت الشعر ومستانسين ويسولفون وسألقة تدور  
وقهوة تجي وقهوة ترجع الحاصل ان المعازيم راحوا وتفرقوا وطلعت انا وابوي  
وبطلعتنا والى تمر ذيك البنت بنت لراعي البيت عليها جلال وتسوق الغنم بنت  
متعافية وجميلة جدا يقول وانا اللي انصاب من هالبنت من اول نظرة يوم شفتها  
بس معي ابوي ولا اقدر اقول شي .

ومرت الأيام وتتوافق على مارد او على السيل و الى البنت فعلا غاية في  
الأدب والجمال حتى هو كلامه دمث وأخلاقه طيبة هذا كان عفة العرب وشكلهم  
حتى لو لقي بنت وما عندها أحد يكلمها كلام عادي و يمزح مزح شريف وعفيف

وتلقاه يسولف مع البنت وهي بعيدة عنه وتمضى الأيام وتخافت البنت دمه  
وشافته حليل وصار دأيم يفكر فيها ويشوفها وإلى جا الليل صار يهوجس فيها  
وليت من يزورهم وليت من يروح بس ما يقدر يروح هو لكنهم يتوافقون على  
المارد وغير المارد ويشوفها دأيم مضت مدة وبدا هالربيع الي هم فيه يضعف شوي  
ودأيم العرب يتابعون حلالهم يروحون يمين ويسار وإلى الجبل اللي يحدهم فيه  
طيور وفيه ملازم ماء فوق وهو ضابط مكانهم أنهم قدام الملز والقلته الفلانية اللي  
عنهم شرق حيث يجي عندها حمام ويصيد منها ومثبت أنهم قبال منزلهم شرق .

ويوم جا يوم من الأيام عقب مدة بعد ما توافقوا كم مرة ودأما البنت الذكية  
إلى وافقت مثل هذا حتى لو مهوب من عربهم ما تبين أنه ما تبيه تمنيه وتعلقه تخليه  
معلق بخيط أرهف من الشعرة وتقوله أنت حبيب وطيب وأنا ما شفت أحسن  
منك ولا أحسن من أخلاقك ويتعلق هو يحسب هالحكي أنه صدق وهي تسنع  
خبزتها ما دام أنها هنا عشان لا سمح الله ما يصير عليها اعتداء يصير المسألة حب  
شريف وهي على اللي هي عليه هي تلقاها في فكرها أما موبدة لها ولد عم وإلا  
واحد قريب مهوب معقول تبي تعشق واحد من بعيد وتاخذه ولاهوب العلم  
عندها العلم عند أهلها .

الحاصل يقول يوم جا يوم من الأيام وأعدي على هكالضلع جبل رفيع  
وأمشي وأطالع أشوف يقول ما قدرت أشوفهم ولا أستكشف المنطقة هذي إلا إذا  
عديت هالضلع ويوم رقيته وإلاني أشوف الناس يقففضون يعني يشدون اللي  
يروح شمال واللي يروح غرب شادين كلهم وأقرب عند مكان الطيور ويوم  
طالعت وبرقت زين وإلى واللله هذولا هم يشدون يطوون كل شيء بيروحوون

وإلى كل هذيك الأيام يفكر ومعجب فيها من لباقتها وعلومها وأنها ما تسمع كلام  
أحد ورايها براسها ويأصفها ويأصف جمالها يمكن أنه لامحها وشايفها عن قرب  
أو من وري البرقع طيره الهوى المهم انه شايف شيء ويقول عاد قلت الأبيات  
هذي:

يوم عدت في راس الطويل العسير  
دوني الطير خفاق الجناحين حام  
بادي فيه اطالع وين قاد النشير  
احد قاد قبلة واحد قاد شام  
آه وا قد قلبي يوم قض الحجير  
كن قلبي يقدر بحد باري العظام  
كن قلبي يقدر بحد موس شطير  
اثر راع المودة لا شكى ما يلام  
المصيبة إلى جا الليل عقب الأخير  
كل ناظر ينام وناظري ما ينام  
كيف ابتسى وليف ما استمع للمشير  
ما يطيع الخوال ولا يطيع العمام  
مع لباقة علومه فيه زين غزير  
قرن ضافي ووسط خافق يا سلام  
المطوع إلى منه نظرها يحير  
تفتخ ابصار عقله ما يرد الكلام

خذه اشقح عفر وصفه تقل به ذرير  
 نور خذه يقادي نور بدر الظلام  
 والشفايا حمر تشدى سلوك الحرير  
 والثنايا تلالا بيض حدر اللثام  
 اشغل القلب يا الاسلام طير يطير  
 باللحن يالله انك لا تعيد الحمام

ويقصد في " اشغل القلب يا الاسلام طير يطير " يا العالم يا المسلمين يا ناس .  
 راحوا وشدوا وابعدوا وصار ينشد عنهم وأخذ له مدة وهو ينشد عنهم وإلى  
 ما عندك أحد ومدرى من جاب له العلم قال هي ما سألت عني قال يا حليلك  
 الحين تصدق هناك أول يوم أنك قريب عندها لكن إذا بعدت وغابت العين عن  
 العين ما عاد يمدي يروحون الناس ويلهون في أشغالهم، قال بس أنا متعلق فيها  
 وفي حبها وأثرهم راحوا ونسوني وهو يقصد ذيك القصيدة بعد مدة ويقول فيها :

يا مل قلب كل ما ناموا الناس  
 من الليل ياخذ ربع ساعة وياعي  
 فإلى وعاجته الهواجيس من راس  
 وقام يتقلب في فراشه وفاعي  
 ولولا ضلوعي للمعاليق حباس  
 لافوع فوعة واحد من قطاعي

قطيع غرب وغطلس الشوف الادماس  
بارض خمال وخارشتها السباعي  
ودلي بلوج وكل اشافيه بباس  
وتاه الطريق وراح فكره ضياعي  
وجنه سباع مع سنا الليل غلاس  
مستفرسات ومسيات جياعي  
صكن عليه ومزعن عنه الالباس  
يشل دمه مع طمان ورفاعي  
لين اودعن ثربه برجليه ينحاس  
عند الضواري راح ماله شفاعي  
يا أهل النضا باللي على كوار جلاس  
بتر الفخوذ مذلقات السماعي  
شعل مواشعهن مثل شاهي الكاس  
مدربات بالسهل والجراعي  
اليا سرين مع صحصح ثقل قرطاس  
مع عرضة الزيزي يجيه الجلاعي  
ريضوا لعله ما يريضكم الباس  
عوجوا لي ارقاب النضا بالوقاعي  
وشيلوا وصاتي للغضي عذب الاجناس  
اللي مع المرسال وصله جزاعي

لا جيتوا المجمول مذقوق الالعاس  
 مدملج العضدين زين الذراعي  
 قولو تراها قطعت عنها الارماس  
 يطوى العزا وأنا كلامي وداعي  
 من باعني بعته وأنا قاسي الباس  
 حتى واصد بناظري لا يراعي  
 لو أن كبدي كنها فوق محماس  
 عزمي قوي مانا خطات الزعاعي  
 ياعين هاتي واطوي الصبر والياس  
 معطيك مهلة دامننا بالساعاي  
 اطوي عزاك وترسي كل هوجاس  
 ما ظنتي عقب الفراق اجتماعي  
 طبعاً خلاص يأس منها وهذا هو يقول "من باعني بعته وأنا قاسي الباس"  
 وهذا النوع من الغزل العفيف اللي مافيه تعدي وفيه عبرة وفيه وصف وحفظ  
 للألفاظ الطيبة والكلمات العربية هو المطلوب والمرغوب.





## الريح تنقل الرسالة

الشاعر ياجماعة تراه رقيق الاحساس ومرهف الحس، لو يمر خمسة والا ستة رجاجيل من بينهم شاعر والا شاعرين مع سوق وشافوا لهم مثلاً بنت تطل عليهم مع جدار والا مع دريشة الشعار تصيبهم النظرة ويتغزلون ويقولون شعر رقيق وجميل بس هاه شعر عفيف نظيف ترى وانا اقصد من هالبنات الي اعمارهم فوق عشر سنين بشوي ربما يجي بينهم بنية عليها ثوب خلق وجبهتها جايها طين وشعرها منفش مكد بالخليل ناشين فيه عودان منا ومنا بنت فلاليح مثلاً والى مروا رجال تستحي وتصد ورا اخوانها توزى من ورا كتف واحد من اخوانها يصير اما اقصر منها او اطول منها توزا من وراه علشان الرجال ما يشوفونها لانها تستحي هذي هي الي دايماً تصير اكثر الاحيان ملامحها جميلة، العين وسيعه الخشم صغير والمبسم يالله تدخل معها العنبة الحاصل انها تصير جميلة وتصير دايماً مثل جنيه بخلق ولو انها في هالتياب الي ماهيب زينة ومشتفه وحافيه ولا في يديها مشق هذي ابد الى منها فزت وكبرت تزينت وغسلت وجاها الماء والشامبو والطيب طلعت ما تصير جنيه في خلق تصير وردة، فدايماً العاشقين والشعراء يشوفون ويعشق الواحد منهم من اول نظرة واحد منهم لا، كود يروح وبطالع ويقعد ويسولف ويشوف ويالله يعشق، حتى العميان يعشقون باللمس وبالصوت، العميان اما يلمس او يعشق بالصوت هماهم يقولون الاذن تعشق قبل العين احياناً.

هالشاعر الي ابتكلم عنه هذا يختلف عنهم هذا الشاعر من الشعراء الاعلام البارزين المعروفين بمنطقة الاحساء اسمه محمد بن مسلم يرجحون الرواة ان وفاته

كانت في عام ١٢٨٠هـ كان يعشق او يحب ولا ادري عنه ترا ما حد يدري عنه الا الى بينت القصيدة يقولون انه عشق وحب هاك الوحدة اسمها لطيفة واسم الدلع او اسم التصغير لطوف فيقول يعني دايم يتلمس اخبارها، اهلها وين يروحون يحاول يرضي ابوها يرضي اخوانها اقاربها ودايم يتلمس الاخبار يزورهم في نخلهم يقعد عندهم ويتقهوى عندهم حتى لو صار شاهيهم مر يصير حالي عنده، لانه عاشق، يجي عندهم ويتردد عليهم ويسير عليهم حتى لو كان مهوب وقت مسيار يسير ويحاول انه يكون خفيف دم وخفيف ظل عندهم ويسولف واذا طلوعوا مثلاً للبر طلع وحاول انه يصير قريب منهم كله يبي يتلمس وش الاخبار عن ذا البنت عزموا مثلاً بعرس حتى لو ماله في العرس سنع راح يعني يصير حول اهل المعرس او اهل العروس او انه يحضر العرس وخاصة اذا صار في قرية يعني كل يحضر العزيمة تصوير عامه مطلقة للناس ودايماً العرس هو المكان الي يتجمعون فيه الناس وخاصة النسوان هالحين مثلاً الحرمة او العجوز الي عندها عيال خمسة او ستة واعرس منهم اربعة وباقي ثنين ابد تلقاها في العروس قبل تلمس تشوف وتنشد من هالبنات بنات الفلان او بنات الفلان وتطالع ويوصونها عيالها والي قالت لحدنا عيالها اعرس يا ولدي قال لا روحي شوفي تلمسي كود تلقين لي وحدة تناسب تروح وتشوف هالبنات المصلحة تسأل امها هي متزوجة لا والله ماتزوجة ماكتب الله نصيب فدايماً العرس يجي فيه البنات اللي ما اعرسن الكبار شوي يعني بنت عانس او ماخطبت يحاولون يجمّلونها ويزينونها وتصير زينة وتصير قرية من امها او تصوير قرية من الي يرقصون حتى يمكنها تطلع ترقص مع البنات وتجوز لاخت هالي بيعرس لان خواته يحضرن العرس يشوفونها ويوصفنها له

والله ياشفناها ترقص عليها ماشاء الله شعر يقعد معها وفيها من الجمال كذا وجسمها لا هيب متينه ولا هيب نحيفه مرة ولا هيب دقيقة مرة وواحد يقول لا انا احب الي جسمها نحيف لانها بعد ما تتزوج تبني عليها الحال ويزين جسمها .

الحاصل ان ابن مسلم راح مرة معزوم بعرس والاه ملبد عارف ان لطوف هذي الي هو يحب بتجي الليلة في العرس وخابرها وموصوفة له ماشاء الله مذكورة بشعرها الجميل شعر لها مسترسل طايح طيح ومن اول كانوا الناس ما عندهم مثلاً هالزيت وهالشنبوات الي توها طالعة ذي ما عندهم هالاشياء هذي دايمًا يكدون الشعر وخاصة الاغنياء والناس الي احوالهم زينه البنت تغط المشط الخشب تلمسه بالزباد والزباد هذا نوع من الطيب كان يجي من الهند او مادري والله من وين يجي او من جهة عمان و يجي في قرن يسمونه قرن الفيل قرن كبير فاضي يعبون به الزباد على شان لو طاح القرن ما ينكسر والزباد يجي من نوع الكريم يبدو انه مثلاً عود مطحون مضاف له عنبر وعليه دهن عود طيب وورد المهم انه اذا البنت اخذت منه وحطته بشعرها وكذته يطلع له ريحة تهبل واللي فيه وما فيه يعني مثلاً قلبه سفنج اذا شم الريحة ذي يروح ملح لا ويمشي ويصير خشمه كنة مكسة كهرب .

المهم ان ابن مسلم دارى انها بتجي للعرس ، فهذولا جو مجموعة من ضمن المعازيم في هالعرس ومن ضمن هالمجموعة عايلة البنت كل البني المعزومات بهالزواج يتكددون ويلبسون من هالثياب الزينة الي فيها الزري والجدايل الي من اول تحط احياناً عشر عمايل هنا وثمان ورا والا ثمان من الجنب منا ومنا وعشر ورا جدائل دقيقة واحيان يخلون الشعر جديلتين عبارة عن جديلتين جبرات يجن

من قدام والشعر الى صار وافي وصار جديلتين واسود يصير شي عجيب  
ويحطون لها قصة وقذلة والاولين يقصون قصة خفيفة مع الجدائل الي قدام  
فهاالبت هذي لطوف جاية من ضمن المعازيم الي جاين للعرس وابن مسلم  
خابرن شعرها ويمكن انها تطلع تبي تلعب مع الي يلعبون او الي يرقصون فالرجال  
مثل مانتقول متجمعين بصالة ووجه الصالة او وجه هالديوانية مفتوح فالهواء  
الشمالي هذا الي صار فيه طيب او بخور او ريحة يبي يدفه لجهة الجنوب اذا صار  
فيه هواء فمن الصدفة هاك اليوم انه تجمع الرجال في الجهة الجنوبية كلهم ولهذا  
ابن مسلم اللي قاعد في طرف المجلس هو اول واحد من جهة الشمال يتلمس  
ويتحرى، والرجال يوحون حس الحريم وهم يغنون ويهلون ويرحبون والحريم  
من الجهة الشمالية.

عقب ماتعشوا وسرى الليل صار فيه رقص ويوم فاحت ريحة هالطيب وهو  
ابن مسلم يعني يخبر ويعرف الطيب الزين ويعرف الطيب الي تطيب منه لطوف  
وتكدد فيه، والله واشتاق وشم الريحة العطرة الزينة وجازت له فالشاعر محمد  
بن مسلم عقب ماطلع من الزواج هذا متأثر بهالريحة ريحة هالزباد اللي فاح عليه  
حتى يقولون عطس خمس مرات في هاك العرس من شدة اشتياقه لهالريحة  
ودمعت عيونه من الفرحة واستانس.

عاد قال القصيدة الغزلية هذي عقب يومين او ثلاث كذا نظم هالقصيدة  
والقصيدة انا اقدر اعتبرها او اسميها من قصائد الغزل بالشم، العشق يمكن ماجاه  
او ماتأثر وخلاه يقصد الا بسبب حاسة الشم وهالريحة الطيبة فيقول في مطلع  
القصيدة :

ذا مسك او عنبر تنشيت ريحه  
او ورد جوري مع الطل مقطوف  
او عشب روض عط رمله وشيحه  
او قرن عطار مع الريح مكشوف  
ان جاد هجسي والعقل بالقريحة  
انه زباد فاح من عرف لطوف  
ماجت بقذلتها وهي مستريحة  
ووافت بموجتها مع الريح عاصوف

اتصور لو تموج بقذلتها والقذلة طبعاً الى ماجت بها يقولون اللي شافوها والا  
انا مدري انها اذا ماجت بالقذلة ورجعت وجهها يرجع طبيعي مايحتاج مشط  
قال :

ماجت بقذلتها وهي مستريحة  
ووافت بموجتها مع الريح عاصوف  
عطست خمس يوم جانبي نفيحه  
والسادسة لحقت وانا طحت محذوف  
ناديت للريحة ونفسي جريحة  
والدمع بجري والقف الدمع بكفوف  
ياريح شيخ طيب الله ريحه  
الريح ما يبرد حشا قلب ملهوف

ما يرده كود العلوم الفصيححة  
 ومزت شفاه ورض جوف على جوف  
 قل له يخاف المعتلي في طريقه  
 ويروف بي يوم ابتلى مثل ما روف  
 ما تهتني نفس ونفس مشيحة  
 كان الشقا بين المحبين منصوف  
 شرواه ما يدعي محبه ذبيحة  
 ولا يبيع القرمز الزين بالصوف  
 قل له يخليني على امره منيحة  
 ما كل رجال الى فات مخلوف  
 قال الهوا حقك علي النصيحة  
 اخبره عن حالتك مثل ماشوف  
 راح يتندح بم دار المليحة  
 قال له محبك طائر القلب مشغوف  
 يصبح ويمسي في امور مشيحة  
 كنه عن المشروب والزاد مصروف

هذي قصيدة بن مسلم والقصيدة كنها مقيولة بسلاسة الفاظها وفيها هالكلام  
 الجميل ، شفتوا وش لون ارسل الهوا يبلغ الرسالة والهوا يبي يخبرها انه عن الزاد  
 والمشروب مصروف بسبب عشقه للطوف ، هذا كلام الشاعر المشهور محمد بن  
 مسلم من اهل الحسا .

## العطف والاحسان باليتامى

يوم من الايام انا رحت وصليت بمسجد بحارة شعبية جنوب مدينة الرياض  
ويوم اروح اصلي بهالمسجد ابي رجال يصلي فيه العصر قلت مانيب لاقية الا  
بهالمسجد الي حول بيته وفعلا رحت وصليت معهم والا المسجد مسجد حارة  
شعبية يصلي فيه يمكن ثلاثة صفوف صليت انا بالصف الثاني يوم صلينا تفرقوا  
الناس وشفيت ان المسجد وسيع وكبير يصلى فيه جمعة في جهة منه الجهة الشمالية  
الغربية رجل خير بن حلال اجودي وجامع أطفال يدرسههم قران وصافههم قدام  
العيبيل الصغيرين قدام هذولا هم في واجهته والي عقبههم اكبر منهم شوي  
ويحفظههم ويدرسههم جزء عم وجزء تبارك، جيت ووقفت عندهم طالعتهم كل  
واحد معه الجزء في يده كاتب اسميههم ويتفقدهم وحاطهم في بيان ويشجعهم  
الي يشوفه مثلا حافظ يعطيه يدله جائزة والا يعطيه شي فالحقيقة سرني هالشئ  
هذا وقلت الله يكثر من أمثالهم.

لاحظت من بين الطلاب واحد يعني شكله يبدو كنه مايشوف يسمع ويحفظ  
هالطالب هذا صغير عمره يمكن تسع سنين ومحلوق على الصفر وملبسينه اهله  
طاقيه وهذا هو قاعد وشكله مؤدب بالخليل وهادئ كنه مالك الحزين في قعدته  
ماقعد جنب الطلاب لا متشطر عنهم شوي طلعت انا برا مع الباب الشمالي، يوم  
طلعت والا فيه مثل ماتقول كرسي خشب طويل قاعد عليه هاك الشايب، شايب  
عمره يمكن من خمس وسبعين الى ثمان وسبعين وفوق كذا منلغف وجهه ولا  
عليه لحم لكن عليه شماغ، رجال ولحية غائمة واجودي وبن حلال ويبدو عليه

سيما الخير لحيته محنيها وعنده له وليد صغير يعني مثل اللي موزيه وناشب في  
حلقة ابي ومدري وش يبي منه وهو يقول له رح وانا ابوك رح اقعد مع اخوك رح  
اجلس معهم رح اقعد، يهاديه جيت انا وقعدت جنبه مساك الله بالخير ياعم قال  
ياهلا وشلونك طيبين قعدت اسأل واسولف انا وياه شوي، هاه شوي وطلع  
الوليد الي هو مايشوف زين الي شوفه قليل طلع يشرب من البرادة الي برا ورجع  
قال شف اخوك طلع يشرب رح معه، يقول له الشايب.

سألته انا قلت هذولا عيالك ياعم قال لا هذولا ماهم بعيالي انا جدهم  
هذولا عيال بتي ابوهم الله المستعان توفي بحادث مبطن والعيال هذولي طلعا  
شبه يتامي لأن اليتيم اكثر شي فقيد الاب وهذولي عيالي يعني كنهم عيالي انا  
جدهم الاحظهم واجيبهم في المسجد جايبهم ادرسهم بس هاليوم كنه مستعصي  
على الدراسة يعاني هالصغير الي عنده وهذا اخوه الي دخل تو هذك محمد وهذا  
عبدالله والاهم عنده يداريهم ويطالع خاطرهم هالشايب ويمسح على روسهم  
لكن حتى هالصغير الي عنده حلاقتة مثل حلاقة ذاك محلوقين على الصفر لكن  
الي حلقهم ما احسن حلاقتهم حالق بس علو الشعر الفوقي ومخلي الي من يم  
الاذان يعني ماتقصى عليهم بالحيل مدري الظاهر ان الحلاق مطبق المثل ومتعلم  
الحلاقة بروس اليتامي قال أي والله وانا ابوك اقعد تكفى معهم والاهك اليوم  
الجو غيم وتقل برد شوي قلت ياعم الجو بارد بالحيل وانت مالبست نعال ولا  
عليك كنادر قال مناب او اوطن الكنادر وانا ابوك انغمت الى لبست الكنادر  
والشراب انا طبيعتي كذا والحين احتريهم ابودهم للبيت.

انا جلست شوي عنده وقعدنا نسولف انا وياه واعجبني ملاحظته لها لا ياتم  
لان الحقيقة في الحديث يقول ان المسحة في رأس اليتيم فيه بعدد شعر راسه من



الاجر والثواب وهذا جدهم مادامه يدرسهم وجايهم حريص عليهم يبي يطلعهم طلعة حسنة وقلت انا وراهم ماراحوا لامهم منتب تقول امهم متزوجة قال اي بالله امهم قعدت فترة وتزوجت لكن الرجال الي اخذ امهم مايبي العيال هذولي وقمت انا وضميتهم وخليتهم عندي قلت وش السبب قال ان زوجها الي اخذها قد اخذ حرمة قبل وجابت منه بنت والبنت عنده بالبيت والبنت كنها صلفة شوي على العيال هذولي توذيههم تغتهم خاصة الاعيمي هذا قبلها تمهص اذانه وتقبصهم مايرتاحون عند هالبنت هذي ويتلاجون وهم عندي اكثر شي وانا بعد ودي اني انا اربيههم تربية حسنة انا لاعندي عيال صغار وهذولي كنهم عيالي وانا جدهم قلت جزاك الله خير اي والله هذا عمل طيب بها لاطفال قمنا نسولف .

ومضت الايام وعقب فترة انا لاحظت ان فيه مثل هالحرمة هذي الي تصير مثلا مطلقة وعندها عيال ولا اتبيح بسدها لاحد ولا تعلم به احد وياما ياما كثر هذي من الستيرات الي مايبينون حتى لا قاربهم مايبينون شي الله من وحدة ميت زوجها وعندها اطفال وفي حالة قصا وش تعبر به ماتعبر الا تطلب الله لهم بالهداية تطلب الله لهم بالرزق فعمل الخير في هالامور هذي شي طيب وانا قعدت لي مدة عقب فترة او عقبها بايام بسيطة والا هو واصلنا عيد رمضان .

تلاقيت باحد الشعراء الي انا اعرفهم انا قال لي بعد ماسلمنا على بعض ان فلان شايفك بالمسجد الفلاني وش مروحك ، علمته قلت له اني كنت ادور فلان واني قابلت الشايب وصفت له المشهد اللي انا شفت ، قلت له كل شي وقلت له اني صليت بالمسجد لقيت واحد يدرس العيال ويحفظهم وطلعت برا ولقيت هاك الشايب الي يبدو عليه سيما الخير في وجهه وعليه هاك الشماع والبشت الخفيف

المكسر الي مافيه زري واجد ومعه عييل صغيرين وحيد منهم قليل شوف وواحد  
تقريبا عمره ثمان سنين والثاني تسع سنين او عشر وقمت اوصف له قال لي بس  
بس يامحمد تراك كسرت قلبي كني اشوفهم انا هالحين هاليتامى .

عقبها بيومين او ثلاثة اتوافق انا وياه في صلاة العيد في مسجد بشمال  
الرياض وطبعا شمال الرياض كل الي فيها اكثرهم اغنياء ومطخطين وبخير قمنا  
نسولف انا وياه يوم العيد ونطالع هالشباب قال شف وشلون هالكاشخين  
بهاللبس وطالع هالولد هذا الحين وش تتوقع ثوبه بكم وهذا تتوقع ثوبه بكم  
واهلهم اغنياء بس عساهم ان شاء الله يلففون بحال هاليتامى وبحال الناس  
المعوزين ولا ينسونهم لان الحقيقة الي يبي يلبس ويكشخ في ايام العيد وينسى بعد  
الي من اهل بلده ومن اهل جلدته وهم في حالة معوزة والا في حالة فقر الله اللي  
قدر عليه وحاله مايدرا عنها منسترة والله من شايب مثل هالشايب الي انا شفت  
الي مايتحمل البرد واموره ضعيفة فياما وياما كثره في الديرة بس مايبينون لاحد  
فيقول عاد الله من شايب والله من عجوز والله من ام يتامى في مثل هالنوع  
ولاتين لاحد ولاتين لا قرب احد .

المهم جا بيعزمني قلت له ان شاء الله نتلاقى ، بعد يومين او ثلاثة فعلا تلاقينا  
يوم تلاقينا قال لي شفت المنظر الي وصفت لي عند المسجد قلت نعم والمنظر الي  
ابقولك قال هاه وصغته في هالايات الي ابسمعك الان قلت سمعني الايات  
هذا الشاعر الي انا قابلته اسمه عبدالعزيز بن محمد الماضي من فروع غميم من  
اهالي روضة سدير من امراء روضة سدير هم ومن العهد القديم امراء هالديرة الي

هي روضة سدير والامارة متأصلة فيهم والشاعر اسمه عبدالعزيز بن محمد  
الماضي ويلقبونه ابو محمد فاعجبنتني الحقيقة ابياته فقلت انقلها لكم لعل ان  
شاء الله ان فيها فائدة وهي جيدة وتستاهل الحفظ ويقول في القصيدة :

ياهل الثياب الفاخرات النمونة  
الغاليات اسعارها مالها حد  
من كل خياط تلقف زبونه  
ياخذ له المقياس ضبط على القد  
الى لبس ثوبه وزرر زبونه  
ماعاد يدري لو يجي بردها صرد  
تذكروا ربع يبون المعونة  
في حالة يعلم بها الواحد الفرد  
الله من عود تقارش سنونه  
حاله نحيل والزمن هارده هرد  
يمض الدجى ماهيب تمرح عيونه  
من الوجع والجوع والخوف والبرد  
يكف دمه عن صغار يرونة  
بحل بهم من قل ماتملك اليد  
وكم جادل عريية اصلن مصونه  
تعبيرها دمع تهله على الخد

وكم من يتامى في ذرى ام حنونة  
 ما بيحت لاقرب قريب لها سد  
 ماودي اشرح خاطر تفهمونه  
 وانتم هل العادات جد بلشر جد  
 الخير يا هل الخير يالي تبونه  
 تكفون فزعتكم تغيثون ملتد  
 والله يعوض كل ما تبذلونه  
 ترا الثواب بشية الله بلا عد

هذي قصيدة عبدالعزيز الماضي والحقيقة انا نستفيد من هالقصيدة بها لا يام  
 بالذات من خلال هالصور الي نشاهدها بالتلفزيون عن اخواننا المسلمين اللاجئين  
 ويتامى المسلمين في كل بلدان المسلمين يجب على كل مسلم مقتدر يمد يد العون  
 لهم وترافيه ناس ما يعلمون على انفسهم يستحون ولا يشحذون الناس يحسبهم  
 الواحد ما يحتاجون ولكنهم في حاجة بس يستحون ما يعلمون ولا بد ان حنا  
 نتفقدهم ونشد عنهم وغمد يد العون لهم فالتأخي والترابط والتعاون بين المسلمين  
 واجب وحث عليه الدين .



## الحجة الدامغة

القصة التالية حول قوة الحجة بعض الناس عندهم قوة الحجة و ملهمين الرد والاقناع ولا اقصد الملوثنين اللي بس ما همهم الا المجادل والمغالط لا اقصد اللي فاهمين وعارفين وعندهم الحجة اللي يقنعون الناس فيها واعطاهم الله حسن الفهم والادراك وسرعة البديهة .

هذا واحد من اهل شقرا وهي عاصمة الوشم واهل شقرا مشهورين بالقصص الذرية والطريقة والنكت وسرعة البديهة ، هذا واحد من اعيان شقرا شخص كريم وفاضل وصاحب علم ومنطق طيب رحمة الله عليه واقواله تتناقل بين الناس من حسن منطق و حجته الدامغة ، هذا الشخص اسمه عبد الله ابو عباة ، وهالسالفه عن المسجد اللي عندهم في سوقهم مسجد صغير تعرفون المسجد بالعادة فيه خلوة تحت السرحة وتلقى بالمسجد العمدان واجد لان الخشب ماهوب طوال والعمدان تكثر لو يتوزى عنك واحد بين هالعمدان ماشفته ولو هو قريب ، هالمسجد يصلي فيه اربعة صفوف والمسجد طين معروف وله سرحة مفروشة وفرشتها بحص وفي السرحة حصاة بالوسط تسمى الشاخص يوقت عليها المذن دخول الوقت الشاخص مع الشمس والظل يحدد مواعيد الاذان والمسجد مثل كل المساجد له منارة في شرقي المسجد وجنبها حجارة مبنية صغيرة بس مالها الا جدارين مع جدران المنارة ولها بويب خشب عليه سبيت ومجرى صغير وللحجرة دريشة صغيرة وكل مساحتها ماتحي مترين بمترين .

وش في هالحجيرة فيها يحط تمر الصوم كل يوم يطلع المذن منه شوي مفتاحها معه وفيها الودك حق سراج المسجد وفيها محجان سبير ويوم جا مرة من المرات جو ناس واجد يمكن انهم جنب لعرس عند ناس وصلوا في المسجد وامتلا المسجد حتى انه ماخذهم بعضهم طالعة رجليه برا المسجد هاه والى ابو عباة له ذوق وهو رجل له نظرة وهيبة وطيب ويقدر الناس وله كلمته ورايه بين الجماعة الحاصل طالع ابو عباة عقب مارا حوا الناس دز باب الغريفة وشاف مافيه شي يسوى هاه نادى المذن وسأله قال هالغريفة وش فيها قال فيها الودك قال وبعد قال والمحجان وتمر الصوم قال ابو عباة بس انا اشوف ان مالها سنح بس مضيق المسجد وانت خاير المسجد يضيق بالناس بعض المرات تخبر يجي جنب ويجي ضيوف واجد ولا لها سنح الودك خله عندك والى جت حاجته تجيب منه شوي والتمر اصلا من يوم يجي مسيان وهو على طول ياكلونه الصوم خله عندك في البيت، قال المذن انا ما عندي سنح رح حاك الامام.

المهم ابو عباة جمع كبار الجماعة وقال يا جماعة الموضوع كذا وكذا وانقسموا قسمين احد يقولون فعلا ماللحجيرة سنح وناس يقولون لا مهمة وتحفظ حلال المسجد، المهم، صار فيه عرس لربع لا ابو عباة حول بيتهم وجاي جنب لها العرس براق ابو عباة وفكر ولا عليه من احد وهو يتحمد من ابصاره والى عنده هكالعتلة تحسن تحسين ولا هيب طويلة مرة والى عنده بعد مسحاة وفاروع وزبيل.

يوم من الايام الفجر جا ولا شاوور احد قم وطق اسفل عتبة البويب وصاير الباب والى الباب طايح وطق الدريشة والى ماتبي شي طقة وحدة والا هي طايحة قام ونفضها وسندها على جنب هاه بقي الطمام قام وقض الجدران ما بين شي

طاحت ومعها طاح الطعام كله اثل وخشيبات صغار قام عليهن وطققهن على وحدة وحدة وسندهن والبويب سنده واللبن طققه ونظفه وطالع برا المسجد ولقى له مطمئ بالشارع قال هاه ما له الا هاللبن، شال اللبـن بالزبيل اللي عنده وقضاض الحجيرة ودفن المظمن ورجع للمسجد ونظف المكان ولا كن شي صار ورجع البحص وواساه، اذن الظهر وبدو الجماعة يجون للمسجد وصاروا قسمين ناس يقولون ايه تو ماستاسع المسجد وصار ياخذنا أي بالله هذا الشغل العدل الله يعافي اللي سواء وناس يقولون وش ذا من الي قض الحجيرة ما دافع الله كان اعظم حسبي الله عليه المهم انقسموا برايهم ويوم جت صلاة العصر راح واحد اسيدو راس راح ونقط في اذن الامام والى الامام رجال كبير يتضوكن وكايد رايه له هيبة والامام عاتده يدخل مع الباب الغربي من عند المحراب رجال كبير وتعوره رجله راح هاسيدو الراس وقال مسيك بالخير يابو عبدالله قال هلا قال انت دريت عن المسجد وش سوى فيه ابو عباة قضه من شرق والحجيرة قضها هو شاوركم قال لا بالله ماشاورنا قال ترا عاد انا ابراي لله وطلع المهم قال الامام وين ابو عباة، ابو عباة دارى ان به من يبي يجي ويحاكيه عن سواته في المسجد قاعد معه مهفته وماد رجله حاظ رجل على رجل ويرم هالمهفة واكثر الناس قد راح من المسجد والى هذا الامام المطوع يوم اقبل يتضوكن يوم وصله الامام وهو متولم للهوش قال: عبد الله قال خير قال وش الله سلطك على حجرة المسجد يوم تقضها وانت عارف وش نخط فيها انت مشاورنا، قال ابو عباة مالها سنح قد شاورت الجماعة ولالها سنح مرة مالها سنح مضيقه وش فيها؟ التمر ويوكل على طول والودك يخليه المذن عنده في البيت الثانية استامعت السرحة شف وش لون

صارت ، قال المطوع الله واكبر يا عبد الله هالحين كل اللي في المسجد من الجماعة  
ماشافوا انها مضيقه الا انت قال نعم هالحين شف الهلال بعد ما يشوفه الا واحد  
ويصوم الناس كلهم يعني وش ذنبي انا الى ماعرفوا الناس ، شفتوا حكمته وحجته .

هالسالفه ذكرتني بايات قالها الشاعر الكبير رشيد الزلامي يقول :

اذا جهلت انشد ترا مابها عيب  
لاتنخدع للجهل وانت السبايب

عيب الفتى ما فيه شك ولا ريب  
ترك الفروض وقطع وصل القراب

والعيب ترك ملزمات المواجيب  
وتبع الردى ومجالسة كل خايب

والتجربة برهان ما فيه تكذيب  
اذا جهلت انشد من القوم شايب

بيض النواصي حجته كلها شيب  
من كثر ما مرت عليه المصايب

ولا قول يوجد شايب يعلم الغيب  
الغيب يعلم به مدير الهبايب

لاشك يوجد شايب له تجاريب  
ومن الفكر شاف الدهر والعجايب

قد صارع الدنيا على الخبث والطيب  
فالفصوص والا فوق عوص النجايب



## بكاء الأب على ابنه

قصيدة الرثاء اللي ابذكرها هي للشاعر العلم البارز المعروف الشاعر سليمان بن مشاري بن علي الناصري التميمي من النواصر من تميم من اهل الداخلة من اقليم سدير توفي رحمة الله عليه عام ١٣٨٩ هـ، ويذكر في القصيدة هذي (قصيدة الرثاء) اللي ابجيب بعضها لان القصيدة طويلة يذكر أن ولده عبدالرحمن راح مع جيش بن سعود يوم غزا اليمن هذاك الحين عام ١٣٤٩ هـ واستشهد وكل ما جوا في مكان ارسل لأبوه رسالة وصلنا للمكان الفلاني ويوصف له المكان الديرة الفلانية ولقينا فيها فلان وشفنا النخل الفلاني والشعيب الفلاني والمكتوب هذا يبطي ما يوصل يتأخر يقعد شهر أو شهرين ما يوصل لأنه من يد واحد في يد واحد إلين يوصل ولهذا تلاحظون بعض المكاتيب الأولى إذا جا المكتوب وإلى في وسطه مكتوب لواحد ثاني وتغدي بعض المكاتيب على متن البيز من كثر المكاتيب اللي فيها وتعليقات السلام اللي على الظرف في جنوبه يمين ويسار وفيه مثل يقول "علم الشر ما هنا أبرك منه" هالحين هو يوم يروح الأخبار هذي اللي يرسلها لأبوه تبطي ما توصل لكن يوم أنه مات ثاني يوم والخبر واصل لأبوه فيذكر هذا عاد بالقصيدة والحقيقة بعد من ضمن القصيدة كان يتشره على واحد في الحملة وراه ما علمه لأنه ما درى إلا بواسطة قائد الحملة بعد ما مضى فترة أو أنه متشره على اللي معه في الحملة وراه ما عزاه أو شئ من هالقبيل وهذاك رايح معه في المغزا والأبيات واضحة وفيها موعظة والرثاء باب من أبواب الشعر يقول فيها:

الله من علم دهاني  
مناب في خير من جاني  
أول علم طرق سمعي  
في خط أحمد الفوزاني  
يذكر خط داخل خطه  
جامن بكر بن سحمان  
غدا القلب مصاب عقبه  
باليته خط ماجاني  
ما تجرا يخبرني به  
إلا بكر بن سحمان  
يقول أن ابنك توفي  
واصبر والله المستعاني  
وصبر نفسك واترك ذكره  
واعص نفسك والشيطان  
ولو هو حي وجال فيها  
قلت وقلنا الجالي فاني  
وخبير موته ما كتبت  
خرابيط ابو سعيفاني  
وقرئته وإلى ويش اقرا  
الدواهي والأحزانني

مع اني من شوفه ميس  
 من قبل تعاد الابداني  
 انا في القطب الشمالي  
 وهو في القطب اليماني  
 واشوف اني عقب موته  
 من طمان في طماني  
 ما سويتا ياكتابه  
 خير فابوه سليمان  
 محال اني ماذكر يومه  
 بيوم معلوم الا ابكاني  
 ماعاتب الله نبيه  
 يعقوب بطول الاحزاني  
 على ولده يوم فقده  
 بنى بيت للاحزاني  
 الا اخبر عنه انه كاظم  
 وائنى عليه القرآني  
 عسى ديرة توفى  
 فيها ابني عبد الرحمان  
 عساها الا موضع قبره  
 يرقص فيها الف شيطاني

من حر ما يونس والا هو طيب وخير ويدعي للناس كلهم ويقول:

علم بالخير يتأخر

وعلم الشر اسرع ماجاني

وش فرق المكتوب الاول

من فرق المكتوب الثاني

انا باجلس واتمنى

لو ما تفيد التمني

ان الله يسـئـل قبره

ما تهدم له بنياني

سلامي يا من تغرب

غربتين في زماني

غربة رجا منها يرجع

وغربة فنا منها فاني

\*\*\*\*\*

ولا عمره يوم تغرب

ما تعدى ذا المكاني

سلامي يا من تولع

بالاسفار ويومه داني

كنه يطلب له زعيمة  
مطالعها مع سرقاني  
وهيمنية داعيته  
ولا له عنها تواني  
يطلب رزق مقسوم له  
ومكتوب له بالضماني  
هذا من الله واخذه الله  
واليقين من الايماني  
وانا ماجزع واتسخط  
والاخاذ اللي عطاني  
التجزع والتسخط  
في الحديث من الشيطاني  
وليته مات وموته عندي  
مات بقلايع ودراني  
عسى اللي ماجزع لموته  
هو جايمي وعزاني  
وانا اعرفه ويعرفني  
لكن ما عنده في شاني

تحل بساحاته دهيا  
بمصيبة حبيب دانى

\*\*\*\*\*

ويبي ياخذ الله خذه  
ولو طال به الزمانى  
هذا باب كل يدخل  
معه من انس ومن جاني

هذا باب ماخص احد  
به دون فلان وفلانى

كل يعرف انه واضح  
وهو الطريق السلطاني

هذا الموت اللي تواست  
فيه العانة والاعيانى

هذا الموت اللي ذلت له  
هاخليقه بالاذعانى

هذا الموت اللي ماعنده  
لا في العالى ولا الدانى

هذا الموت اللي ماتاقف  
دونه نواب السلطانى

هذا الموت اللي مايرحم  
طفل ولا شيخ فاني  
هذا الموت اللي ماخلي  
راع الحن وراع الخاني  
هذا الموت اللي ما ياخذ  
فيمن ياخذ زود اثماني  
هذا الموت اللي لو فته  
وخليته خلفي لاقاني

\*\*\*\*\*

قل هذا الموت الموكل  
يفني العالم الانساني  
وفي برها وفي بحرها  
من وحوش ومن حيتاني  
ومن به روح فهو رايح  
الفوقاني والتحتاني  
وقول الله ابلغ من قلبي  
كل من عليها فاني  
والله لولا سورة عما  
مع تبارك والرحمن

وسورة طه والم نشرح  
لك صدرك والفرقاني  
لابندفاعلا طويلة  
صوت تسمعه الاذهاني  
وارفع صوتي وابرد جاشي  
في ظني ماحد خطاني  
وانادي ثم انادي  
وانا في ارفع مكاني  
يا قبر ياللي في صبيا  
سر باذن الله البلداني  
بلدان في نجد مريفة  
امان ودين ورجعاني  
غريب مات بوطنكم  
دينه من خير الادبياني  
على مذهب ابن حنبل  
وعبد الحليم الحراني  
هاللي جاكم سنة تسعة  
واربعين من الزماني  
والف وثلاثمئة حجة  
لهجرة سيد المعدناني



يالي عنده يوم تحشرق  
نفسه بالله هو ما طراني  
هو ما قال والله يابولي  
من يشوفه هو واخواني

\*\*\*\*\*

ليتي عنده يوم يفسل  
ويدرجونه بالاكفاني  
ابلثم عينه وخشمه  
والثم شفته تشفاني  
وليتي عنده يوم يجهز  
على منجور العيداني  
وليتي عنده يوم اموله  
صلاة من غير آذاني  
وقوف مافيها ركوع  
ولا سجود بالاذقاني  
الا دعاء يدعونه  
للميت كآين من كاني  
وليتي عنده يوم اقفوا به  
للقبر شيب وشباني

ليتي عنده يوم ينزل  
 في الملحود ابا الديداني  
 وليتي يوم تهائل  
 عليه الترب البناني  
 وليتي عنده يوم توقف  
 عليه النصيباتاني  
 ان كان اباقف وادعوله  
 بالثبات من الفتاني  
 في الحديث ادعوا لاختيكم  
 فانه يسال الانبي  
 وعنه صلى الله عليه  
 وسلم في الحديث الثاني  
 انه يسمع في لحده  
 من فوقه وقع الحذياني


\*\*\*\*\*

ولا شفته من تغرب  
 الا حلم ما هناني  
 ليل وانا دهش الخاطر  
 بين الناييم واليقضاني

عسى ربي يجمعني به  
في الجنة مع الولداني  
وعسى له مع ما أتمنى  
جنى الجنتين داني  
وعساه مقرب فيها  
مع من في روح وريحاني  
وترفع له رايات البشرى  
في يوم المعاد الثاني  
ويافد في الوفد الفايز  
بالحسنى وفد الرحماني  
منتهاهم باب الجنة  
يتنون اذن من رضواني

هذا جزء من القصيدة والحقيقة هذي من المراثيات الجميلة والمؤثرة في النفس  
مرثية صرخة ألم من والد على ولده وبين فيها سنة وفاته ووينه متوفي فيه ويدعي  
له وللمسلمين والله يقبل دعاه ودعاء كل مسلم .





## وصية الاب لابنه

فيه واحد من الشعراء له عيال وينصحهم بقصيدة والعيال يسمونهم أول غوش إلى صاروا أربعة أو خمسة وهم صغيرين متوالين وري بعض ، ففيه قصيدة جيدة للشاعر المعروف شاعر الكويت مرشد بن سعد البذال الرشدي يسند على ولد له اسمه عبدالله ويصغره ويسميه عبید وهو تراه كيف وبني بين من القصيدة ، والشاعر يقصد بالقصيدة هذي ان ينصحه وينبهه على عدة حاجات ويعلمه فيها طبعاً يشرح أول شيء بقوله انتبه وأنا أبوك واحذر من النيمة والغيبة فعلا الصغير ودك تعلمه من الصغر يحذر من الغيبة والنيمة أو أنه ينقل الكلام ولا تشجعه الى جا وقال يا بوي فلان قال وفلان قال ، ثاني شيء القصيدة تعلمه احترام الناس واللي هم اكبر منه وعلى انه يعطي الناس حقوقهم ولا ياكل حلال احد وباقي القيم والمثل والسلوم اللي حث عليها ديننا الحنيف فهالأبيات هذي يقول فيها:

يا لله يا رب الضعوف المساكين

يا للي لك المخلوق يحسن صلاته

تستر على غوش صغار مكفين

أكبرهم العارف دليه عصاته

لا يا عيالي كل أبوكم حبيبين

عندي وعند الناس كل وذاته

عندي غلامك يدفن الزين والشين  
وعند العرب كل تشاف خملاته  
يا عبيد أنا خابرك ورع لهالحين  
داو بغبات الجهل وظلماته  
لا شك علمي لك محبة وتفطين  
تسمع الوالد وثبت وصاته  
يا عبيد أنا بوصيك مني بثنتين  
ثنتين هن سو البشر وحسناته  
انذكرك لا تبث سدود المغيبين  
لاتجهر اللي غارق بغفلاته  
تري النميمة تمحق الرزق والدين  
والمنزلة العالي تهدم طبقاته  
لا تحسب أن أهل الظليمة بخيتين  
كل يوافق ما عمل في وفاته  
وانذكرك عن حق الضعيف المسيكين  
اللي على حقه يهل عبراته  
ترا الضعيف لا غدا الليل ليلين  
يدعي وعند الله توافق دعاه  
الظلم فان الظلم يفنى السلاطين  
ياويل راع الظلم من مقبلاته

وانذرك عن ربعة رخوم هياسين  
 اللي سوالفهم بوده وهاته  
 يا عبید الأقشر لو صفى لك نهارين  
 نهار ثالث جاك يرفع قناته  
 والله يا عندي ربعة الناس الاقصين  
 ولا صديق يبلشك في حياته  
 ترى الرجال بهم فهود وحياوين  
 جاك الكلام اللي صحيح ثباته  
 وإن كان ما تدري ترى الناس دارين  
 الرجل مدحه بالمجالس طراته  
 رجل تعلق به رجال مسمين  
 عز الرفيق ولا بته ولحاته  
 ورجل تشوفه جسم وعيون ويدين  
 ولولا الشعر ما تفرقه عن خواته  
 كم واحد في البيت يضرب بسفين  
 وإن جا حزم كلاب يكبع عباته  
 والحلم عند الغيظ ينحى الشياطين  
 يكفيك شر ابليس هو ودحراته

هذي هي قصيدة مرشد بن سعد البذال الرشيدى اللي يسند فيها على ولده  
 عبید ومليئة بالحكمة والنصيحة وإن شاء الله أن فيها فائدة .

وفيه قصيدة ثانية مثل الموضع هذي للشاعر إبراهيم بن زيد المزيدي من شعراء نجد توفي رحمة الله عليه عمره تجاوز المية بستين - ما شاء الله - يسند على أحد أولاده اسمه فهد ويقول :

يا فهد أنا بوصيك واحرص وأنا أبوك  
 بالك تجي بين الرفاقة علاقـه  
 تراه ما ينفعك عمك ولا أخوك  
 وأن ادبرت دنيـاك سموك عاقه  
 وأن أقبلت لك رحبوا بك وحبوك  
 وسموك أبا العمرين حمـاي ساقه  
 وأن بان بك ضعف على الجال حدوك  
 سود الضماير ما عليهم شفاقه  
 خلك عزيز النفس لو كنت صعلوك  
 وإن زاد حملك حط فوقه وساقه  
 واجلس وشب النار وافرح إلى جوك  
 ربع يريدون العشا عقب فاقه  
 قلط لهم ما كان في البيت مدروك  
 واشرح خواطرهم بهرج اللباقه  
 ولا يجي عندك هواجيس وشكوك  
 والرزق له عقب الركود انطلاقه



واحذر ترافق لك حتوف بهم شوك  
مثل الدعالج بئس هاك الصداقه  
عن الصلاة الهوك وان قمت سبوك  
انذال ما يسوون موس الحلاقه  
هذي وصاتي لك وابقول مبروك  
والطير الأبرق لا يغرك زعاقه

وصاه أول شيء أنه ما دام عنده مال ترى بعض الناس ييرحبون بك بعد  
خلك عزيز النفس لو ما عندك شيء وحتى لو يصير عليك حمل حط فوقه وساقه  
الله سبحانه وتعالى يبرزك وايشا وصاه بصفة طيبة اللي هي الكرم والكرم  
يسمونه ألرجا جيل مدفن العيوب وفي المثل "الظفر منجى والكريم معان" الله  
سبحانه وتعالى يخلف على الكرم ما ينفق ولا يبذل شيء إلا ويخلفه عليه يقول  
"اجلس وشب النار وافرح إلى جوك" ولا تكلف نفسك قلط لهم اللي تلقاه  
"قلط لهم ما كان في البيت مدروك" "واشرح خواطرهم بهرج اللباقة" يعني  
سولف عليهم مهوب إذا جوك تكشر بوجيهم وتصدد عنهم ولا تلقيهم وجه خل  
حجاجك طلق ورحب فيهم حتى لو تصنع لا يحسون منك بشيء.





## نصيحة شاعر لشايب

هذا فيه واحد من الناس مهوب شايب مرة لا حليل عمره خمس وستين سنة في الحدود كل ما سألوه عن عمره ما يعلم ودايم أكثر الناس يكذبون في المسألة إذا سألوهم الناس كم عمرك قال وش عليكم من عمري قل خير واذكر الله أكثر الناس كذا لا جيت تسألهم عن عمارهم، هذا الرجال له بنات كبار متزوجات وعياله الأربعة الباقيين اللي متوظف واللي يدرس الحاصل مثل ما تقول أم عياله تقدم بها السن وكبرت وصارت ثقيلة في ممشها وقومتها وكل ما نشد عنها وين راحت أم عبدالله قالو ابد عند بنتها رايحة تزورها، ويسأل اليوم لها كم قالوا اليوم لها ثاني سكت وعقب يومين ثلاثة سأل وين أم عبدالله قالوا ان بنتها الثانية مضنية أو أنها حول ماتضني قال أجل يعني بتقعد لها يجي أربعين يوم عند بنتها والحقيقة يوم مل وهو يدورها وينشد عنها ولا يلقاها الحاصل ما دروا عياله إلا الرجال يترزز ويتزين وهو عاد بادية الشيب من يوم أنه صغير من يوم أنه في الثلاثين وهو بادية الشيب ابد إذا فصخ طاقينة كنه فطن طبي حتى بياضه متعدي عاد من قدام يتصبغ ويتزين ويمر على الصيدلية ويشترى ادوات الصبغ وغير من الحاجات الضرورية.

هو رجال جسمه مهوب طويل ولا قصير مربع وشاد عمره شوي ما طاح مرة الحاصل كن وده بالعرس ولا بين وصار يحكي إلى اوحى طاري العرس وإلا عزم مثلاً في عرس لبس وتكشخ وتزين وخلا السبحة معه حتى من تالي صار يلبس فتحة في يمينه ويروح يمر من باب الحريم حتى لو ما معه حريم ويقول ادخلوا

يا عيال الله يصلحكم خلوكم مع أهلكم ويحكى عند باب الحرم المهم قبله يترزز  
 في العروس ويسولف على ربهه القريين ويسأل ويشوف وأهل الديرة يعرفونه  
 وعلى كل حال البنت مهيب حاصلة له تبي شاب مثلها هو يعني وده بحرمة مثل  
 ما تقول مثل البشت اللي مصلى فيه جمعة جمعتين وصار ينشد وش السواة الحيلة  
 الدبرة قام يسأل أهل الخبرة اللي قبله من أصدقاه يعرفهم والاه يعرف له فراش في  
 مدرسة متزوج من الهند وكل ما مر من عنده قعد يسولف معه الضحى وش تقول  
 أجل يوم تروح للهند كيف لقيت الحرمة هذي في الهند قال يارجال المسألة توفيق  
 قال وش تهقى لو بغيت أروح للهند كم تبي تكلف الروحة قال يا ابن الحلال  
 المسألة توفيق لا تقعد تحسب أنا بس توفقت وإلا غيري مدري عنه واحد هالأيام  
 يوم راح وجاب له مرة وما دروا عنها إلا وهي بذمة رجل ثاني قال لا توهق إلا  
 بشيء أنت متأكد منه وخاصة الديار الأجنبية لا تقربها قال وش تهقى للرجال  
 اللي مثلي قام ذاك يحكي عليه بصوت عالي قال اقصر حسك لا يوحينا أحد خل  
 الأمور مسترة أنا رجال الله مغنيني وبخير وبصحة مثل ما تشوف ووادي على ما  
 قال أكيف طلبة هالراس في سمط هالعمر ودي أكيف راسي يعني لا أبي عيلان  
 وأبي حرمة تخدمني وحولي ودوني و ما حولنا أحد واللي حولنا ما أبيهم يقولون  
 طويل قصير زايد قاصر وحتى لو أبجيب أحد من هنا أول من بيعاندني ربعي  
 وبناتي .

قال طيب وش السواة والحيلة قال لو مثلاً أروح لمصر قال حتى مصر تبي  
 تتعب ما طلعت فيزا والغريبة اللي مهيب من ديرتك تبي توذيك لو أخذتها باكر  
 تبي تقول لك كل شوي أبزور أهلي جب خالي جب ولد عمي عطنا فيزا لولد

أخوي يبي يجي يشتغل هنا قال أبروح للأرياف قال حتى لو رحت للأرياف مهوب على كل حال هذا قام يصكك البيان في وجهه وإلا مهوب على كل حال فيه ناس يتوفقون مهوب الناس واحد قال طيب وإن بغيت أروح للشام قال حتى الشام مثل مصر أنت غديك تلتفت حولك في ديرتك يمكن الله سبحانه وتعالى يسمح أمرك هماك ما تبي عيال ولا أنت شره على الجمال مرة قال لا قال أجل عندي لك شور قال تلمس في القرايا القريبة تبي تلقى فيها يمكن وحدة مثلاً يمكن أنها تناسبك يصير عمرها اقل من عمرك بواجد .

قال والله أنك صادق وصار كل يوم يشغل هالونيت ويتزكرت ويتزين ويأخذ بشته معه ويصلي عندهم أما يصلي معهم ظهر أو عصر يوم جا هذاك اليوم وبلقى هذاك الواحد وإلى هو يحيك السالفة ويضبطها إذا بغى الشيء يكذب له كذبة مصمصمة المهم يروح ويصلي مع هذاك الواحد ويسلم عليه وكيف حالك اقلط قال الله يسلمك قال وش مزورك بهالقريبة وهذي القرية من القرايا القريبة من المدن قال أبد أنا الله يسلمك عندي لي فليلة صغيرة والفليلة حليلة وكنت أول مأجرها لشركة وهذولا الشركات غثيشين ما ودك تأجر عليهم شيء هو يحكي على الرجال اللي هو لاقاه في المسجد رفيق له من قبل المهم قال عندي فليلة ويوم أعطيها لهاالشركة ما عليها قاصر كل شيء يشتغل فيها الكهرب والماء وحماماتها وأعوذ بالله يوم طلعاوا الشركة منها والى على قولة المثل " جلد مهوب جلدك جره على الشوك " تصدق أنهم ما طلعاوا إلا بالغشاء وتأخروا علينا بالأجار وشكيتهم ثلاث مرات وما صدقت أستلم فلتني أعوذ بالله يوم أنهم عطوني اياها والى يبي لها سبابة من جديد وكهرب من جديد قمت عاد عليها الله يسلمك

وزيتها وضبطتها وصلحتها حماماتها جددناها وضربناها بوية وغدت محككة  
واما عن نفسي فابشرك أنا بخير ونعمة وأنا مانيب بحاجة أجار فطرت علي أني  
أنت خابر نبي نوسع الصدر تالي هالعمر ولا سيما الفليلة هذي قرية صايرة قرية  
من السوق أبد في مقطع الشارع من هنا هذا راعي الخضرة وفي مقطع الشارع هذا  
راعي اللحم اثنين اللي بيعونه واحد بيع بعارين وواحد بيع غنم ومن هناك خباز  
ما يتعب اللي يتزلها والصيدليات والخدمات والمسجد قريب والجامع مهوب بعيد  
عنا وفارشها ومزينها وطرت علي كود أني القى لي حرية توسع صدري أحطها  
في هالبيت قال ايه الله الله وغديك تلقى لي حرية وترى منيب مقصر معك بعد  
بيجيك شرهة بس تلمس من هنا ومن هنا .

قال أجل وسع الصدر علينا خلني أشوف إلا تدري ضاعت ولقينها قال  
كيف قال في هذا أم فلان عيال لفلان قد أخذها أبوهم على أهمهم الأوله وجابت  
ولدين والولدين يدرسون بعيد ولو تبي تكلم عيالها مهوب مخالفين أبد هم  
يدورون رجال مثلك طيب وأنت مثل ما ذكرت ما تبي عيال لا وزيادة على كذا  
تعرف تطبخ، في الطبخ مافيه مثلها وجلسوا يسولفون وقعدوا على حيلهم قال  
كيف قال تصلح القرصان رهاف كنها باغات وتضبطها وتشربها وتهذي عليها  
قرع وتهذي عليها كوسة وتضبطها وتخلي البيدجانة أربع شلخات كل شلخة في  
عريق لحالها تصفهم ابد في الطبخ مافيه مثلها وخاصة القرصان تقعد ريحة  
القرصان في يدك ثلاثة أيام ما راحت من زين طبخها وشغلها في الجريش  
والمرقوق مافيه مثلها حرمة سنعة ومدبرة وهي بعد مثل التمرة اللي طاقتها  
الشمس لا تزال طعمها فيها هي أصغر منك قال تدري بس خلاص توكل على

الله هماها راعية دين قال مرة وبس أنها أنت خابر تبي وتبي منك مطمع قال ابد  
ابد العلم عندهم الي هم يبون وابشيري لهم اللي هم يبون وعيالها ابدلهم وأول  
شيء ابشيري لعيالها سيارات وهي أبيها في هالفلة اللي عندي

. عاد هو أخذ الراي على أساس أنه يجي يأخذ الموافقة بعدين ورجع عاد  
للمدينة ولقى له رفيق ثاني من هالشعراء قام يشاوره ويحكي عليه ويعلمه ويقول  
أن المسألة كذا وكذا قال يعني كيف قال هاللي تسمع ابعرس إن الله وفق وأبجيبها  
وأحطها في هذا وأم عيالي على سنحها هي وعيالها ودبرتهم ومهيب جايتهم لكن  
هالفيلة اللي قاعدة مالها شغل ابحطها فيها قال لا تتوهق تراك شهر شهرين ثم  
تبي تنشب عمرك كل يوم عند طبيب عربي أبي غسل أبي قراية وتبي توهق خللك  
إن كان فيك زود نشاط خله يوديك للمسجد وإلا رح اعتمر اطلب الله قال يا  
رجال قل خير وإلى رفيقه شاعر وقال له الأبيات هذي :

يا طير شلوى خذ نصيحة صحيبك

تقريب خمس أبيات جملة وترتيب

يا شايب الرحمن يا كثر شيبك

قلبك شباب وراسك ابيض من الشيب

قام يتبين للمزايين عيبك

لو أنت طلق حجاج مابك عذاريب

عيبك كبر سنك معرقل نصيبك

ما يقبلنك لو نصيت الرعايب

واللي صغير سنها وش تبني بك  
تبي ولد مزيون وأنته ثقل ذيب  
الله يخلي لك رضية نسيبك  
اللي ترحب بك إلى جيت ترحيب  
طع شورها واحفظ فلوسك بجيبك  
وش لك بناس تمحنك بالمطالب  
يفرض عليك شروط من غير طبيك  
ويعذبونك بالطلبات تعذيب  
وإلى انتهيت وسلموا لك حبيبك  
وتم الفرح واستقبلوك المعازيب  
شد الرحل يا العود والله يثيبك  
وأكبر خسارة كان هو دنق الهيب  
يومين والثالث يسرب سريبك  
وتقوم كرعانك تطق العراقيب  
عود على الملك القديم وقليبك  
عساك تقنع عقب فتل الأشانيب  
وإن كان ما طاوعت ما نا طبيك  
قبلك ترى بصري جرى له عواقيب



ومعنى نصبت يعني تزينت ولبست ملابس زينة غير مفهومها عند الشباب  
اليوم طبعاً هذي قصيدة الشاعر بدر بن عواد الخويفي الحربي الشاعر المعروف اللي  
اسندها على صديقة اللي جاز له مثل قصة الرجال اللي تكلمت عنه أما بالنسبة  
لبصري الشاعر الشمري المعروف اللي عاش عمره فوق المية وودوه عياله يحجون  
به لمكة يوم يقول :

التايه اللي جاب بصري يقنه  
جدد جروح العود والعود قاضي

وهذي عاد قصة اخرى .





## الحج قديما

كان قبل حوالي سبعين ثمانين سنة الناس من اول يحجون على الابل يعني يحجون من كل جهة ومن كل فج عميق اللي يحجون من العراق والي يحجون من الكويت ومن اطراف الخليج والي يقطعون الجزيرة العربية يحجون على الابل هذولا عاد لحالهم شأنهم شان لكن اللي مثلا رحلتهم تستغرق شهر شهر ونص تقريبا من شمال المملكة وجنوبها وشرقها فيقولون اللي يروحون على الابل يتجهزون من عقب عيد رمضان على طول وياخذون وقت يودعونهم الناس ويقعدون يومين يتجهزون على هالركايب كل ذلول عليها كواجبة يعني هودج يصير فيه مثلا شايب وزوجته والا واحد معه والدته والا معه حرمة يعني يصير قيم لها لان طبعا ماتحج المرة الا بقيم فيحجون يقضبون هالدرب ويمشون على هالركايب وعاد يودعونهم اذا بغوا يمشون والي يكتب وصيته واللي يوصي ، بعضهم يرجع بعضهم مايرجع وبعضهم يمرض من اول يعني كان هكالوقت جوع وخوف وكل شي محاصرهم وحتى الى بغوا يروحون يمشون مسافة يعني زي ماتقول الى صاروا يبتلعون من قرية يمشون اللي معهم من القرية مسافة يوم لين يودعونهم عشان يتأكدون ويشوفونهم راحوا ويتزهبون ياخذون معهم زهاب يعني الاشياء الي ماتثقل عليهم كل هالاشيا كانوا يعانونها الى حد قريب ثم جا عاد وقت السيارات والحمد لله كل شي متوفر والامور ميسرة من فضل الله .

عاد انا اذكر سالفة طريفة بهالموضوع واحد هك الحين من الي يكدون سيارات الخضرة مثلا يجيب حبجب حسب المواسم يشتغل في الرياض ولكن

يجي من هالقرايا البعيدة لكن الاجا موسم الحج جميع اللي مثله ومن امثاله بهالقرايا ياخذون حجاج يصير مثل ما تقول مقال ياخذ الحجاج يوديهم ويجيبهم ويروحهم ويجيبهم المهم هاك الواحد معه وائيت ماخذ له حجاج نشاط اكثرهم شباب ماياخذ الا نشاط وهو رجال ذرب وجيد ويدل ويعرف وينخص ونشيط ولا هوب يحتاج لاي احد وكل شي يصلحه هو وهو اللي يطبخ وهو اللي يسوي القهوة ويزين كل شي وهو اللي يحججهم ويطوف بهم عشانه يدل صاحب خبرة كم مرة يروح بهم عاد الناس اول قبل ، الجهلة يضربون العبرة باللي يسرع ويرجع بدري يعني والله فلان راح بحجاج ورجع بدري يحسبون العبرة باللي يرجع مبكر مادروا ان العبرة باللي يمكنهم من انهم يؤدون مناسكهم مضبوط ويؤدون مناسكهم على الوجه المطلوب مهوب العبرة باللي يجيبهم يصفق بهم ويرجعهم بسرعة .

فواحد من هالناس يقول والله فلان رجع مبكر بيض الله وجهه اللي مهوب حاج معه لا يحج لأنه يروح سريع ويرجع بسرعة خذ هاك الحجاج مرة من المرات اكثرهم من الشباب وفيه حرمتين نشيطات يوم قضى الحج ورموا الجمرات هاك اليوم الاخير من الحج بقى عليهم الوداع قال شوفوا عاد ابوقف السيارة في ميدان العدل الوعد ميدان العدل ولا يضيع احد يالله خلوكم وراي العمر يا شامان وبسرعة ترا بيوافقكم زحمة في الوداع وهو يقوم على شماغه ويربط حزامه وحزمه وقال لهم يالله اقبضوا حزامي وامشوا هو الي يدلهم وهو عاد رجال بتره نشيط معافي وطاقيته متفهقة ورا وجايهم هو يوادع بهم قاضين شماغه منا ومنا رافعن ثوبه ثقل يقطع سيل اول ماجا جايهم داخل بهم يالله يالله بسرعة اخلصوا تراهه اللي يضيع الوعد الباب اللي دخلنا معه جايهم يتلثلمهم .

المهم يدخلون بهاك الزحمة الله يجيركم زحمة زحمة المطاف يالله يمشي ترى  
المسألة يعني لها حوالي ١٥ سنة او عشرين سنة الحاصل هذا هو يطوف بهم طواف  
الوداع ويطوفون اللهم هذا الحرم حرمك والامن امنك اعدنا اليه مرات عديدة قد  
طاف له الحين شوطين والى ذاك الرجال حريص يراكم ويراحم الناس ويؤذيهم  
وهذا شي ما الله امر به يؤذيهم ويراحم هذا ويدزك حتى ظفوره ماقصصها  
ونشيط هو متعافي بتره واذا طاحت طاقيته مع الزحمة غدا راسه لحاله عاد هو  
اصلع غاد راسه كنه لمبة سور ويراحم هالناس ويراكم .

الحاصل مرتين ثلاث وهو يراحم مر من هاك الافريقي الطويل واحد من  
هالحجاج طويل فريط كنه جذع مشبوب به من طوله الحاصل ان الافريقي معه  
منسك يقرأ الحرم حرمك الافريقي يمشي بالهون يوم دروا والا يوم اذاه نغزه من  
شاكلته مرتين ثلاث ينغزه ، الافريقي الحقيقة مرتين ثلاث ينفقه عنه ويخليه يروح  
مرتين مرة مرتين اذاه كل ساعة يجي يدحمه يوم جا هاك المرة عند حجر اسماعيل  
والى يوم اذاه والى زحمة ويوم عاد هالرجال رفيقنا متيته الشماغ وقاضبيته هذولي  
يوم جا هاك المرة ونغزه ويلتفت الافريقي والافريقي اطول منه وماشاء الله ايديه  
راهية واصابعه على كبر الموز ويقضبه مع راسه قال له حج حج هو بس قال له  
حج حج قام الافريقي وفرك راسه كربه لين صار وجهه ورا وريعه يحسبونه عود  
لهم وهماء يوم فر راسه شوي ابد مثل الي يكرب له غطا يوم كرب راسه وفره قال  
ايه لا والله اللي ابجح وحس ان عروق رقبته وعصبها تطقطق .

المهم حج وكمل حجه وراحوا يوم رجعوا للديرة يقعد له شهرين ورقبته كنها  
صاع وارمة من يوم بس فركه هاك الهامة الافريقي ، الحقيقة هذي من الاشيا الي

تصير في الحج احيانا ليش يوم تذي الرجال هذا ورا ماتصبر وش الله حادك على العجلة فالحقيقة يعني هالنقطة هذي يجب على الاخوان اللي يحجون يتبهون لا ياضيقون الناس في الحج ولا بعد يتلفظ بالفاظ بذينة لانها تنقص من أجر الحج .

الحاصل نرجع لموضوعنا الاول يوم كانوا الناس يحجون على الركائب قبل تراهم كانوا يعانون الامرين الى وصلوا للحج تنقطع ركائبيهم ينقطع عنهم الما ينقطع عنهم مثلا العيشة يرضون يوافقون حموم الان ولله الحمد توفرت الحملات توفّر كل شي ، تأمنت الوسائل الحديثة الان بالنسبة للحج تسمعون بالحملات ، والحين ولله الحمد يروح الواحد بمبلغ بسيط مايقعد خمسة ايام بس بالكثير اسبوع وهو راجع كل شي مأمن عنده الماء والاكل والامان والصحة كل شي موفر ، نعمة يجب ان تقابل بالشكر والدعاء الصالح .

وفي هذا المجال ذكرت ابيات حول هالموضوع قالها واحد من الشعراء يعني عن موضوع المملكة والحجاج يقولها في الملك عبدالعزيز يقول :

الله البادي ولا خيب الله من دعاه

يرفع الراية الفعّال فالناس الجميل

معطي الخلق في المحاويع يوم الله عطاءه

من جزيلات الوهايب الى شح البخيل

اتمني والتمني من العاقل سفاه

لو يطيع الموت ياخذ عن الطيب بديل

ويش يبغي من الردي لو تمدى بالحياة  
 ماورى عمره ولو طالت ايامه حصيل  
 قبل ابو تركي وحننا على درب المتاه  
 وجابه المولى على سنة الهادي دليل  
 ماتين له على الدين من فتق رفاه  
 كنه المهدي وياقرب سعد من دليل  
 شيخنا مازال يرفع لنا طيب نباه  
 حطه الباري على نجد واطرافه وكيل  
 رايه الميمون في كل ماجوب نواه  
 كم تحمل عن رعاياه من حمل ثقیل  
 ان عطا فاصغر عطاياه مفتاح الغناه  
 وان سطا عينت مضراب هداته جليل  
 عاش من يضي على الدين والدنيا ذراه  
 سايس الثنتين عدال عنهن مايميل  
 ساسها بالعدل واختارها الله في سماه  
 دعوة من صالحين السلف رفعة بلیل  
 انشد المنصف عن البيت يوم انه ولاه  
 والمدینة من عمرهن بتمهيد السبیل

يركب الحجاج من هجر وسلاحه عصاه  
ما يخاف من المواذي كثير ولا قليل  
امن الخاييف وضاعف على الخاييف جزاه  
واستراح من السهر فالمرح وفالمقيل  
لو صلاح الناس في غارب الجوزا رقه  
ما يذل من المخاوف ومن ربه ذليل  
عزه الله من خليفة ومن خلف وراه  
يالله اني لك عن الخط من قدره دخيل

هالقصيدة قالها الشاعر المعروف المشهور عبدالله بن محمد الصبي ويلقب  
مبيلش والقيت امام الملك عبدالعزيز وجازت له وهي فعلا قصيدة تستاهل قوة  
وجزلة في معانيها .


وحتى في عام الاثنتين والاربعين او الثلاث والاربعين قال قصيدة جيدة حول  
هالقصيدة من حريات مبيلش واسمعكم اياها جميلة جدا كلماتها وجزالتها يقول فيها :

نصرة التوحيد حنا وحناله درق  
من زمان دهام حنا حواميه وذراه  
ودهام هو اللي بنى سور الرياض :

نصرة التوحيد حنا وحناله درق  
من زمان دهام حنا حواميه وذراه  
ننصره للضيم ونجدده ليمن عتق  
ومن مضى منا يوصي عليه الي وراه



والحريب نعرضه وان زمی خشم التفق  
لين يمشي في هوانا وينكس عن هواه  
مالنا اصدق من حدود الرهايف والفشق  
والرفاقه لاوصل كل علم منتهاه  
واعرف ان الي بضده على بده وثق  
مثل قاضب غارب الداب يحسبها عصاه  
وان عدانا الجود والمجد ماسر الملق  
والمخاير نحمد الله على قلعة مداه  
شطر الخاين وشرف مقام الي صدق  
واسبر الثالث بعقلك تعرف الي وراه  
وان قذح زند الحوادث فبالك والرهق  
لذعلى اكوارالعزايم ومجرى الله قضاه  
واحفظ الطاعة تراها مفاتيح الغلق  
كيف ترجي منه يرفع مقامك وتعصاه  
هاخرية القيت واعجب فيها الملك عبدالعزيز وشالوها اللي يعرضون قدامه  
في ميدان العدل واعجب فيها جزالة كلماتها وقوتها يوم يقول :  
مالنا اصدق من حدود الرهايف والفشق  
والرفاقه لاوصل كل علم منتهاه  
واعرف ان الي بضده على بده وثق  
مثل قاضب غارب الداب يحسبها عصاه



## فطوم

هذا واحد من الشعراء شاعر معاصر وسبق اني قد تكلمت عنه له قصيدة جميلة في الغزل وسوالفه زينة وذربة وبعضها يضحك يجلب الابتسامة هو راعي سيارة وهذي السيارة من السيارات الكبار كان يجيب عليها غنم يجيبن مثلا من جدة يوديهن للدمام يبيع ويشترى ويترزق الله ويوم جا مرة من المرات ولاهو محمل هالغنم من المينا مايهمه مايكل ولا يمل من طول الخط مثلا ما يقول صيفت والا لازم اقطع مسافة لا على راحته يمشي والين تعب وقف ونام واستراح والا مثلا وقف صلح غدا تغدا المهم على راحته يمشي وعلى الطريقة ماشي المهم جا هاك المرة مع الخط يمشي ومحمل هالغنم وكل شوي يوقف ويطالع ويطرق نظره في هالبر يمين يسار ويعني ابد مرتاح ولا منه وقف وجمع له حطب وصلح له شاهي معه ابريق معدن يصلح عليه الشاهي نافع هاك الشاهي الي معه كنه شامبو حمر لكن طعمته تقعد الراس ريحته وشكله لانه مصلح على حطب ويمكن الما ما مطر وفي ابريق معدن وفي البر مصلحه وش خليت الشاهي ذا وين تلقى مثله ، هذا دواء يعتبر .

الحاصل انه يوم من الايام مستانس صدره والى منه مشى وصار الخط مستمر والا يغني في الدرب وهو ماشي بقصيدة من قصائده ومثلا يقول :

يا عين هلي دموعك يا شقاوية

وابكي على جادل بالحب عناني

تعبري كل صبح وكل عصرية  
لين الفلك يستدير وينقضي شاني  
حيل الله اقوى تكسر عبرتي فية  
والوصل مقطوع والموت الحمر جاني  
ياوجد روحي على المرواح والجية  
واخاف من واحد بالهرج يقفاني  
ميلاف والقلب تشعاه الستافية  
شعية قطع شعوهن ركب كرزاني  
اقفوا عليهن باهل تسعين منقية  
مع مربع مايجهه الذيب سرحاني  
تقاسموا جلهن حماية الهية  
ومفرق ولفهن تركي وسلطاني  
على هنوف لها في البيض مارية  
ماوقفت تلتفت لفلان وافلاني  
باعين شيهانة ماهيب وكريية  
او مى لها بالعشا رجال ابن ثاني  
العنق عنق الغزال الحذر وادمية  
اقفت مع الصبح يم هضاب بسياني

هذي من قصاده الجميلة الغزلية وراح مستمر في خطه يمشي يوم وصل مع  
العصر وصل لرجال جايب له الغنم يبي ينزلهن عنده يوم جا والا له بيتين الرجال  
ماشاء الله عنده حرمتين وله بني واجد وعيال .

اقبل ووقف السيارة والى يوم لاقاه راعي البيت شماغه على كتفه ياهلا  
ياهلا حيا الله ابو محسن هو عاد اسمه محمد السليمان المحسن ويلقبونه الدرهم  
حياله الدرهم ياهلا اقلط اقلط متى وصلت قال هذي وصليتي وهو يحول هو كريم  
عاد ويده رطبة جايب معه هدية لراعي البيت وعطاه اياه في يده وقال له اقلط  
وقلته وخذاله فنجال والموتر لايزال يشتغل قال ودي انزل الغنم لانها محتجرات  
والقهوة لاحق عليها قال اجل رح نزل الغنم ونبي نولم العشاء لين تحجي قال  
مافيه احد من العيال يساعدنا قال الا كيف والا هاك البنت مصككه اسمها فطوم  
ناداها ابوها يافطوم روجي وانا ابوك افتحي الشبك وخليه ينزل الغنم وعاونيه  
ساعديه قالت ان شاء الله .

وتحجي هكالبنت العنقاء الي ماشاء الله عليها ماخلت من الجمال شي لكنها  
طبعاً متبرقة ولاهيبي بيضا مرة الشمس لاسعتها ومخلية لونها لون برونزي  
وعليها هاك الثوب الحمر عضودها حازها الثوب منا ومنا متعافية البنت قال  
ماشاء الله تقوى تمشي عراقيبها حمر من الفتوة ما فيها لاشقوق ولا شي متعافية  
بالحيل حتى اصابع يدينها مورمة ونشيطة انشط من الرجال المهم وتروح هناك  
وتفتح الشبك وصدرها قايل كذا وواقفة وهو يوم شاف ان الي ينزل الغنم البنت  
تلخبط عدته وغدت عشره وحدة يعني جاء مثل الرعشة شوي تخبر لازم

وهي تنزل الغنم بنت متعافية والشئ الاكيد انه محل امانه يعني ان شاء الله ماعليه  
منقود قاموا يتزلون الغنم اللي فوق لان فيه طابقين نزلوا الغنم ويوم نزلوها ويدلي  
يجدعهن عليها وما شاء الله كل ماجدع عليها طللي صكته بيديها تقل قضبة قمطة  
ما عاد يحترك المهم تخليهن يدخلن في الشبك على واحد واحد، المهم نزل اللي  
فوق بقى اللي تحت حوّل عاد هو يبي يفك باب اللوري من ورا، هما هو له باب  
تقيل جا يفك باب اللوري اللي ورا من تحت و قال تعالى يا بنت ساعديني من لأنه  
خاف يطيح عليه او يطق ركبه ثقيل، وهي تحي تبي تساعده جت تبي تفك  
السلسلة ما قدرت، قال لالا ما هيب كذا السلسلة كذا وتقل ناش يدها وهو  
يفك السلسلة و دلاّ يهرم قلبه زيادة يوم ناش يدها ما عرف مسكين طبعاً ما ينلام  
مسكين بنت جميلة وقام يتزل الغنم ويناولها على وحدة وحدة الين نزلوا كل  
الغنم.

الحاصل قبل ما ترجع للبيت قالت له رح عاد للمجلس تبي تحيك القهوة  
قال زين الله يعافيك يا فطوم وقعد بناظرها وهي مقفية لين راحت يناظرها والله  
علم وش يناظرها على شأنه المهم راح ويوم انه وصل حول البيت وقف وهو ما  
شاء الله شوفه زين عيونه ما شاء الله كنها نقط دبس يشوف ولو على مسافة  
(وارجو انه يسامحننا عاد ابو محسن ترا حتّا نبهر السالفه شوي) وقف الموتر دخل  
عندهم يتقهوى قال عاد يمدح البنّت قدّام ابوها ما شاء الله فطوم ما قصرت  
عاونتنا وساعدتنا والله انها عن ثلاثة عقال وانت قايله صادق والله انها عن ثلاثة  
عيال واني معتمد على الله الكريم ثم عليهاهي اللي تلاحظ الغنم وتواليهم الله  
يخليها لك والله يرزقها الرجال الصالح والى يوم طرخت اذنه قال والله اني

مستحي عاد هو مليان بطنه هواء تصدق انه يصب له القهوة ويقهويه الرجال وأن  
عيونه متفرقة ما يدري وين يبجيه معه وده يحاكيه من سنح الخطبه الحاصل راح هو  
ومشى من عندهم بعد ما تعشا عندهم هاك الليلة وامرح ويوم جا من باكر الصبح  
وهو رايح في دربه .

راح وأبطل عندهم قعد له فترة ما جاهم ويوم جا السنة الثانية والا ه مار من  
عندهم رايح لناس ثاين وتطري عليه أمرهم والا ما أمرهم خاف يتوكل في فطوم  
مرة ثانية لأنه الحقيقة بعيد هو هناك يم القويعية وذولا مثل ما تقول يم جهة الدمام  
بعيدين قال وش يجيبيني لهم والله اني غلطان اخاف احاكيه ويقول ما يخالف  
وانشب انا لالا لا تدري ما يحتاج وهو يعود في سيارته ويغني ويقول عاد :

انا هالزمان مهوّد عن هوى فطوم  
سمح خاطري مابي عيوني تخايلها  
لا يا قلب بنت الناس ما لي بها ملزوم  
ولا هيب من نجعي ولا من قبايلها  
انا شف بالي جادل جنسها معدوم  
تنثر على حد الردايف جدايلها  
مداهيلها نجد العذية سهل وحزوم  
هضاب المدارة كل عصر تضللها  
طعمها براسي ما تبي اللي يعبي نوم  
نظيف الملايس كل يوم يغسلها

ينام الضحى والليل يسري به الجاثوم  
 يشجع هل السمرة ويصبح مقابلها  
 وأنا فوق وارد بون حالي كما المسقوم  
 على رقمي النجدة تكلم بأناتلها  
 لأنه كان مسرع شوي ولحقوه وقالو له وين وراك مسرع قال هذا عماشاي كل  
 عمري ولا ضرني ي قالوا الا لا مسرع بلا ضرك ما ضرك مسرع لا تسرع قال ان  
 شاء الله المهم يقول :

الى جيت عند الظابط اللي عليه نجوم  
 تعذرت منه وهرجته صدق يقبلها  
 وأودي علوم للنشامى وأجيب علوم  
 وشنق هضبة الجولان في الحرب واصلها  
 هو فعلاً راح للحرب ودى له حاجة مرووح بها الحاصل :

ولا يا وجودي وجد من جودوه الروم  
 سجين تلوت في يدينه صناقلها  
 ولا يا وجودي وجد من طاح بين القوم  
 ضرب ركبته مخطاط مفراص محولها  
 قعد والطيور الجايعة يدرجن الحوم  
 وشهب الذبابه تسجبه في مداحلها



## قصيدة الفلاحة

هالسالفه هذي عن الفلاحة منول وكيف كانوا يفلحون ويسقون الزرع  
 بالسواني قبل ما تحي المكايين والارتوازيات ، مره من المرات واحد من الناس زار  
 صديق له في القرية وراح له يزوره في نخله وفي محله وكانت الأمور منّول  
 كسافة وتعب بالنسبة للفلاحة اللي على السواني ويوم جاء وصله في النخل  
 وطالع والا الرجال أموره مره تعبانة ماعنده الا هرشين من البعارين وحمير هزيل  
 يسمونه الاولين خضير ويلاقيه هاك الصبي قال هاه وش عندهم وش هالظول  
 والا هاك المنحة فيها بعير ويسحبون هالبعير ييون يودونه بعيد قال منهو له  
 هالبعير قال لراعي هالنخل اللي هو جاي يزوره والى الحقيقه هو ضاق صدره  
 ويحاكي روحه انا لله ووافقت جيتي موت هالبعير عندهم الحاصل سحب نفسه  
 وجا راجع للديرة وهو والله يهوجس به ويفكر ويتعزز لحاله ويتعزز لأنه الحقيقه  
 الفلاح في هاك السنين يتعب حين تفلت المحاله والا يطيح الرشا في القليب ولا  
 بعض النياق يجيها سلاق والا العامل يهون اللي يشتغل معه ما فيه شي ثابت دائماً  
 يحصل تعب في هالموضوع والا الغرب انشق وبيروح يجيب واحد يخززه وتعب  
 وشقا منول.

رجع لبيتته مرتاع من هالموضوع قعد له في بيته يعني مدة ما شافه والله  
 وارمست الأيام ارمست يعني قعد سنة أو أكثر من السنة وعقب هالفترة الطويلة  
 اللي ما شافه فيها بدت المكايين تحي على أولها توها جايه هه الفلاح جاب الله من  
 فزع له وفزعوا معه رבעه وتعاونوا معه الحاصل عانه الله وجابوا له مكنية أول ما

جت مكايين الري جابوا مكينة من المكايين اللي تخط تحت في أسفل القلب ويصير لها سرداب يحول عليها ويشغلونها بالحدافة ويصير لها ماسورة مثلا ثلاثة بوص أربع بوص تصب فوق تطلع الماء وتشتغل وعاد يصير ماهنا بازين من حس المكينة وبعض الفلايح يتفنون في صوت المكينة مثلا بعضهم قد لحقت عليهم أنا وشفث هالموضوع هذا عيال الفلايح يحطون على شكمان المكينة غرشة فقس عشان يصير صوتها له رنة .

الحاصل عقب فترة طرت عليه قال ورا ما اروح اسير عليه اشوف وشلون حاله أنا سمعت انه جايه مكينة بروح ازورة وبشوف وش الله سوى عليه والله وتطري عليه وىروح ، هو تحراه في الفتره هذي قال لعله يجي للديرة يزورنا نقهويه ونسولف معه ونشوفه ترجاه رفيقه اللي هو الشاعر هذا بترجا هالفلاح يجي بترجاه ترجاه ويسأل عنه يمكن أنه يدخل في غفلات ما يدري عنه الحاصل راح يزوره هاك المرة مار توه مقبل يمشي مع سور نخله يباري الحايط والا هذا هو يوم شافه ويوم اومى له ويدخل عنده والى الأمور متغيره والمكينة تصب ما شاء الله ولا اللزاملان ولا هاك الخضار ما عندك ازين منه كله اشراب قت زارعها ولا أموره زينه وقال له رح شف وطالع تراني بولم القهوة لين تجي رح تفرج وطالع راح بترفج ويطالع ويوم اوفى شوي يوم ناداه للقهوة ويقلظه ولاه مولم له هاك العشاء وحاط له بسر وتمر وقطار عنده وعنده أنواع التمر المهم حشمه وكرمه ورجع من عنده فالشاعر يصف هالروحة هذ وهالاحداث هذي في الأبيات اللي يقول فيها :

رحت بيوم السيل مسير  
 عازمني فلاح خير  
 يسني هرشين وحمير  
 والعقايب ثور وأمه  
 يوم أني جيت الى ما هم  
 ما غير الي من سماهم  
 ما بالبركة من مسناهم  
 ما تدفع به غصة لقمه  
 والى ان الهرش يقزونه  
 والثاني ماهو من دونه  
 وأشوف الثور يعضونه  
 وخضير حاله منسمه  
 غثني حالة رفيقي  
 وشرقت وغصيت بريقي  
 وعودت أركض مع طريقي  
 واثري ما صنعت اليمة  
 امشي واهوجس بالجاري  
 مع دربي من غير مداري  
 ممرس ولا ادران الداري  
 الا ووقع لي بمطمة

شوش الضول في منجاة  
يجروّن بعير مـات  
ويعضوّن الوخارات  
والمسنى يـموج بدمه  
لا تنشـد عن ما جرى لي  
من حال الأول للتالي  
من غربال في غربالي  
والخافي عند الله علمه  
مشيت افكر واسترجع  
بامور تـوجع وتفجع  
ولا غير المولى مرجع  
اللي يصرف كل مهمه  
دخلت لبيتي مرتاعي  
لو قلبي جـلمود ماعي  
بين النيم وبين السواعي  
من حزن سير بي سمه  
لا عادت منك التسيارة  
تقل اوقف في معارة  
والا في مقصب جزّاره  
بين المذبوحة والرمه

يا عيني عين الفلاح  
في زمانه هاللي راحي  
ما شاف بدنياه افراحي  
من دينه ما فارق همه  
ما احد ينسى هاك الحالي  
والسواني والدركالي  
والدرجه والمحالي  
والعمال وقطع الذمة  
قطعت الجيه والروحه  
كود فوادي يبرد فوحه

\*\*\*\*\*

والفلاح تربع روحه  
ويفتح من عقب الظلمة  
وانا قلبي عند صحابي  
ذاك الفلاح الرحبي  
ليته يرمي به نصيبي  
للديرة يوم واعزمه  
لاجل استفسر عن حواله  
وادري عقبي وش جرى له

عسى عيشه قد صفى له  
وانزاحت هذيك الغمة  
اخذت أيام ما زرتيه  
ولا شافن ولا شفته  
ولا بالديرة صادفته  
قلت ابظهر عان يمه  
ظهرت لرفيقي مومي  
ابي عن حاله معلومي  
والى مير اللي لي بومي  
مع سوق المكان بكمه  
نصيته عجل وشفقاني  
وهو ما قصر لاقاني  
سلمت ورد وحياني  
قلت وشلونك قال بنعمة  
قلت اصدقني قال الحقني  
تشوف وش الله رزقني  
ما خلاني من خلقي  
اخذه واعطاه عن حكمة  
دخلنا الحايط من برا  
والاه سندسة خضرا

وطيوره بأشجاره تقرا  
 على أزهاره لها نعمة  
 والمالانهاره هديري  
 وكتوت مثل الهصيري  
 والرّعاد بوسط البيري  
 اثر العمّه وسط الجمّة

\*\*\*\*\*

العمّه ذي بستم نأيم  
 ماله راس ولا قوايم  
 غير جران فوقه قأيم  
 عليه الماء مثل العمّة  
 شي يشرب مع البومه  
 ثم يخرج مع بلعومه  
 باللي تسمع للمنضومه  
 وش شي يشرب مع خرمه  
 كل شاهد من ذاعينه  
 واللي شايف للمكينة  
 قد شاهد هالغطو بعينه  
 ما يحتاج نصور رسمه

حديد وباس شديدي  
 ما يمل ولا يبيدي  
 روبا خضر الجريدي  
 ريف الجايح وام اليتمة  
 مابه رقّع يا خراز  
 هات سيورك والمخراز  
 ورد صدر يا عجزاز  
 يا عاملنا بالدعرمه  
 لدّيت لراعي المكاني  
 واثره بقهوته يتناني  
 صوت وفاض وناداني  
 قال غدي ما يسوى اسمه  
 تعال ابصر في ها الغدوهة  
 اللي ربعة يكفي ندوة  
 كل بخيل جعله فدوة  
 لصحيبي راعي هالكرمة  
 شكرته شكر مطبوقي  
 قلت اخلف تبطي بوفوقي  
 واطلق الله عنك العوقي  
 عقب الفقر وشين القمه



منوك بلشان ومشيجي  
 بين الجرباء والصحيح  
 هاتو رشاهاتو سريحي  
 ضم العامل لا تظمه  
 وفوادك يومي معلوقه  
 لا قيل الناقة مسلوقة  
 والعامل حلن حقوقه  
 والا هون يبي القدمة  
 قال المنه للمعبودي  
 ما عني والله منشودي  
 كشرت خيراتي ونقودي  
 وابي الشيخه لو لا الزحمة  
 بالقبيظ خبيز ولبيني  
 ويسير وقطار زيني  
 وشتانا قشد وحنيني  
 والمغرب قرصان ويدمة

\*\*\*\*\*

المراد ان المكايين  
 ريحنا الا ذنايين

فظلهن كالشمس باين  
 ماتشوف اللي يذمه  
 المكأين بالذهاني  
 يزعجن الريهجاني  
 بطلن ذكر السواني  
 ذاك طير وغاب نجمه  
 والحزم الحزم الممتازي  
 في توريد الارتوازي  
 ماتبي لك زيت وقازي  
 ولا يحتاج أية خدمة  
 ماعلينا خمس سددس  
 الى دلى ماها يرجس  
 مع السلامة يامهندس  
 حتى ربحك لانشمه  
 لعل الله يامر فيها  
 ويسهلها ويمشيها  
 لنخيل الامة ترويهها  
 والشطة تقفي منهزمة  
 لانقام الشعب بتوريده  
 لام تغذى من ديدله

العجبة عدو طريقه  
ما للوالد غير الحشمة  
واوي يامشروع سامي  
ما يحظى فيه النوامي  
ياحظ الشعب الى قامي  
وعظم الهمة يحيي الامة  
تمت وختامه يا سادة  
صلوا على خير عباده  
واله واصحابه واجناده  
عدد ما يظهر من نجمة

هذي هي القصيدة التي نظمها الشاعر عبد المحسن بن ناصر الصالح واسمها  
قصيدة الفلاح .





## منازل الاحباب

مرة من المرات في روضة من الرضان حول منطقة الوشم ربيعها عجيب وفيها من هالنزل وناس واجدين نازلين فيها وفي البران اللي حوالينها فهذولاء عرب وهذولاا عرب من كل جهة جاين ومن كل قبيلة حضر وبدو ودائما إذا صاروا البادية أو البدو قرييين من الديرة يجون عندهم اللي في الديرة ويجون لمهم رجالهم يطلعون يسبرون على الرجال يتقهوون عندهم يتعرفون عليهم ويصير فيه جلسات فيها علوم غائمة وسواليف وقصيد وشعر من كل شكل وحتى النسوان اللي مثلا في الديرة يزورون النسوان اللي في البر ويصير بينهم تعارف يا بيعون عليهم ويشترون يصير فيه تبادل بيع ومشتري ومعرفة .

ففيه ناس نزلوا حول الديرة في سنة من السنين ويوم جت السنة الثانية مثلها والسنة الثالثة مثلها , ثلاث سنين وهم ينزلون في المكان في الربيع حول الديرة تعرفوا عليهم بعض العوائل اللي في البلد صار معرفة بيناتهم فإذا صار معرفة بين الرجال الكبار يصير معرفة بين الجذعان وشبابهم ويصير معرفة بين النسوان فاللي حصل أنه مرة من المرات في هالمعرفة هذي لا تامن ان واحد من الشباب اللي عرفوا العائلة هذي تولع بوحدة من البنات أو شافها وجازت له لو ما بين لكن يحب الجية عندهم والمسيار عليهم ويتوافقون ويحصل جلسات كلها على نقا جلسات ما فيها ولله الحمد مغازل سفهان ، وعقب مدة يجلسون طبعا في الربيع هذا من بداية الربيع إلين يجيهم القيظ وإلى جاهم القيظ راحوا وإلا غيروا محلهم فعقب فترة جا واحد من هالشباب اللي يعرف هالمكان هذا اللي قد جرى له

ذكريات وزارهم فيه يدور حول الضلعان وإلى هم شادين مافيه أحد دار حول  
الضلعان اللي حوله لحاله جاء يزوره ويشوفه يوم جاء يطالع مكان مراحهم وإلى  
هذا مكان مخيمهم وهذا مكان بيت الشعر اللي هم طاقينه وهذا محل غنمهم  
وهذي هوادي قدورهم وآثارها عقب ما راحوا وثوبيات مجدعه وآثار محلهم  
عقب ما راحوا.

تذكرهم يوم أنهم يشدون هذاك اليوم العصر وتذكرهم يوم وادعوهم وأكود  
شيء على الرجال الحساس والشاعر الموادع والموداع كايد وصعب ومخايلهم  
خاصة إذا بغوا يروحون ويشدون يقول مرشد البذال في قصيدة له :

"البدو غربال القلوب المشافيق

يا ما عاديت خلافهم وأتعبونني

ويا ما بديت بعاليات الشواهيق

أخيل في عيني توالى الضعوني

راحوا لهم مع كل حزم طواريق

ويمكن يصير العصر ماينزلوني"

المهم شدوا وراحوا فهذا الشاعر يوم جاء وطالع وشافهم رايحين هالشخص  
هذا المحب أو اللي عاشق المكان يجي يتردد عليه من محبته للي ساكنين فيه قبل ،  
طبعاً هالقصة هذي والمنظر هذا والأحداث يجسدها لنا في القصيدة اللي ابذكرها  
الشاعر عبدالله بن عبدالرحمن السلوم رحمة الله عليه من كبار الشعراء وهو من  
العناقر من تميم يقول في القصيدة :

حمام باللي تزعج الصوت بلحون  
نوحك طرب منتاب مثلي معنى  
بالورق نوحك زادني هم وشجون  
أرجيك خفف لوعتي لا تغنى  
انته مريح بين غدران وغصون  
وأنا عليل وخاطري ما تهنا  
ما يجتمع بالورق سالي ومشطون  
كف النياح جزيت بالخير عنا  
بالورق أنا والله فلا نيب مجنون  
يوم اشتكي لك لوعتي واتمنى  
بالورق انا اشكي وأكثر الناس يشكون  
ومن صوبه سهم من الحب ونا  
أنا عليل الحال باللي تعذلون  
ما ارتحت ساعة من سنين مضنا  
ابكى على ناس من الحزن يـبكون  
حدر ضعنتهم يوم سند ضعنا  
وقفت أراعيهم وهم لي يراعون  
ودموع عيني حدرن واسبلنا  
وقفوا وهم في كل خطوة يلدون  
وحسبي على من هو علينا تجنى

رجعت كني بين الأضلاع مطعون  
 مثل اللذي صوب براس المحنا  
 وبقت لي الذكرى عساهم يعودون  
 وصورة خياله في خيالي تبني  
 حسبي على دار جفت صافي اللون  
 أمست قفر ما كنها من وطننا  
 ما عاد فيها غير كثبان وحزون  
 وما حولها إلا الريح هدم وبني  
 صارت كما الأطلال للي يمرون  
 أرض خلا من مرها ما تونى  
 هي عادة الدنيا على كل مفتون  
 غاراتها بالناس يا ما سطنا  
 ما دام هذي سنة الرب في الكون  
 يلزمني ارضى قسمته ماتونى  
 تمضي ليال العمر والسد مكنون  
 أجحد صوابي والسنين ارمسنا  
 أخفيه ما ودي به الناس يدرون  
 وراعي الهوى المجروح ما يرجهنا  
 وأسهر بليلي والخلايق ينامون  
 واكتب بدمعي والشعر كل فنا



والصبح حالي فيه من دون في دون  
ينحائي الهاجوس منا ومنا  
لو لا الرجاء بالله قوي ومضمون  
لا أموت من حمل نقلته مثني  
ميتة قهر وإلا ترى الموت مسنون  
علم ثبت ما فيه حقوة وظنا

هذي هي قصيدة الشاعر عبدالله بن سلوم اللي قالها ومن خلال أبياتها  
يتجسد لنا موضوع الوداع ولو تلاحظون في القصيدة ترى ما فيها من الغزل شي  
كلها صورة يرسمها لك في الوداع وحزنه على فراقهم وروحهم والمكان عقبهم  
وش صار المكان ما يعمره إلا أهله حتى لو أنه بر وإذا تلاحظون القصيدة من  
أولها إلى آخرها ما فيها من الغزل إلا يوم يقول " حسبي على دارجفت صافي  
اللون " هالشطر هذا اللي فيه غزل وإلا الباقي كله توجد على شوفتهم ووداعهم  
وروحهم وحالته بعد ما راحوا وكيف كان يسهر الليل ويكتب الشعر وهذي من  
القصائد الجميلة .

وهذي كذلك قصة قصيرة فيها شي من الطرافة ، هذا واحد تزوج هكالبنت  
وهو شاب لكن يمكن انه نضل والا جاء شي المهم ما عاشت البنت توفت على  
طول والى يوم انحشت كبده عليها بس قام يتصدد ويتنحش عن الديرة بيبي المكان  
اللي بيعده ويصده عن المكان اللي كانت زوجته فيه لين الله يوفقه ويرزقه بزوجة  
ثانية والا يشوف له دبرة .

الحاصل راح يمين ويسار صفقته الدنيا على كل جال الله يدفع البلا لين جا  
يوم واشتغل عند راعي ابل عند واحد يبي يعطيه مثل ماتقول عشرة طليان في  
السنة ماهنا راتب نقد الحاصل ان الرجال راع الابل هذا حبيب ولكن ماله دبرة  
الدبرة عند حرمة أخذ له هكالحرمة عجوز يتعبر بها لان حرمة ميتة ام لثلاث  
بنات عنده جميلات كنهن نجفات من بياضهن وزين فيهن لكن ذالعجوز تهوش  
وتصايح تعرش جنوبها من الهوش ونجسة على ذالراعي المسيكين شابة عليه وهو  
حبيب وقايم بعمله على المطلوب يشتغل طول اليوم الين يظلم الليل الى اظلم  
الليل والى توه واصل فك عن ركبيته ونزل شداده وتشطر هناك يحترى عشاء  
وامين هو ولا يطالع البنات يستحي لكن هالعجوز القشرا لها راس اسود طالع من  
تحت البياض كنه شجرة نصي تروغ حالتها حاله عيونها مقتلبة من الهوش يادافع  
البلا لها حس كنه حس رجال .

يوم جا يوم من الايام توه واصل وهي تاقف له قالت انت جيت قال ايه جيت  
وش تبين بعد انا تعبان قالت خذ القرب هذي والى قربهم الله يجيرك كنهها جنوب  
بعارين قالت له يالله قم رو قال ياناس انا توي مروى لكم مرتين وحدة تكرم من  
عندي وانا تعبان هالحين جاي هلكان وانا ترا راعي مالي شغل في الري قالت قم  
انت تبي تاخذ لك عشر من الغنم تبينا حنا اللي نروي والله ان تروي اها خذ  
البعارين ورح هاه ثم اسمعني لياك تجيب من المارد القريب تراه دبق على كبود  
البنات تبي تروحه لمارد بعيد يجي حوالى خمسة كيلو بعيد اسمه العقيلة قالت رح  
للعقيلة ، والرجال المعزب راع الابل رجلها يسمع من بعيد ولا قال شي  
وهالمسيكين الولد ماعاد قدر يقول شي مابقي له من مدته الا شوي ولا هوب

متفالس هو واياهم ويبي عرقته هالغنيمات المهم انه راح يجيب الما من المارد اللي  
 قالت العجوز يهز على ركبته هاه الرجال معزبه رحمه شفق عليه نادى بناته وقال  
 روحن يابنات معه ساعدوه خلوكن بعيد وراحن معه يمشن وراه وهو تعبان والله  
 ماهوب يمهن الحاصل وصلوا المارد ورووا وساعدوه عاد وهو مسمي بغيره اللي  
 هو يركب مسميه حزيم رجع وصار يتذكر ايامه متول وزوجته اللي حاشمته  
 ومكرمه المهم يقصد ويقول :

ياالقلب مادمت في حاجة معازيك  
 اخدم صلاحك وماقالوا فقل تما  
 قلط شدادك وخل حزيم يسري بك  
 وعجل لببيض الصبايا بازرق الجما  
 بالك تصافي عدو السو يوزي بك  
 شرب العقيلة على كبدا الغضي سما  
 ياليت غض النهدي باللحد يدري بك  
 انك على النضو وراود لك عما

المهم وصلوا وحط القرب وجت البنت وناداهم الابو قال هاه وانا ابوك وش  
 صار قالت والله يبوي يا قال ابيات حافظتهن هي وعلمت ابوها بهن ويوم جا من  
 باكر ويقوم الشايب ابو البنات عقب فترة اقنع العجوز وحط عنده وحدة من  
 البنات زوجه وحدة منهن والحقيقة انه يستاهلها طرقا لكنها خيزرانه بدل اللي ماتت  
 الله يرحمها .



## فراق الاحبة

هذي قصيدة الشاعر حمد بن عبد اللطيف المغلوث من شعراء الحسا  
 المعدودين المشهورين ويرجح انه توفي عام ١٣٤٩ هـ يبدو من القصيدة انه كان في  
 شبابه وهو صغير ناوي يحدر للكويت يترزق الله ودور حملة وربع يروح معهم  
 ولكن ما اراد الله يروح مع الحملة الاولة ماتمكن فاتته طافت الحملة الثانية ما  
 ادركها يبي مجموعة يرغبها ويرتاح لها والحملات اللي فاتته بعضها ما يبيها اما  
 انهم يصيرون من الناس اللي ما يرغب مرافقتهم او ان الوقت ماهوب مناسب له  
 يصير مشغول الحاصل جا وقت كان هو توه متزوج يعني عريس جديد والى  
 هكالرفقة والمجموعة نقوة يعرفهم ويرتاح لهم وهذولا اللي يبيهم، المهم توكل  
 على الله وراح معهم للكويت ووصلوا هناك والاه توه على شغف بزوجته ما  
 امداه مثل ماتقول بشهر غسل الحاصل وصل هناك للكويت والى كل مجموعة من  
 اللي بالكويت يتجمعون لحالهم مثل ماتقول اهل الزلفي لحالهم واهل الحسا  
 لحالهم منول يوم ان الناس يروحون يترزقون الله بالكويت وغير الكويت يصير  
 كل اهل بلد يعرفون بعض ويتجمعون مع بعض اللي مثلا يجي من القصيم يروح  
 يدور ربه ويسكن عندهم لين الله يسمح امره ويلقى شغل .

الشاعر حمد المغلوث مع جماعته اهل الحسا والاهم ساكنين في بيت مثل  
 ماتقول دور ارضي فيه غرف تحت وسطوح فوق وكانوا في ايام قيض لهذهم  
 يتامون بالسطوح، وماش الواحد الى راح عن ديرته يمضي عليه سبوع او سبوعين  
 وهو يتذكر المكان اللي هو جا منه وخاصة الى صار شاعر وراعي غزل واحساس

مرهف مثل شاعرنا حمد هذا لا بعد وتوه متزوج هاه فهو يبي له فترة الين ينسجم مع  
ربعه اللي هو جاي معهم ويركد شوي ويسلى ولو شوي عن اهله وذكرهم وديرتة .

المهم مضت ايام مادام انهم لاهين فهو لاهي معهم لكن الى جا الليل ليلين لا  
وعندهم شجرة اظنها عبرية ويمرح فيها في الليل طيور وحمام والحمام مثل ما  
تعرفون يهيض الشعرا ويستثير قرايحهم للشعر ويهيجهم الى قام الحمام ينوح  
ويغني ووقت الصفرة يهيض الشاعر خاصة الى صار لحاله فهذا الشاعر حمد الى  
ناموا الناس ما جاء نوم قام يتذكر اهله وربعه في الحسا وبالاخص زوجته  
وهاحمام اللي فوق راسه يهيضه وهو قاعد سهر لحاله واللي حواليه خالين وش  
هامهم لو تثور مدفع ما قاموا مثل ما قال ابن ربيعة قال :

الى دك به هاجوس ما يسمع الطوب

والى انتبه ماجابت الورق جابه

لي صرت في صوب وعيلتك في صوب

لاتنشد المسكين يكفيك مابه

والى راح نصف الليل هب الهوى من جهة ديرته وتهيض زيادة وقام يحس  
بالفرقى خطر عليه يشقق ثيابه ما ينام الا شوي من اول الليل فهو تهيض  
بهاقصيدة هذي وهي جميلة فيها وصف وحنين ووجد وغزل وكلام جزل  
القصيدة يقول فيها :

باح العزا عقب الحبيب الجنوبي

كن العقل يا علي بالكف مجذوب

يا علي تذكار اريش العين دوبي  
 زوله يزول لي وانا عنه محجوب  
 ابكي على فرقاه والعي واهوبي  
 والدمع من عيني على الخد مسكوب  
 من حر نار الولى مزعت ثوبي  
 وطوحت بالونة على كل ننبوب  
 عقب الستر كل الخلايق دروبي  
 والسد ثار من الحشا ثورة الطوب  
 يا علي لا نستس نسيم الهبوبي  
 نود من الشرقي برى حالي النوب  
 سلال سل الحال من كثر لوبي  
 لاهم لا سقوة ولا نيب مطبوب  
 الا بلاي فراق من سد نوبي  
 عن كل معشوق من البيض رعبوب  
 يا علي يا فرز الوغى يامحبوبي  
 ويش انت شايف يا حجا كل منكوب  
 عيا يطيب لي الكرا مع شروبي  
 كن الحشا بصلى على حر لاهوب  
 ليت الركائب يا علي ما مشوا بي  
 من ديرة المحبوب والرزق مكتوب

ويا ليت ربي ما سعى في ركوبي  
ليت السنع معتاق والدرب مقضوب  
واليوم يا غافر عظيم الذنوبي  
اسالك يا معبود يا خير مطلوب  
تجمع بشملي مع حبيب عجوبي  
محبوب ما غيره من الناس محبوب  
اللي كما بدر بدا للغيوبي  
او شمعدان في دجا الليل مشبوب  
اصفر عفر والكف منه مخضوبي  
ومجمله ربي ولا فيه عذروب  
الا الوفا ما هو مكور كذوبي  
ومغفل ما يعطي العلم مقلوب  
عز الله انه ثقل الحمل صوبي  
بالحب وادعائي شقي ومتعوب  
هو ريف روعي يا علي لو حكوا بي  
مصدود عن عذل العواذل ومحجوب  
ما طيع انا العذال لو برقوا بي  
ولا كف عن وصله ولا اسلى ولا تبوب



ماسمع ولاوحي عن حبيبي ولوبي  
 صبر فلا حاربت زادي ومشروب  
 ماطيع انا الفرقا رفاق جنوبي  
 قلبي ضعيف ودايم الدوم متعوب  
 يوم الليالي عن حبيبي رموا بي  
 غديت مليوت الجناحين مصيوب  
 مثل الفقير اللي غريب عزوبي  
 مستاجع ماله حد يقضي النوب  
 او شبه حيد للسرّات معصوبي  
 حملة ثقيل وصار بالكف شاذوب  
 والا كما طفل يتيم يحوبي  
 من قلة الوالي ورا الباب مذبوب  
 هذي سواتي عقب فرقا الجنوبي  
 اللي هجرني ما لفي منه مكتوب  
 هو يحسب ان البيض عقبه غدوا بي  
 انا بصوب وعن هوى البيض في صوب  
 مامل انا اللي لا ذكرته يذوبي  
 عقلي وهو متغطرس يسحب الثوب

غرو من البيض العذارى محسوبي  
 هافي حشا ومعزل تقل مسلوب  
 كن الردايف لاقتفاها الهبوبي  
 صيوان حكام بالاطناب مضروب  
 وعيونه الخرسات سود سطوا بي  
 ونهود مثل التين والعنق مسلوب  
 يا علي وين اسلى الهوى وين انوبي  
 وين اقدر التجليد والعقل منهوب  
 يا علي خلوني وحيد الوبي  
 لوب الحمام اللي على راس نبنوب  
 غير الوصل ماش يبرد لهوبي  
 وصلوا على المختار ماغرد اللوب

هذي قصيدة حمد بن عبد اللطيف المغلوث اللي يسندها على الشيخ علي  
 الخليفة الصباح والحقيقة القصيدة جميلة وبنانها متراص ماينشال منها شي اجاد  
 فيها وفيها صيغ مبالغة وتخبر الشاعر يبالغ مثل قوله : كن الردايف لاقتفاها  
 الهبوبي صيوان حكام بالاطناب مضروب هذا من البيوت اللي فيها مبالغة شوي  
 وعلى كل حال هي من درر الغزل الحميل .

## وصف الطبيعة والربيع

قبل حوالي ستين وافق على المملكة وعلى عدة مناطق مطر راهي ولله الحمد وصار ربيع جيد جدا وقاموا الناس يعنون له ويقعدون يعني طولوا فالبر اشهر هذي روضة وذو روضة ما عندك باجمل من الطبيعة الماء والخضرة الى صارت الارض خضراء والجبال الي حولها خضر والمحلات ريحة هالنفل فيها ماشاء الله تبارك الله هالابل الي قلت ما عندك ازين من منظرها وصارت مربعة والغنم كذلك هالارض اللي الله سبحانه وتعالى مضفي عليها هالخضرة والجمال يطلعون الناس فيها صحيح لكن وش اللي يحصل من بعض الناس الله يهديهم تلقى مجموعة من الناس او العائلة قاموا وحوطوا لهم هالارض الكبيرة ودقوها بالسيارات ودقوا ريضانها بالسيارات ويدورون بهالسيارات الي كفرتها عراض كنها فرش مطوية عشان تدق الربيع زيادة والشباب الله يهدينا وياهم يامين يا يسار بعدين بعض الشباب الي يطلعون في مكشات للبر مايراعون خاطر العوائل المفروض يراعون خاطرهم يعني عدان هالعائلة او هالناس من اقاربك يوم انك تحط لك خيمة قريب حولهم وتذيعهم وتحشرهم وتخلي نسوانهم ما يطلعون ولا ياخذون راحتهم بعض اهل العوايل يقولون والله هالخيمة قريبة اخاف ناس معهم دربيل ياناظرونا والا شي طيب روحوا منا يمين يسار فيضطرون يقعدون العوايل بالشعبان اللي صاكت عليها الجبال منا ومنا تلقاها كلها حصيان وبهذلة ولكن يقعدون مضطرين بيون الستر وعلشان عييلهم الصغيرين يروحون ويلعبون

ويستانسون ولا يضيع منهم احد والبر يبي احتزاب مثلاً الى طلع الواحد للبر  
يحاول ان منزله في البر يصير قريب من قرية حول الريضان تخليهم قريين تاخذ  
لهم بيت شهر شهرين هذا شي طيب لكن متى يحصل والا لو يحصل يعني بر  
قريب من قرية كان تقدر تحط مخيم في الشعيب الفلاني والصبح تطلع مع العائلة  
وتحطهم وتخليهم يتغدون ويتعشون ويسفهلون وكل شي لكن الى جا الليل  
وقرصهم البرد تزبهم البيت يجون ينامون فيه .

اول شي امن لهم من القواريص ومن الاشيا ذي ولا يرتاعون العليل  
الصغيرين وايضا خوف عليهم من البرد وبعدين يغسلون ويغفرون والصبح من  
بدري يرجعون للمخيم يقومون بدري يفطرون هناك بالمخيم، الى جا الصبح  
والى وحدة من العجز الكبار الي معهم قد صلحت لهم خبز تاوة والا حنيني والا  
فريك والا اي شي يطلعون هناك ويتعلمن البنات من الحريم كبار السن يتعلمن  
الطبخات اللي بالعادة نسوى في البر ماتصير الا بالبر مثل قرص البر والحنيني  
والفريك وخبز التاوه مثلاً والا الاكلات انواعها واجد هذي الاكلات ترا بعضها  
مايتصلح الا بايام البر فيستفيدون منها البنات هذي الطبخات اللي ما يلقنها  
البنات في التدبير المنزلي مثل طبخة ١٣١ مدري ١٥١ هذي تلقونها عند العجز  
مالها ارقام .

الحاصل بعد من الناحية الثانية في البر يبي احتزاب مهيب لعب وخربطة اذا  
بغيتوا تطلعون للبر مثلاً تقعدون لكم ١٥ يوم عشرين يوم وانت معك عائلة لاتبعد  
عن الخط بعيد خلك قريب من الخط سبحان الله محتاج شي قريب حول موارد  
المياه تبي ما للغسيل للروحة والجية اذا صار عندك مخيم خل كل شي راهي من

ناحية الحطب اجمل شي الحطب والنار في البر حتى لو هو في قيض النار  
والحطب وريحة الحطب وخاصة السمر زينة يرتاح لشمها الانسان يصلح عليه  
قرص بر ويصلح عليها القهوة والشاهي وكل شي وبعدين الاكلات هذي مثل  
قرص البر ومثل الشوي خل هالشباب الصغيرين يتعلمون يشوفون ويعرفون  
والشباب الي ماقد شافوا بس يقعدون اما لابسين كبايس والا معهم كميرات  
مايصير ذا الحكي خلهم يتعلمون ويشوفون ويطبون ويمشون على رجليهم في  
الرمل في الشوك الين تقوى سبوت رجليهم ويعرفون كل شي .

ثاني شي الى من الله وفق في المنزل الزين وصار حوله مثلاً راعي غنم راعي  
الغنم ترا يحتاج لك انت بالحضري الي جاي من الديرة لاتصير يدك شحيحة خل  
يدك رطبة الي وصلته عطه كيس رز عطه كيس سكر حتى يجيب لك من حليب  
الغنم الي عنده الحليب اللي ماخل عليه بودرة ولا دخل عليه شي هالغنم الي  
راعية من كل عشب من كل نبتة في البر هذا الي حليبها صحي انت ماتشوف الي  
جا البرد انت لابس فروة وثوب صوف وكل شي وهذاك ترتعد وانت على الضو  
لكن يجيك ولد البدو ماعليه الا ثوب خفيف لكن جسمه يفور من الحرارة وهو  
على الله ثم على هالحليب حليب هالرخال .

زين كل هالاشيا ذي تعلم الشباب وتعطي فكرة عن البر وعن جمال البر  
وبعدين مايصلح يروح مثلاً عايلة لحالهم تضيق صدورهم ترا الي ماصاروا  
عايلتين مع بعض مهوب من بيت واحد مثلاً يتواعدون هالعايلة مع هالعايلة بس  
اكثر من ثلاث عوايل مايصلح بس ثلاث عوايل حدهم عشان ماتختلف الاراء  
والا الي صاروا اربع خمس عوايل ومعهم عيال واجد الله يجيرك عاد كل يوم فيه

مشاكل وهوش وصجة ولجة من هالعيال غثا لكن الى صاروا عايلتين ومتفاهمين او هذولاك نازلين في جهة الشعيب منا وهذولا جهته منا والحمدلله محلات الربيع وش كثرها كلها ولله الحمد محلات امينة ثاني شي قرية من المدن واليوم ماعاد فيه شي بعيد ولله الحمد هالخطوط الطويلة نعمة من الله يعني الحقيقة اشيا كثير انا ماقدر احصيها ولا اعددها لكن انا ابي بعض هالشبان الكبار اللي قد لحقوا على الامور الاولى يجييون عيالهم وعيال عيالهم تعال يا ولدي تعال تعال الله يصلحك تعال شفت هالابل هذي يسمونها البكرة وهذي فاطر وهذي يقالها ملحا وهذا لونها اسمه عنسي وذي حمرا يعلمه باسامي الابل ويعلمه باسنانهن تراه يدرسهن في باب الزكاة في الابتدائي في المتوسط لكن ماشافهن على الطبيعة مايدري وش الحققة وش بنت لبون وش بنت مخاض مايدري وش ابو سنة وابو ستين هذي المسميات مايعرفها الا اللي جا في البر يوريه ابوه مثلا يقول تعال وانا ابوك تعال شف هذي يقال لها حمراء وهذا اسمه قعود وهذا كذا يعلمه باسامي الابل ياقف معه مثلا عند راعي الابل ويسأله وش تسمونها هذي وش يقالها في كل ديرة ويخليهم يستفيدون ويخليهم يعرفون ويشوفون وهذي الشمالة وهذا الرسن يعلمه بكل شي بالمسميات كذا يستفيدون الشباب .

هذا بالنسبة للنهار ياخذ العيال ويروح بهم ويوريهم الشعيب الفلاني ويشوفون انواع النبت ويشرح لهم عن النباتات واساميتها شوفوا باعالي ترا هذا القرقاص وهذا الحوا وهذا البقرا وهذا الذعلوق وهذا الزملوق وهذا البسباس اللبت اللي في الارض الحين لو تحجب نصف هالشباب والله مايعرفون مسمياته حتى اسامي الغنم بعضهم مايدري وشي المعزى ولا الطلي ولا العناق ولا الجفرة

ولا الرحلة طيب الحين المعزى اللي مالها الا ديد واحد لها اسم الجمة و الي مالها اذان يسمونها جكة وهذي عارضية وهذي حبصية وهذي من الحجاز واعلمه بكل شي خله يعرف وهذا جبل وهذا هضبة وهذي يقال لها برقة وهذا يقال له شعيب وهذا وادي وخاصة اسامي الوديان المهمة وادي الرمة وادي السرحان هالا ودية المهمة الي شافتن الجزيرة العربية من شمالها الى جنوبها كل الاماكن واجب يعلم باسميهم .

حتى البنات اخليهم يشوفون ويسمعون ويعرفون مهوب بس مايعرفون شي والا يطلعون باكر مايعرفون شي والا اروحهم مع سواويق هنود واجانب من كل جنسية لا مايصير هذي من ناحية والثانية ان مافيه اجمل من جلسة الليل الى شبوا الضو وخطوا العنة نصف الشباب مايدري وشي العنة العنة هي الخطب اللي يحط حول حماية عن الهوا القوي وحماية عن القواريص لاتاصل اللي نايمين حول الضو بعض المرات نشب الضو ونصلح القهوة ونحمس قدامهم يدق واحد النجر قدامهم ويوريهم الحقيقة مافيه اجمل من الجلسة هذي .

عاد هذي قصيدة قالها واحد من الشعراء المعاصرين واجاد الحقيقة وصف الربيع وهو الشاعر عبدالله بن سالم القريني يقول في القصيدة :

للكرب عند الله ثمانين حلال

الخلق تحت الله ولا شي فوقه

الحمد للي غائنا عقب الامحال

من مدلهم سامرات بروقه

من مدته راع الفضيلة والاجلال  
من بين كاف ونون يجري دقوقه  
اوحى لمامونه على الغيث مكيال  
لارض النواهي بالاغاثه يسوقه  
سح غدق وبله على الارض هطال  
سيله يسابق وابله من حقوقه  
غطى الروابي والمفالي والاطلال  
وعلى الجزيرة ضافيات فتوقه  
والارض لبسها من النبت باشكال  
كن توها عقب الجمال مخلوقة  
كنه ينيلها بالالوان نيسال  
والعشب بالوانه طوال سبوقه  
لون الزهر عقد على سلك الاحمال  
من شاف بعيونه نباته يشوقه  
العشب بستان على الروض والجنان  
متخالط رتع الحباري ونوقه  
ترعى بها النسرفة بلا قيد وعقال  
وضحا على رعي المحاوي طفوقه  
مسيرها في مقدم الشول جهجال  
يردها الراعي وتقدم طفوقه



البر باللي باغي سجة الببال  
اليوم في كامل خضاره وذوقه  
سر بالقدم مادمت في وقت الامهال  
سر بالقدم لاتستهين وتعوقه  
في مربع عله من الويل علال  
ريح النفل قلبك يريح معلوقه  
قفر خلا ماجاه زول ولا مال  
غير القميري فيه يلعب طروقه  
يلعب على خضرا بها سدر وظلال  
يدور حوله راويات عروقه  
لك فيه باللي ترغب العشق منزل  
تغانمه قدام تابس عنوقه  
تراه مثل العمر يزهي وينزال  
له مدة واجل يحين ويعوقه  
تدبير من يعلم خفيات الاعمال  
الي بعث راعي الصفات الصدوقه  
شفيعنا يوم المكارب والاهوال  
والناس من شوف العذاب محروقه  
عليه صلينا عدد وادي سال  
وماحام طير الجو وارخي خفوقه  
هذي القصيدة في وصف الربيع قالها الشاعر عبدالله بن سالم القريني .



## التشرط في المهر

اول شي ودي اقول ان الهدف من هالسوالف ماهوب الضحك والتسلية فقط وان كان هذا مطلوب لكن انا اهدف بعد الى ان تكون السالفة توجيهية بطريقة غير مباشرة وانها تحت على مكارم الاخلاق والسلوم الطيبة مثل بر الوالدين والوفا والمحافظة على حق الجار والاقارب وعلى منفعة الناس وكذا وابقول بعد ان بعض السوالف يجي فيها مبالغة وبهار واجد ويقولون الاولين الكذب مسامير السلع ولكنه كذب ولاهوب كذب يعني تبهير على شان تحلو السالفة والا لو تقال بدون هذا مالاقت القبول عند كثير من الناس والمبالغة بالتصوير والرواية معروف عند كتاب الرواية والقصاصين وحتى رسام الكاريكاتير اللي بالجراید شوفوا وشلون يبالغ .

المهم هذا واحد من الناس جاء من قرية وعاش في مدينة ولد فلاليح ما شاء الله عليه جسمه ضخم وكبير أول ما جاء يشتغل في الأعمال الثقيلة كان قبل بيع ويشترى وتعلم الصنعة وراح اشتغل الين صار مساعد ميكانيكي ودايم ينزل حديد ويشيل حديد ويديه في الديزل والبنزين وتنظيف الحديد الين صار كل شيء فيه خشن يديه حرش ورجليه وهو بعد ما عليه مسحه جمال بالخيال مرة لكنه رجال ذرب .

عاد تقدم به السن شوي وهو كل ما حصل من خير روحه لأهله إلين طولت المدة عليه ما تزوج ما كتب له الله عرس ومضت عليه سنين أول ما عنده نية يتزوج

يقول ابصبر كان ناوي يتزوج من أقاربه أو من بنات عمه ولا كتب الله شيء وكبر  
الحاصل طولت المسألة معه وكبر بالخليل صار عمره حول الأربعين ما تزوج وفي  
هذا السن كل ما بغى يتقدم لأحد قالوا والله كبير ما يصلح ما عاد بغاه أحد وإلى  
عنده بيت فيه كل شيء من الاثاث ومن لوازم البيت معاميل ومراكي وفرشة وزل  
وإلى جاء أيام العيد يلبس ويكشخ ويلبس مجلد وفرد حاطه معه للزينة ولا هو  
راعي مشاكل ولا شيء.

عاد له رفيق خليل ودايم يوكله مقالب رفيق له جسمه مهوب كبير لكنه  
شيطاني دايم هو وإياه يسوون مقالب وضحك على بعض فمرة من المرات قال له  
أنت يوم أن كبرت وتقدمت بك السن ليه ما تتزوج باكر يجيك عيال ويذكرونك  
بهم قال على يدك أنا لاقى احد قال رفيقه هو لازم تتزوج بكر قال لا قال فيه  
وحدة هنا ميت زوجها وعندها بيت وأنا ما أدري البيت لها أو لزوجها اصبر خلنا  
نشوف قال البيت ما همني بس هي حرمة قال أبد حرمة سنعة عاد هو يحب الحريم  
الراهييات وخاصة إذا كانت مليانة ومعزلة.

الحاصل راحوا وتقدموا ودوروا يمين ويسار البين لقوا لهم وحدة عمرها  
ثمانية وثلاثين أو أنها داخله الأربعين بشوي وكنها التمرة اللي طاقتها الشمس  
طعمها فيها بس انها صحيحة ولها بنيتين كبار وحدة منهن معرسة والثانية صغيرة  
ولها بعد ولدين هذولا عيالها من المرحوم اللي مات واللي ماعطاه الله جسم زين  
كنه بويينة لمبة.

رفيقه راح وكلمهم وقالت ما يخالف ونبي نشوفه قبل قال طيب إلى جاء  
العصر حاولوا تمرّون من عند السوق وأنا أبجيبه معي، فعلا جابه ووقفه وقال له

شفها هذيك اللي تمشي عليها عباة شاف يدها وشاف ذرعانها وشاف ممشاهها  
وجازت له قال توكل على الله وكلمهم راح لها وخطبها له وقالت له ما يصير إلا  
خير ورجع له بسرعة وعجل وقال له ترا كلمتهم وموافقة بس أنت وش عندك من  
الجهاز اللي بتدفع لها قال ما عندي شيء حاضر إلا اللي في يدي قال له بع كل  
اللي عندك هالزل والمراكي والدلال والفرد كلهم بعهم وبيرزقك الله غيرهم  
بعهم بس واخلهم مع الجهاز يبي لك عزيمة وذبايح وبتعزم ربك .

المهم راح وباع المراكي والدلال والقش والفرد باعه وكل شيء وراح تقدموا  
لها يوم تقدم لها وجاب الجهاز قالت وش اللي أنت جايب قال هذا اللي هو يقدر  
عليه وأنتي وش تبين بعد احمدي الله أن حنا لقينا لك رجال يدخل ويظهر عليكم  
ويوسع صدوركم ويحفظ الغيال قالت والعيال ضايعين ما ضاعوا العيال عسى  
الله يخلي لهم عمانهم وأهلهم والبنات وحدة متزوجة قال هو يبي يأخذك  
ويوسع صدرك ورجال بدال ما تقعين لحالك قالت قم بس شل قشك ابي بيت  
يحطه لي وأبي كذا وأبي كذا - وإلى توها طالعة السيارات - قالت وأبي سيارة  
تجيبيني وتروح بي وحاول معها انها تخفض من الشروط قالت :

أبد وراح عاد علمه بالكلام هذا ويوم شاف المسألة مهيب في يده ما يقدر  
على هذا وفي النهاية هون .

وهذا الموضوع يذكرني بقصيدة بنفس الطريقة ونفس الترتيب وهي لشاعر  
توفى - الله يرحمه - يقال له فيصل بن عبدالله بن لذيذ الرويلي ويقول في  
القصيدة :

قال الرويلي بادي بالجذيبة  
أبدت من جاش الحشا ما طرا لي  
ومصيتني يا ويها من مصيبة  
البيت من بعض المصاريف خالي  
ويقال خذ لك يا الرويلي حبيبة  
يقولها اللي ما درى ويش حالي  
وأنا معاشي كل ما رحت أجيبه  
ثلث أجار وثلث قطعة كمالي  
وثلث على عيون الرجال اكتسي به  
وأدرج الأيام تدريجها لسي  
قاموا يقولون العرب فيه ريبه  
أظن مابه من مثل ما بالرجالي  
وهميت ابعرس في ليالي قريبة  
وبعت المراكبي والنجر والدلالي  
والفرد بعته قايل ويش أبي به  
وبيعت كل الفرش وأحصيت مالي  
وحصلت مقدار العجوز المشيية  
خمسمية تنقص قمين الريالي  
وأرسلت من يخطب عجوز هليبة  
حدبا كما قوس حناها الشمالي

رقبا وعضبا والرجل به خشية  
 وحتى حنكها صاير به ميالي  
 وجاب الخبر منه فرى الله جيبه  
 تطلب ثلاث بشوت والشيء غالي  
 مع دوشق ضمنه شرايا تعيبه  
 منهن شراشيف وطاقه شيالي  
 وأربع ذبايح وألف نقد ضريبة  
 وأربع طوايق واللواحيق تالي  
 وما يلحق الظيفة وما يعتني به  
 حتى الحطب ماعندنا للدالي

\*\*\*\*\*

ومن عرض ما قالت أمور عجيبة  
 كسوة بناتي قبل كسوة عيالي  
 وتقول أبي موتر وأبي له جنية  
 لا بنشر الموتى إلى ذا قبالي  
 وبيت كبير واسع نهتني به  
 حول المطار بمجرهد السهالي  
 ومنظم بالكهرباء وتخضي به  
 لونه خضر ومزخرف بالكمالي

قلت استخرنا ذي شروط صعبة  
ما عاد نبي العرس دب الليالي  
يا حيسفا يا فرد باللي غدبة  
نمر الثمان وبه فرايد كيالي  
من صنعته ما غير خمس رمي به  
يوم اشتره مجر به يا حلالي  
نقله معزة والليالي بغيبة  
ما تنومن صدقات سمر الليالي  
يا حيسفا ذبك المراكبي دويه  
وعشر الدلال ونجرهن والزوالي  
راحت علي سبة عجوز غضية  
مجنونة غبرا عليها ظلاللي  
للي خطبها لي ثمانين خبة  
لعل ما له عند ربي سوالي  
قعودي عزب أبرك وهي ويش أبيه  
اخير وأبرك من عجوز تلالي  
البنت ما عندي سباق ينيبه  
الموجب أن الكف ما به نوالي  
قد لي ثمان سنين وأربع قطيبة  
ازهم ولا به من يورد حبالي



والذئب لا منه تزايد قنينة  
يعوي له الثاني على راس عالي  
وإلا فأنا حظي ترادا نصيبة  
إلا أن يشاء الله عزيز الجلالي  
صلوا عدد نبت الفياض العشيبة  
وأعداد ما يذرى الهواء بالشالي  
على رسول خير نقتدي به  
وضح لنا السنة وضوح العدالي

الحقيقة هذي قصيدة فيصل بن عبدالله في الموضع اللي يشابه للقصة اللي  
أنا جبتها أما عاد اللي أنا ابوضحه أو ابلفت الإنتباه له هو أن أحيانا الانسان  
يخطب له مره لها عيال من غيره اللي مهوب مقدم على العيال اللي من غيره لا  
يتقدم أما بكره إذا أخذ المره وتبي تربى عيالها وأبوهم ميت يا أنه يحسن تربيتهم أو  
أنه يتركها من الأساس لان الولد من غيرك يالواحد يقولون مثل حصاة النعلة  
ماتنك منها لين تفصخها ماتنك منه الين تطلق امه .





### رجوى حسن الخاتمة

انا قبل ما اجيب السالفة والقصيدة ابقول شي هو ان شعر الغزل اشوفه انا  
على ثلاثة اقسام الاول هو شعر غزل حسي يوصف به الشاعر جسد المرأة عينها  
كذا عين وحش وعين غزال سودا وظلة او النهود مركوزة وخصرها كذا او  
الارداف نايبة وما اشبه ذلك فهذا هو الشعر المجسد مثل قول الشاعر :

تسمعوا خلي وهذي وصفه  
ياطا بحدب منهن الروح تنذاب  
الساق دملوج سقنه مدوده  
في منبت ما هزعه كل هباب  
ومزايم مثل النقا في نفوده  
يكسر عليها طالب الزين لو تاب  
وانف قسم صافي خدوده وسوده  
خرس بلا كحل مظاليل وهذاب  
عنقه وجيده غاملاته جموده  
وغر مناظيم عذيات وعذاب  
لا طول لا قصر بمشبه ركودة  
لا دق لا عيج مثانيه ورغاب  
وباقى وصفه ما حصينا عدوده  
للقلب نهاب وللناس لعاب

النوع الثاني غزل التوجد مايين صفات المحبوبة ولكن يقول مثلاً وجدي عليها  
وجد من كذا وكذا والنوع الثالث الشاعر الي ما يبين على روحه شي ولو انه شاف  
وقابل ما يبين غلا المحبوب مثل ما قال عبد الله بن راجس السبيعي رحت  
وسيرت على اهلها وتقهرت على اني ابجي بعد مرة ثانية يقول:

اوي فنجال شربته لحالي  
فنجال ماله ثاني بالفناجيل  
فنجال من غالي يمد له غالي  
وتهديه قبل ايديه سود مظاليل  
مد له علي وقال خذ يا حلالي  
لا يابعد من ينقل القال والقيـل  
اخذت فنجالتي وريحت بالي  
وثبتت رجلي عندهم للتعاليل  
طال الحديث وكل شي صفالي  
وارهيت منهم بالوفا والمحاصيل  
وقمنا على ما قال لاله ولا لي  
الا وعود بالليال المقابيل  
والله علم عن مقبلات الليالي  
هن يلقحن والا بعد يظهرن حيل

مأثبت على نفسه الا انه سير وخذ له فنجال وراح بس وهذا هو الواجب لان الشاعر  
الشاب اليوم يبي يكبر ويصير رجال ويتشر شعره ولا ودك يظهر له شعر مفضوح .

هاه هذا شاعر اسمه مرشد بن سعد البذالي - الله يرحمه - يوم أنه كبر وتقدم به السن وطاحت فيه الأمور تعب وكأنه رثى نفسه بهذي الأبيات اللي أبذكرها , وهو في المستشفى وفي غرفة الإنعاش قال أبيات حزينة وبين العلوم الأولى ويتذكر روحاته وجيانه ويقول اليوم كبرت ويالله حسن الخاتمة ودائم حسن الخاتمة يطلبها الانسان من ربه أن يحسن خاتمته ويصير إيمانه قوي ويعرف أن هذا الشيء واصله وكلنا أموات عيال أموات لكن لعل الذكر الطيب والدعاء من العلم النافع أو من العيال يكسب من وراه خير , هذا مرشد يقول هذي القصيدة وهو في المستشفى :


يا حول أظن الحق جتني طروشه  
 جتني مطالبه وأنا عنه منحاش  
 اليوم كن بداخل الجوف هوشة  
 مثل اختراش الزلم في داخل الجاش  
 يالله يا عسى عطفك ولطفك نحوشه  
 ويالله بحسن الخاتمة عند الأقراش  
 دنياك لو تعطيك حلو المعوشة  
 نالي سوالفها تعود على ماش  
 يا ما خذينا بأول العمر شوشة  
 وياما مشينا مع مظاهير وأدباش  
 في خايع وبيل الثريا رشوشة  
 لنجني الزبيدي في صحاصيح وأدشاش

في وسط روض مخضرات خفوشة  
 نبته جديد ومبعدين عن الطاش  
 بنوب لا طفلة ولا بمخروشة  
 عنق الفريد مذيهره زول حشاش  
 قامت تخاطبني بنفس هشوشة  
 بس الكلام وعرضها أبيض من الشاش  
 لا شك من طول الغياب محشوشة  
 تونس معاليقه من الهجر عطاش  
 أسرار في وسط القلوب مخشوشة  
 بين الثنين ولا درى عنهن الواش  
 ربعة وفاء وإلا السلب ما ننوشة  
 ماني لوجه معذب الحب خماش  
 واليوم مالي مع هل الصيد نوشة  
 عطيتها غيري بلا سوم ببـلاش  
 عند الطبيب وصار عندي وحوشة  
 ومن الأشعة صابني خوف وخراش  
 وهالحين شفني قاعد وسط دوشة  
 أصلب عضاي وكن في الجسم هشاش  
 خليت ديواني ومجلاس حوشه  
 واليوم شفني نازل دار الإنعاش

والنفس ضاقت عقب ماهي بشوشة  
مثل المقيم اللي على نو مطراش  
مولم في الحوش قشة ونوشة  
ينطر خويه بين مسرا ومغباش

الحقيقة هو في هالأبيات شرح وضعه في المستشفى وكأنه رثى نفسه وقال أنا  
عارف أنا نهايتي وش هي ، الله يجعلنا وياكم دائما من المذكورين بالخير ومن  
اللي خاتمتهم حسنة وهذي نماذج من نماذج الشعر والقصيد اللي إن شاء الله يكون  
نافع لراعيه بعد وفاته .







## قالت نصيبك

هذي القصيدة جرت على الشاعر العلم المعروف محسن بن عثمان الهزاني وهو من أسرة الهزازنة أمراء بلد الحريق في نجد يرجحون الرواة أن وفاته كانت في عام ١٢٤٥ هـ، وهو عاش ما بين الفترة اللي بدأت اللغة العربية تضعف فيها والعامية تنشط وهو على جانب من العلم والمعرفة وكل الأمور اللي نقلت عنه أكثر شيء وأكثر اللي نقلوا عنه ذكروا أنه شاعر غزلي وبس لكن له في الحكمة وسبق أن أوردت له قصيدة الإستغاثة والآن ابتكلم عن قصيدة بموضوع الغزل.

فمحسن بن عثمان الهزاني يصفونه أول شيء بالجمال حتى أن النسوان إذا شافوه يطربون لشكله فمرة من المرات فيه حريم من البادية يتكلمون فقالت وحدة منهم والله لو أشوف محسن أن ما يقوم معي ولا يقعد قالت وحدة ثانية والله لو تشوفين محسن ان تغدي عشرين وحدة الحاصل تعاندين ثلاث بنات طبعاً يمزحون بيناتهم قالن الوعد يوم الجمعة هما يوم الجمعة يدخلون البدو للديرة يبيعون اقط ودهن ويشرون تمر وعيش وسكر وشاهي على هالطريقة فدخلن هاك الثلاث هاللي متعاندات على شكل محسن وجماله ثلاث والى هاك الوحدة معها عكتين سمن والثانية معها كيسه فيها مظير اقط والثالثة معها طلي مربرب وش حليله طلي نجدي مربرب ابد غرض المندي ذاك الطلي مهوب كبير مرة هرفي اواصغر من الهرفي شوي لو تفرصه تفرص ماتلمس له عظام من ماشاء الله تربيتها له لا وغاسلته في السيل يوم يجيهم السيل جلده غاد كنه مغسول بشامبو وشعره كنه شعر التايلندي الى نفخه ولا الى جاه الهوا ابد يتحرك يمين يسار وله قرينات توها

بادية تطلع كنها اقليم على ماصة الحاصل هاك الطلي المربب جايته معها  
وهذولاهن صافات قالوا نبي تقرب ونشوف بدال مانقعد بالسوق بنصير قريين  
من باب المسجد يوم الجمعة حتى الى طلع محسن اوريكم اياه تقوله راعية السمن  
قالت طيب تجمعن صاروا قبال باب المسجد وهذولاهن صافات الثلاث هذي  
معها السمن وهذي معها الطلي عاد كنها الي معها الطلي جسمها اكبر شوي  
ومتعافية حتى لو من ورا العباة تبان لانها هي اكبرهن وغادية كنها زير مقلوب  
وهي قاعدة ماشاء الله صحتها زينة وعاد لاتواخذونا على هالبهارات هذي بس  
نبي نشوق الشباب للسالفة والقصيدة والا مالنا هدف من شي .

الحاصل هذولاهم قاعدين وكلهن قاعدات يسولفن ودايما الحرم هي  
طبيعتهن الى صاروا اكثر من ثلاث مايستكون ابد لو تقولهن اسكتوا ماسكتوا  
والدليل الى جا التراويح في رمضان شف وشلون كم مرة الي في المسجد  
يتنحنون اسكتوا يا حريم ولا منه سلم الامام من الركعة وخاصة التراويح دايماً  
يحكون ابد وهذولا الثلاث وهم قاعدات اثر هاك الساعة سلم الامام وطلع  
محسن الهزاني مع الباب الجنوبي اللي هن قاعدات عنده طلع من ضمن الناس  
الي طلوعوا ومن حسن الحظ لاينهم وعد ولا شي يا غافل لك الله الحاصل مر من  
عندهم وهو تقريبا اول من مر من عندهم يوم مر ويشوف هالطلي والى فعلا  
هالطلي ذيا يلفت الانتباه حتى شكله كذا اسود وجلده وراسه ابيض نجدي صدق  
ويوم شافه تو يبي يظمن على الطلي وهن يحكي لاهيات يحكي بيناتهن يوم اقبل  
قال بكم ياراعية الطلي راعية الطلي اللي قالت والله مايهمني محيسن ويوم  
رفعت راسها وشافته انبهرت وقالت نصيبك ، هم توهم ما اتفقوا على السعر ولا  
شي انبهرت يوم شافته .

الحاصل راح من عندهم طبعا وهذي المقولة او هذي الهرجة انا سامعها من ناس قبل ولا ندري صدقها من كذبها لكن هذا اللي ينقلون عن موضوع انه يعني جميل والا ترا اسرة الهزاني اسرة معروفين بالطيب والمرجلة وامراء على الحريق وحتى هو تولى الامارة الله يرحمه ينقل عنه في السيرة وفي الكتب في ديوانه انه تولى اماراة الحريق يمكن سنتين في هالحدود والله يعني منيب متأكد بالضبط ارجع لموضوع قصيدته اللي انا بقولها لمحسن الهزاني طبعا قصيدة مشهورة الي من ضمنها البيت الي يقول :

### برق تلالا قلت عز الجلالا

واثره جبين صويحيي واحسبه برق

ينقل عن محسن الهزاني انه عشق له وحدة حاله حال غيره من الشباب وحاول انه يشوفها او يقابلها فمأحصل له بنات العرب كإيدات مهوب كل يشيخها وياصلها لهن عفة وكرامة ومهوب بالسهولة وصلتهن لكن الشعراء دائما يحاولون وبعض المرات يمكن يتجاوزون في القول وهم ما يفعلون كل اللي يقولون ويمكن يطلع الكلام اللي في القصيدة مهوب صدق لكن ننقل اللي سمعنا .

فيه مثل ماتقول نخل والنخل هذا ملك محوط باربع اسوار والملك هذا في وسطه قلب كبير كان النخل يملكه شخص وباعه وشره اثنين وقسموه فحتى القلب الي بالوسط قسموها بالنص فصارت بعارين تصدر في الجهة ذي وبعارين تصدر في الجهة ذي فالبتت الي عاشقها محسن او وده يشوفها في واحد من هالنخيل هذي حاول كم مرة انه يشوفها عشان وده يخطبها من اهلها ولا حصل

له واسمها هيا وبين انها من علية القوم والى يوم من الايام فيه حرمة كدادة نكد  
راسها وتقول:

اصفر معصفر ليت محسن يشوفه  
توه على وقم الغرض ما بعد لس

هالبيت سمعه محسن وقال لازم اشوفها قرر في قرارة نفسه جا للنخل هذا  
اللي فيه البنت والاه مطبوط باسوار مهيب المسألة سهلة ويبان ما كل يحصل له  
يشوف حاول قدر المستطاع انه يدخل هالنخل لان كل بيت طين سواء صغير والا  
كبير مبني في نخل يسمونه قصر الاولين حاول يدخل ماقدر راح من جهة يقولون  
نخل الجيران هذا اللي ورد فيوم طلعت الغروب من القليب، هالقليب تصدر على  
اربعة غروب تطلع الما ويصب في اللزاجت هالغروب الكبار قام يقولون انه قمز  
في واحد من هالغروب هذي ويوم جت الغروب الثانية طلع في الغرب الثاني  
هذا الي ورد في بيت القصيدة يقول كذا طلع بالغرب مع الجهة الثانية يعني صار  
الرجال كنه راكب اصنصير مقلوب وطلع من الجهة الثانية يوم طلع ولا هذاك  
القصر وهو يمكن انه جاي في حدود الفجر ووقت غبشة اللي يصدرون وقام  
يتمشى في النخل ولى والله ان القصر الي فيه البنت هذي محوط بعد مطبوط بابه  
واهله فيه وكل شي لكن يبدو ان البنت مثلا تبينت في المصاييح وتبينت بشي مثل  
البرندة شافها ولمحها وقد قالوا له ان هذا روشنها هذا محلها هذا بابه الشمالي  
وبابه الغربي وهذي دريشة الروشن و شافها وطلع وانا مادري مانيب متأكد انها  
ماجازت له هالبيت الي ذكرها في القصيدة او انه تزوجها الله اعلم الروايات  
تختلف لكن مضمون القصيدة يقول فيها طبعاً يدعي بالخير لبلده ويدعي لهم

بالسيل ويدعي لديرته الي هي الحريق والديرة الي هي مجاورتها الي هي النعام  
كل هذي يدعي لها بالخير ويصف روحته هذي ومغامرته هذي الي هو طب في  
القلب وطلع مع الجهة الثانية وحاول انه يشوف وجاي حتا في وقت القمر طالع  
فيه لانه يقول :

جيته مع القمر اباري الظلالا  
جيته على وضح النقا مادرقه درق

فالقصيدة يقول فيها :

ياالله من نو حقوق الخياللا  
طافح ربابه كنه الشرذ الزرق  
لاجا على البكرين بنا الحللا  
متواصل الرعاد مع لايح البرق  
يوم يقول :

ياالله من نو حقوق الخياللا  
طافح ربابه كنه الشرذ الزرق  
ياصف الطها يوم انه تقفاه هوا والسحاب يوم يتقطع من هوا ياصفه مثل  
ظهور النعام ويوم يقول البكرين لاجا على البكرين بنا الحللا البكرين ضلعين  
في الحريق الي وصله السيل كل عدل مسيله ولهذا يقول :


ياالله من نو حقوق الخياللا  
طافح ربابه كنه الشرذ الزرق

لاجا على البكرين بن الحلالا  
 متواصل الرعاد مع لايح البرق  
 يسقي غروس عقب ماهي همالا  
 يملا الحريق ودار الاجواد له طرق  
 يسقى نعمام ثم يملا الهيالا  
 يصبح حمامه ساجع يلعب الورق  
 لي حال اصبر من فرايد شمالا  
 واصبر من الربيع الذي يسهجه طرق  
 وياحتني حنة هضيل الجالا  
 شايل روي الخيل وان حسها الفرق  
 ويا قلته في نأيفات الجبالا  
 ماها قراح مير من دونها غرق  
 جريت انا صوت الهوى باحتمالا  
 في وسط بستان سقاه اربع فرق  
 وطبيت مع فرغ جديد الجبالا  
 وظهرت مع مثله تناوح بي الورق  
 جيته مع القمر اواباري الظلالا  
 جيته على وضح النقا مادرقه درق  
 روشن هيا له فرجة من شمالا  
 وباب مع القبله وباب مع الشررق

برق تلالا قلت عز الجلالا  
واثره جبين صويحيي واحسبه برق  
وقالوا تتوب من الهوا قلت لالا  
الا ان تتوب رماح علوا عن الزرق  
وقالوا تجوز من الهوى قلت لالا  
الا ان تجوز الشمس عن مطلع الشرق  
مبسم هيا له بالظلام اشتعالا  
بين البروق وبين مبسم هيا فرق  
ياليت من ريقه ثمان تلالا  
الين يطرقتني نسيم الهوا طرق  
عندي هو احلى من بوارد اجزالا  
واحلا من السكر الى جا من الشرق  
صلوا على المختار والصحب والا  
عد السحاب وعد مايلمع البرق

يوم يقول عندي هو احلى من بوارد اجزالا بوراد اجزالا هذي موارد قلبان  
عن القويعية غرب جهة القويعية مادري عاد والله بالضبط لكنها جهة القويعية  
قلبان مشهورة بماها الحلو ماها ابد يقولون سكر فهو يقول عندي هو احلى من  
بوراد اجزالا هالمنطقة الي فيها القلبان .







## المهتوي طرد المها ما يعنيه

السالفة هذي من محفوظاتي قصيدة من قصائد الغزل العفيف وهي للشاعر  
العلم المعروف عبدالله بن حمود بن سبيل من البواهل وقبيلة باهلة من قبائل  
العرب المعروفة تولى امانة نفي في عهد الملك عبدالعزيز فترة ويرجع ان وفاته  
كانت الظاهر في عام ١٣٥٧ ومن قصائده الغزلية الجميلة هالقصيدة يقول فيها:

اللي دعا حالي كما العود باريه  
حد حداه ستاد بزعيثمانه

ان ورد القدوم بكرب علا به  
ارخي ذراعه واصفحه لين مانه

ماهو مرض واخبر هلي عن مشاكبه  
اسباب من صوب ضميري وكانه

الجادل اللي مايق في تمديره  
ذعذع هواه وضاحك له زمانه

لو كل من صوب صوب يداويه  
ويجارحه قلت اوصلوني مكانه

كل يعرفه مير ما ودي اطريه  
والا بها سيد العذارى بيانه

الى مشى كنه غرير تهديه  
والا معلمه الحمام درجانه

يا عاذل المشتاق من دون عانيه  
 لا تكثر الوارد يزيد امتحانه  
 واللي يعرف العلم ماهوب خافيه  
 ما ينعدل عود بلياً ليانه  
 نفسي مهاويته وعيني تراعيه  
 وعليه قلبي ذاهب ذيهبانه  
 في الى ومره الله يرده ويثنيه  
 أرخى المليثم لين تبدي ثمانه  
 وريعت له ترييع طير لداعيه  
 لا شاف نسره وجهره بندقانه  
 ومن الحرص جود سبوقه برجليه  
 ومبرقععه عن نوزته وكفخانه  
 لو دلهوني عنه مانيب ناسيه  
 مانيب ورع دلهه قرقعانه  
 يلعب بقلبي لعبة القوس راعيه  
 ضرف مطاوعته يده بلعبانه  
 نوب يقاضي به ونوب يدانيه  
 ماخذه بالخيالات لين استهانه  
 اوجس صوابه بالضماير وكاميه  
 مانيب من يبدي خفيّة لسانه

الرمح لو هو يطعن الخير راعيه  
 ما صاب عكوزه الى أخطى ستانه  
 المهتوي طرد المها ما يعنيه  
 كنه على زل العجم باعديانه  
 سيل نحا ما ينعدل عن مجاريه  
 لو يضرب السندا يكود اعلوانه  
 والضيف عذر معزبه ما يعشيه  
 بالحق ينطف شارب من دهانه  
 والله يا لولا العلم وادرا قوافيه  
 من مبغض يركب علينا حصانه  
 لا خائف ربه ولا هوب راجيه  
 ربيع قلبه غيبته وهذيانه  
 اني لأجيه بساعة غاب واليه  
 وأبهج ضميري لين يقطع بطانه  
 كان المراضى سيد الأحكام راضيه  
 فأنا عرفت رضاه سر وعلانه  
 الكل منا واردات ضواميه  
 مابه من الغيضة وزن ذرتانه

هذي هي قصيدة عبدالله بن حمود بن سبيل في الغزل العفيف وتصوروا شوفوا وشلون يعني في بدايتها يوم يقول: "الي دعا حالي كمل عود باريه حد حداه ستاد بز عيثمانه" النجار الى جاب الخشبه أو عود الأثل قصه هذا هو جاييه بقشره الأحمر عليه ثم جاب القدوم اللي يحسن تحسين ودلاً يقول به كذا، هذا اللي يقصده يوم يقوله في البيتين الأولات، "لا ورد القدوم يكرب علا بيه"، هما النجار يكرب رقبته كذا لا بغا يورد القدوم، فيقول "ارخى ذراعاه واصفحه لين مانه" كل شوي يازنه بعينه يشوف هو اعتدل هو ينصب به الفاروع ولا ما ينصب به، فهذا هو معنى البيتين الأولات، الحاصل الين قال في القصيدة ثمرة القصيدة أو البيت اللي فيها دايما يرددونه الناس ودايما يصير في القصيدة بيت، يوم يقول: "المهتوي طرد المها ما يعنيه كنه على زل العجم باعديانه" الى صار مهتوي ما يرده ولا يعجزه شي.

وودي اكمل واتبع السالفه الاولى او القصيدة بسالفه قصيرة ومعها قصيدة وموضوع القصيدة هذي عن اللي متول من نجد يجون يركبون الغوص يركبون البحر من ثلاث جهات، أما من قطر أو من البحرين أو من الكويت فالشاعر اللي انا بتكلم عنه كان يركب من البحرين أكثر شي يروحون مع طريق البحرين والى منهم ركبوا الغوص ورجعوا، أن كان هم محصلين خير واجد فهم طلعا لأهلهم طلعا لنجد وكلوا اللي هم محصيلينه ورجعوا مرة ثانية واشتغلوا، هاك الحين يوم الناس يركبون الغوص، وأن كانهم ما حصلوا شي واجد يكفيهم فيقعدون سنة ستين المهم أنه ما يطلع الا بشي يستاهل من يطلع على شأنه والى بغوا يرجعون لنجد قبل ما يمسون يصير فيه ناس توهم جاين للغوص وبالعادة يسوون مثل ماتقول حفل توديع واستقبال توديع للي بي يروحون لنجد واستقبال للي جاين للغوص.

في حدى المرات هذا هالشاعر اللي انا بهرج عنه كان له ثلاث سنين ما طلع  
ومحصل له قريشات وموزيّه وحريص عليهن ماينام الا وهي في مخباته ولوانها  
تفرص جنوبه وتوديه لكن ولو صابر الحاصل انها معه في مخباه وحريص عليها  
وكل ساعة يتلمسهن هن فيه والا لا لأنه يطلع قريب يوم جا هاك الليلة والاه  
بيروح من بيته بيحظر الحفلة هذي وهو لوانه وزاهن في مكان ما يدري عنه احد  
كان احسن له لكن جاء ابليس وقال لا تخلي دراهمك في البيت يجي من يقمز  
عليهن وتروح خلهن معك احرص عليهن، خذهن معه فعلا وخلاهن بمخباته  
وجا للحفلة ومع الحفلة تخبر سعة صدور وجمعا وناس واجد المهم انها تأخرت  
الحفلة إلى نصف الليل اناسة وضحك وكهكهة وسعة صدر وقصيد فالهم يوم جا  
بيطلع لا تامن انه يعني مع الزحمة أو مع القومة يمكن أنه غفل عنهن وجا من جا  
وتف مصيلحته ذي اللي في مخباته راحن ويوم دخل يده قي مخباته طق بيده كذا  
والى والله ضفوره تاقع في ضلوعه من تحت ما حدرها شي يوقي اللي هو خابره،  
والى والله يوم ضاق صدره معناته يبي يقعد ثلاث سنين ثانية مثل اللي مختبر  
نظام ثلاث سنوت ولا نجح لازم يختبر مره ثانية.

الحاصل جلس ماهوب طالع فاضي فعاد تمثل بالأبيات هذي والحقيقة هي  
عجيبه ويقول عن ليلته اللي ما نامهاهماه يوم طلع وراح منهم تالي الليل هذولا  
ناموا كلهم بس هو ما نام يا طول ليله كنها ليلة شتا مافيه عشا ويقول عاد في  
الأبيات هذي:

البارحة ما احسب ورا ليلها صبح  
وانا احسب الدنيا غدت كلها ليل


كل الليالي الماضيه جالها ربح  
 والبارحة راحت بكل المحاصيل  
 بالله من غضّات الأنهاد لا تبج  
 حسبي على نقاض شقر المجاديل  
 بدل نباه الزين لي بالنبا القبح  
 وعزّم على حربي بليّا دواليل  
 يحدّني عقب المودّة على الذبح  
 كما يحدّون الكسايب أهل الخيل  
 كني عضيض الغلت خطر على النبح  
 ينبج الى ما شاف ضوح المخايل  
 اثر الهوى له غبّة شبحها شبح  
 عسر ملأوا موجهها يفتر الحيال  
 منها فتر حيلي وأنا جيّد السبح  
 من همّها دونك عظامي نواحيل  
 أمر قضاء الله عليه كما الصبح  
 يوم ادلجت بي مدرجاة المحاحيل

هالأبيات للشاعر عبدالله بن محمد الصبيّ الملقب بـ(مبيلش) شاعر من  
 أعلام الشعراء في نجد من أهل شقراء يوم يقول: " كني عضيض الغلت خطر  
 على النبح " المعنوس اللي ينبج اللي يعضه الغلت اذا تم أربعين يوم وهو ما عيلج  
 يقولو الله يدفع البلا ينبج وأنه يموت داء الكلب يصاب به فيوصّف نفسه يقول اثر

الهوا كايد وعسر، ولا حظوا بأخواني حلو هالأبيات وعسر القافية اللي هو مشا عليها (أبح) هذي حتى الكلام العادي يمكن ما تلقاه.

مشد القصيدة جميل جداً وطرق جديد يعني الحقيقة قليل اللي يختار مثلاً مثل هالقافية يمشي عليها وتمشي معه. يعني من هالقصيد الجميل ومن خلال هالأبيات الجميلة هذي الأولة الغزلية قصيدة عبدالله بن حمود بن سبيل وهالقصيدة الثانية تبين لنا الحقيقة عن تراث الآباء والأجداد وخاصة هاللي جاين يركبون الغوص، يعني كم كانوا الناس يعانون في روحتهم للغوص ويقعدون سنة ما يحصلون شي وسنة يحصلون والحين يالله لك الحمد والشكر الخير عم والنعمة عمت وعسى الله يقيدها بالشكر وهالأمان اللي حنا عايشين فيه وكل ولله الحمد بلدان الخليج هذي عامها الخير والرخا والنعمة يالله لك الحمد والشكر يا جماعة يجب على الإنسان أنه دائماً يشكر ربه ويحمده ويدعي للمسلمين ان شاء الله بالخير ويدعي لهم بالعز والسودد.







## الديك الغالي

مرة من المرات واحد من الناس مر مع سوق حراج والى واللّه هاك الظول عليه ناس واجد وش كثرهم اللي قاعد واللي واقف والدلال في الوسط ويحرج الدلال طالع حسه والاه يقول: أربعتش أربعتش ونص قام جا الرجال هذا وفهق الناس لين ظل يشوف وش في الحراج ولا هاك الديك الكبير اللي عجيب حجمه وشكله وحتى ريشه ملون وشكله ملون واستغرب وقال الحين هذا واصل سبع طعش وثمان طعش قالوا ايه يسأل الواقفين لأن أطيب ديك في هاك الوقت يباع بسبعة قروش وثمانية قروش يعني إلى زاد زاد مرة وصل إلى ١٢ قرش بس الحين هذا سبعتش ثمانطعش والاه يصيح راعيه ثمان طعش ثمان طعش ونص تسع طعش سأل وش هالميزات اللي راعيه سعر هالديك بهالقيمة وخلي الناس تراود فيه الى هالحد قالوا ناظره والاه فعلا غريب شكله.

أول شي عرفه اللي من فوق أفرق ماهوب عرف عادي جاي على شكل تاج وبعدين الريشة اللي تحت حنكه تحت منقاره صايرة مثل ورق الحميض كبار حمر وله منيقير صغير طالع كنه حبة صنوبر وعيونه غايصة في راسه كنه غموص سكري ويطالع كذا ويقل هاك الجناح يفرده كذا ويرجعه وحتى ريشه ملون احمر وأصفر وشي من السواد عليه وشي جاي شكله ذهبي ورقبته تعطي ألوان والى هذي رجله صفر ما عندك أزين منها كنه موطا في كركم وذنبه مرتفع كل ريشتين لحالهن طالعات هذا بس وصف جسمه الخارجى من برّا وحجمه كبير يالله يروزه يعني يالله ينشال من الأرض من ثقله بعدين هالديك يروجع هاك الأذان الغريب

أذانه ماهوب مثل أذان الديكة العادية كل ما بين خمس دقائق كذا يرقع هاك الأذان  
كنه كوارتز على توقيته فيقولون عاد اللي قاعدين أن أذانه غريب وهذا اللي رفع  
سعره قلنا وشلون قالوا أن كل الديكة العادية تذن تقول: " أأأأ " وبس هذا لا  
يقول: " أأأأأأأأأأأأ " ، الترجيعه التالية ذي مهوب كل ديك يجيبها هالديك هذا  
بس عشان كذا ارتفع سعره .

الحاصل قال هالرجال الحشيم لراعيه حدّه يالأخ قال يقول راعيه بعشرين  
قرش صافي يعني قرش للدلال سعي قال شرينا توكلنا على الله شراه الرجال  
وخذه وحضنه شاله يوم شاله وهو قد سلم قيمته طبعاً جو العييل اللي كانوا عند  
الحراج كلهم اللي يناظر رجله واللي يلمس ريشه ولحقوا اللي شراه لين راحوا  
لأسفل السوق والله ويقول لهم يا عيال عودوا أنتم ما قد شفتوا ديك وراكم كذا  
الله يصلحكم الحاصل وصل لبيته ودخل البيت وحطّه والى عنده وليد وبنية  
الوليد اسمه سليم والبنية أسمها منيرة يعني اعمارهم الوليد عشر سنين او ١١ سنة  
كذا والبنية في حدود ٩ سنين عشر حطّه في الحوش قام قال بالله يا بناتي بالله  
يا عيالي بالله طبعاً زوجته وبناته اللي في البيت كنسوا الحوش ونظفوه وحطوا له  
هاك المكان وقعد على مثل ما تقول شي مرتفع وقعد يطالع هالديك يوم حطّه في  
الحوش قد رشوا في الحوش ماء وفاع منه مثل النملة قال لالا ما نبيه ياكل غل  
ولا ياكل حشرات عطونا عجين حنطة ويجيبون هاك الحنطة ويعجنها عجينة خشنه  
ويدلي يعربد من الحنطة ويجدع له وهالديك ينقر مثل اللي يتعلم له على آلة  
كاتبه हालحين ماعاد فيه آلة كاتبه ماعاد فيه الا لوحة المفاتيح بالكمبيوتر ينقر وياكل  
والبنية والوليد متسدحين متبطحين عنده يا عيالي قوموا تغدوا ولا يوم سبههم

هاك الديك خلاهم قبل عنده يناظرونه قوموا تغدوا الله يصلحكم ما طاعوا  
يقومون ابد مستانسين على هالديك وكل ما بين خمس دقائق عشر دقائق كذا يرقع  
هاك الأذان .

استانسوا جيرانه وانسطوا واللي كانوا منول يعبون خراشيات يقومون عليها  
ابد صكوها هالديك يأذن في الوقت المناسب بعدين عاد قالت المرة اللي هي مرة  
الرجال راع الديك ، رح يا ابن الحلال لا تخلي الديك لحاله جب له دجاج قال ما  
يخالف راي سديد راح لراعي هاك المزرعة واختار أربع دجاجات كبار الوحده  
على كبر هالمخدة بيض كل وحده خاط عرفها شبب حطهن عند هالديك وخلاه  
يطمر من هذي على هذي الحاصل استانس على الديك له الحين يجي شهر وهو  
أبد يروجع هالأذان وكل يهرج به الله ياديك شرهه فلان اترك عنك اللي مهوب  
مثل ديكه لا يهمنك الحكي .

المهم فيه واحد من جيران راعي هالبيت صاير بيته ماهوب مقابله مرة من  
جنوب منفهق عنه شوي رجال ما فيه خير طفس نجس اقيشر ما فيه خير الله يكافينا  
الشر قد تفاسل هو وراعي هالبيت علشان موضوع فلقة بزر هاك الحين ودلاً  
يبغضه قام يبغض راعي البيت اللي عنده هالديك ، الحاصل هذا من نجاسته عليه  
ويوم شاف الناس حابينه علشان موضوع الديك راح وسلط على الديك قطو ،  
جابه له قطو مدري وين لقاه في مجبب ، قطو اسود كبير يروّع طول المخدة أم  
نفرين رجلية محجلة بالبياض هذا القطو عتوي راسه متصل مع جسمه ويروّع  
اسود يروّع ، قام هذا جابه ودلاً يجدّع له لحم ويجدّع له جناحان دجاج مشويه  
ويجدّع له عند باب راعي الديك الين دلاً يقرب عليهم ولا يوم أذاهم أذيه الغافلين

كل ما قعدوا الظهر والا العصر ولا دروا الا اللي يصيح عندك عندك القطو الحقوه  
العيال هذولا اللي بالنعلة واللي بالمكنسة ولا بقى ماعون ولا بقى مغراف ما  
رجموا به هالقطو قال يا ناس هالقطو خطر على هالديك اخاف ياكله ويروح علينا  
كذا بس كم مرة يبيه حتى الدجاج ماهوب يقربهن ما يبي الا هالديك، قالت ام  
راعي هالديك يا وليدي رح فصلّ عليه شبك حط له شبك امه عجوز مستانسة  
بالخيل على هالديك لأنها تقول إلى أذن تطير الشياطين أذان الديك يالله من  
فضلك زين اللي ما في بيته ديك غلطان .

راح فعلاً وفصل له شبك صغير وحط له بويب كنه باب صندوق بريد صغير  
وحطّه في السطح وخلاه الى جا الأذان طلّع راسه من الدريشة وأذن وعلى  
هالطريقة والدجاج بكيفه حتى لو يضيع منه شي وحده والا تثنين ما يهم بس  
خايفين عليه من هالقطو اللي يروّع، يوم جا يوم من الأيام والاه مسريّه المغرب  
موديه لبيته وحاط عنده حبيبات عيش وحاط عنده مويهه ويشرب منها ولا عنده  
خلاف وإلى جا وقت الأذان طلّع راسهه وأذن أثر القطو هاك اليوم حابل له والى  
أثم القطو يروّع هماه أسود هو القطو وعيونه تولّع في الليل وحاط أثمه عند باب  
الشبك ويوم طلّع راسه الديك على العادة يبي يذن " أأ أأ أأ " على العادة والى  
القطو فاق أثمه يروّع أثمه من داخل أحمر غادي كنه علبه كبك ويوم ان الديك  
طلّع راسه هاك المرة وهو يكمشه يحلفون عاد اللي شافوه ولا انا مدري يقولون  
والله يا أول الأذان انه في المنارة نسمعه وتالي الأذان راح في بطن القطو توحيه  
ولهذا مبيته الرجال في القصيدة صيحو العيال ييه الديك كله القطو كله القطو  
ويقول انا عند الدلال كنت أتقهوى منوّل أتقهوى يقوله راعي القصيدة الحاصل

أصبح بهالفنجال واخذ العصا ونعاله بيديه هاه الحقوا القطور رده هاته عندكياه  
 ماش دخل القطور صفة في البيت وقام الرجال وجاب هكالبندق وثور بهالقطور  
 طلقة الله يجيرك مابغى غيرها وقال عاد القصيدة هذي بهالمناسبة ويقول فيها :

لي ديك ضبط توقيته  
 يوعي النايـم تصويته  
 لولا طيبه ما شـريته  
 بريال وقرش الدلالي  
 لكن ممدوح لي طيبه  
 ترتيب الساعة ترتيبه  
 لـولا أذانه وش أبي به  
 مانيب بسن الجهالي  
 آذانه بالحيل كويس  
 يذن على أذان الرئيس  
 وأنا أجزم مانيب أقيس  
 أنه رخيص بريالي  
 مكبر حظك ياللي حاشه  
 ينام مريح بفراشه  
 لو ما مليت الخراشه  
 يوعيـك أذان التالي

يعجب من شافه بنقوشه  
والتغلبه فوقه منقوشة  
والنصبه كبر الطربوشة  
والرجل بحجن السروالي  
عرفه أفرق ماهوب الدم  
لكنه مصبوغ بالدم  
يصدم بالهوش ولا يصدم  
من ناظر هوشه يهتالي  
عجين الحنطة مأكولة  
مع ما حصل من محصوله  
الحكي كثره وشوله  
ياكل مع بنتي وعيالي  
من غليه عندي عززته  
بأربع فرخات جوّزته  
كتي سلطان من حزته  
القصد أنه عندي غالي  
أثر الجيران حسدوني  
على ديكي زين اللوني  
قالوا نرسل له بزوني  
وذف بالدرق وختالي

وأنا يا غافل لك الله  
مدري بخيانة خلق الله  
ما هوجس به قلبي والله  
آمن ولا هي في بالي  
اثر الدنيا عابية له  
تبرم للديك وتفتل له  
ما هي بالموت اوية له  
ما هوب أول ولا تالي

\*\*\*\*\*

يوم الله دبر ما كان  
صيف ديكى بالأذان  
قحص مريوش وعجلان  
قلبه من صيفه يجتالي  
بين راسه هو وحنوكه  
والى أن الفرجة مفكوكه  
على اثم الكيسة متكوكه  
بائس البرزون الخيالي  
واصهل بأذانه ما يدري  
أن الحقّة حطة خبري

وافقع ضاروبه بالعبري  
ولى أنه من راسه خالي  
بالمنازة أول صوته  
والتالي في بطن الحوته  
توحي في بطنه زغروته  
يلوي بالغبة ويلالي  
راس الرئيس صار اضحوكة  
عليه البس اقفل بوكه  
ما فكّه طوعه ونسوكه  
من سيف القوم القتالي  
حدى زوجاته حسّت به  
لكن موته ما دريت به  
قالت يختي رجلك وش به  
يرقص كنه فيه هبالي  
قالت يلعب لعب العرضة  
أو ينفض بشته فيه أرضه  
ولا الرئيس يقضي فرضه  
لا والله طاح الرجّالي  
جت لّمّه قالت لا باس  
وراك نيم بالساس



يا خواتي ماله راس  
وين رويسه واعزاً لي  
صاحت من ذا فنه فنه  
واعقلهن قالت غطنه  
وادعن للميت بالجنة  
عمر الشمس ووفيه زالي

\*\*\*\*\*

أنا قاعد عند دلالي  
والى حس صياح عيالي  
واقحص واصبح بالفتجالي  
عجل مذعور مهتالي  
وانا مدري وش القصّة  
ظنيته سارق بالحصّة  
أخذت الشوم ابلصه  
وأدوس ببطنه بنعالي  
ثبت ثبت يا صياح  
جاك مبندق يا رمّاح  
ترا نصف الحرب أفراح  
أخشى من شي بعيالي

يوم أني قربت اللجة  
 قلت أنبوني وش الهرجة  
 والا هم عني في سجة  
 يبكون بدمع همالي  
 قلت عيالي وش مبليهم  
 اللي فيهم مالا فيهم  
 قالوا هود لا توذيهم  
 تزيد الويل بولوالي  
 بسّ غال الديك الغلوة  
 مزع راسه بأول عدوة  
 قلت أنه لعيالي فدوة  
 وسليّم هو راس المالي  
 ناديت سليّم ومنيرة  
 وشرطت لهم على نيرة  
 قلت الديك ابشري غيره  
 هذاي موصّ يشرالي  
 واقفوا من عندي مرضيهم  
 والشرط الجيّد بيديهم  
 لولا أن المولى هاديهم  
 ما ارضاهم شرطي وأقوالي

عسا الخاسي تعرفونه  
هو بزوناو بزونة  
وش كبر الهر وش لونه  
نبي في ذبحه نحالي  
قالوا بالبياض محجل  
جب راسه لسليم عجل  
تلقاه بطايتنا يهجل  
اسرع من راع الخيالي  
قال سليم يا باباه  
شب البنندق في علباه  
دام السرقة في مخباه  
تشهد عن لوم العذالي  
عبيت البنندق من حيي  
قلت أن جا صيروا صاحيني  
واثره بالصفه يوحيني  
من صبحه فيها نزالي  
يوم أني هجيت الباوي  
كشر بأنياه حرابي  
وأخش البنندق بشيابي  
لين الدومي صار قبالي

بالثاريه ديك سليم  
 تسرق وتقابل يا دغيم  
 طخيته والاه مخيم  
 شروى شن الدلو البالي  
 لو انه راعى للجيرة  
 كان أحسننا معه السيرة  
 لكنه شعبث بالديرة  
 بأول هدة دمه سالي  
 تمّت وختم المربوعي  
 صلاة الله كل اسبوعي  
 على اللي دينه متبوعي  
 ماناض البرق الهمالي

هذي القصيدة طبعاً اللي قايلها الشاعر عبدالمحسن بن ناصر الصالح من شعراء مدينة عنيزة المعروفين - رحمه الله - ويوم أنه يقول: "لين الدومي" يعني اللي عليه الدم "طخيته والاه مخيم شروى شن الدلو البالي" يعني مثل الدلو اللي مزرعة، فهذي أوصافه في القصيدة ولذا تلاحظون في القصيدة فيها بعض الألفاظ الشعبية القديمة اللي الآن ما عاد تستعمل لكن نستفيد من القصيدة هذي ومن الموضوع هذا المرح والتسلية لكن الفائدة اللي أنا أراها فالقصيدة هذي أنها محتفظة بالألفاظ الشعبية القديمة اللي الآن ما عاد تنطق وراحت، وهذا من فائدة الشعر الشعبي، يحتفظ بالألفاظ والكلمات القديمة علشان الأجيال القادمة يعرفونها والي شرحت لهم ووضحت لهم عرفوها.

## الميل لراعي المال

هذولا جماعة من الاخوان والاصدقا عددهم ثمانية او تسعة ودايما منسجمين مع بعض لان صداقتهم الحقيقة قديمة ناس من اول العمر وناس تعرفوا على بعض في العمل وكلهم من المتقاعدين او اللي مالهم عمل اساسا واحد منهم رجال حبيب ونشمي وعنده هاك السيارة تاخذهم التسعة كل ثلاثة مثلا في مرتبة ويروحون اسبوع مثلا لحايل يتفرجون ويقعدون اسبوع ومرة يروحون للحجاز ياخذون عمرة ويقعدون في مكة وجدة والطائف ويروحون اسبوع لابها ويقعدون اسبوع ومثلها للمنطقة الشرقية يروحون مثلا للدمام والخبر والاحساء منسجمين مع بعض دايما لان روحاتهم مهيب يوم يومين يقعدون فيها اسبوع اسبوعين وبعدين يرجعون ويريحون مثل ماتقول شهر يقعدون مايرحون .

هالمجموعة هذي فيهم واحد دايما بصير صاحب نكتة هو الي ينكت عليهم وهو اللي يسولف وهو اللي يضحكهم ويوسع صدورهم بالسوالف وواحد ثاني ذرب هو الي حول القهوة وحول الاكل وحول الطبخ ولازم يصير فيهم اثنين ثلاثة حشيمين يعني كل ماجا احد منهم يقوم قيل لا اقعده يابو فلان الحاصل واحد منهم شاعر عاد قصيدة الشاعر ابجيها عقب لكن ابعلمكم سالفه اللي يضحكهم الى جوا في البر دايما هو الي ينكت وهو اللي يضحك لا بعد ويسوي فيهم مقالب ويوذيههم الى ناموا يصعب عليهم ما حار مزح خفيف ، ودايما اللي في البر اكثر مايسولفون اما عن الشعر والا يغنون والا مثلا يتكلمون عن الجن وليلة يتكلمون عن اللي ينظلون وليلة يتكلمون عن الذبابة ومثل هالمواضيع .

هذا مرة جاب لهم سالفة عن النطل وتضحك وابسمعكم اياها ولو انها عن النطل  
 لكن يعني فيها شي من النكتة يقول لهم ان فيه اهل ديرة من ديار القصيم سووا  
 لهم حفلة فاهل هالديرة هذولا اهل بيع ومشتري مهوب اساسا اهل فن او يحبون  
 الفن واهل بيع ومشتري وناس يعني حالهم حال غيرهم الحاصل انه وافق مرة من  
 المرات عندهم عزيمة كبيرة عازمين لهم مثل ماتقول مسؤول كبير او امير او واحد  
 شخصية وحاطين لهم هاك الصيوان الكبير سراقق على ما قالوا بمخيم كبير  
 وهناك القهوجية والما والخطب مجيوب في لوري مكبوب جنب المحل اللي  
 يسوى به القهوة والشاهي وجنبه الدلال والفحم وكل الادوات لكن في مدخل  
 هالسراقق حاطين صفة هاك الدلال رسلان تجي لها حوالى خمسين دلة ودلال  
 بغداديات مصفوفات وعندهم هاك القهوجي الذرب النظر عليه هاك الثوب  
 الابيض وعليه دقلة سودا والشماع وهو يلاحظ الدلال وذرب من يوم يقبل واحد  
 يلاحظ ويقول للي عنده قم قم صب للرجال قهوة وعنده وحيد ابن حلال جنبه  
 هو اللي يغسل الفناجيل ، السالفة على هاللي يغسل الفناجيل هالحين .

المهم جا الرجال المشرف والمسؤول عن الحفل وقال يالربع هالحين بيبي يجي  
 الامير هاللي حنا عازمين وودنا نبهش به ونحط عرضة وش رايبكم؟ قالوا تم اي  
 والله خلنا نحط عرضة تم والعيال عندنا وكل شي عندنا يالله ومار يتقون هاك  
 العيال يجيلهم ثلاثين ولد منا وثلاثين ولد منا والى هاك العيال المطاليق نظرين  
 وبالعقل والشمع ومطقمين بثياب بيض ويوم انهم صفوا وينادون هاك الواحد  
 معهم في الحفل يقاله تركي . . تركي قال نعم تعال تعال رح جب لنا طبول خلهم  
 يعرضون هالربع قال ان شاء الله ويركض لهاك الديرة القرية وملا الوانيت طبول

وجابهن لهم وحطهن والى عاد هذا راعي الطبول يعرف القصيد راعي شعر تركي  
 ذا وجيد في العروضات ويعرف يلعب بالسيف ولايس له مجند وعليه فرد منا  
 ومنظره من أحسن شي قال يالله يالله ياتركي علمهم العرضة وعطهم شيلة من  
 الشيلات الزينة ومار يصف هو يوم جاب الطبول قال خلهم يشيلون، شل لهم  
 بيت من العرضة ويم شالوا البيت اختلفت اصواتهم الي قال كذا واللي طلع قبل  
 الثاني قال لالا ماهوب كذا خل يشيل لكم تركي بيت وشيلوا وراه والى تركي هذا  
 له حلق كنه محقان دهن وصوته جهوري والحكي منهو عليه على اللي عند  
 الفناجيل نحيف صغير وحيد من غير حقران من الرجال لو تكسر ساقه غير  
 ووجهه صغير وعييناته غطش والاه متخيراه راعي القهوة يروح به ويجيبه معه  
 القهوة ينفعه لانه يمكن يقرب له او انه باره او انه يعرفه الحاصل انه مختاره لعدة  
 اغراض اولانه حليل ولايق ولايضيق ولاهوب كثيرة طلباته ولا قوماته وبعدين  
 فيه ميزة اصابعه دقيقات وطوال تدخل بالبيالة بالراحة المهم انه دبق لبق ونظيف  
 وكل ساعة يغير الما حق المعدنة الغضارة اللي فيها الفناجيل والاه قاعد يغسل هو  
 راح مدري وين صد يوم جا هاوشه وين رحت قال ابد رحت هنا اجيب الما قال  
 اقعد اقعد غسل الفناجيل صفهن في الطوفرية ذي المهم والى تركي ذا في الوسط  
 واقف تركي حاط شماغه ويطارق عيونه منا ومنا يناظرهم قال له عاد راعي المحل  
 شل بيت شل لهم بيت خلهم ينهضونه مثلك شف اصواتهم مختلفة وياقف تركي  
 في الوسط وهذا يناظره راعي الفناجيل يناظره كذا وهو يغسل يوم وقف تركي في  
 الوسط ويرفع البيت :

(ياسلامي على وافى الخصايل) بصوت قال عاد ذا اللي عند الفناجيل اوف  
ياحلقه ذا بقوله لتركى ذا تصدقون يوم وقف حلقه كنك مثبت صورة وقف حلق  
تركى وهو يطيح يحلفون اللي في الحفل والله انهم حاطين شماغه في ائمه  
لا يدخل فيه ذبان وبعدين قالوا له لراعي الفناجيل قم اتفل عليه فال انا ماقلت  
شي قالوا وشلون ما قلت شي وتقول اوف ياحلقه قم والمهم يجيبون المعدنة اللي  
في الغضارة عقب ماغسلوا الفناجيل فيها موية كنها موية اديتر صبوها في حلق ذا  
اللي قاعد تركى هالمسيكين اللي صارت عيونه خضر بس اشوا ذكر الله عليه  
وصبوا الماء عاد هذي من السوالف الي يسولفها عليهم هو رفيقهم اللي في البر  
هذي هاللي انا رويتها لكم .

الحاصل نرجع لموضوعهم هم منسجمين وكل يوم في رحلة وروحات  
وجيات وهاللي ينكت عليهم شف وش لون الاصدقاء ، يوم يدخل موضوع المادة  
وما موضوع المادة والاشيا ذي والتشره تخرب الصداقة ترا ، المهم ان هالمجموعة  
يروحون ويجون ويقدرن الشاعر هذا اللي معهم في روحتهم وجيتهم .

فيه مرة من المرات ما جوا في مقرهم الاصيلي اللي هم فيه وحصل ان واحد  
منهم توفى في مشترى ارض كبيرة مثل ماتقول ماهوب حاسدهم قام واخذ منهم  
مبالغ مبلغ معين من كل واحد وصارت بينهم شراكة وقطعوا الارض وباعوها  
وحصلوا فيها خير قاموا عاد عقبها يدارون خاطر اللي شرا الارض ويناظرون  
خاطره دايم صار ميولهم له اكثر لانه جاهم منفعة من وراه فبعد مدة لاحظ الشاعر  
هذا انهم اذا جوا بيروحون مامروا عليه واحد قال خلونا نمر على فلان قال ثاني  
اوه نبي نصيف خلوه بعدين مرة ثانية هاه لاحظ انهم كم مرة مايرون عليه قال



لهم مرة ورا مامريتوا قالوا والله يابو فلان صرت متب على الدرب قال عجيب  
وشلون مانيب على الدرب قبلكم تمرون علي ومدري من قال صرت متب والم  
يقول ليه مانيب والم، الا والم وش معنى يعني تغيرتوا علي يعني يتشره عليهم  
وانا رفيقكم الاول .

فعاد القصة هذي والسالفة تنطبق عليها القصيدة اللي قايلها شاعر من اعلام  
الشعرا المعروفين الشاعر الحربي : بدر بن عواد الحويفي يقول في القصيدة يتشره  
على الاربعة هذولي ويقول :

اشوف بعض اصحابنا ماييمرون  
وانا الجفا من صاحبي مااستحقه  
وعندي خبر عن غاية اللي يكون  
شافوا بحالي من جفا الوقت رقة

هو صح كان مع طول الوقت ومع طول الايام كنه بدت صحته تردى شوي  
او انه يصير ثقيل هذا اللي خلاهم بعض المرات يقولون هاه كنه مهوب والم  
بيعطلنا هذا اللي خلاهم لكن ولو المفروض يتحملون يصبرون هذا رفيقهم من  
اول الوقت :

اشوف بعض اصحابنا ماييمرون  
وانا الجفا من صاحبي مااستحقه  
وعندي خبر عن غاية اللي يكون  
شافوا بحالي من جفا الوقت رقة

وانا من الهجران مانيب ممنون  
ما احفا رفيقي لو جفاني ماعقة  
لو انهم عن غاية القلب يدرون  
مروا عليه ما عليهم مشقة  
لكن مع الدنيا واهلها يميلون  
ويعطون راع المال من فوق حقه  
لو تنفع الدنيا نفع مال قارون  
ماله وجاهه ما عدل وزن بقه  
الدايم اللي بقدرته كون الكون  
ارسى الجبال ومجرى الانهار شقه  
والادمي ماهو عن النقص مضمون  
يفنى ويفنى المال جله ودقه  
عمر الفتى لو طال للحق مرهون  
لا يا من الديان بابيه يطقه  
اتلا العهد لاقالوا فلان مدفون  
ولفوا عليه من ارخص الخام شقة  
ويقرا الكتاب اللي به العبد مديون  
والكل يحصد ما بذر واستحقه  
هذي هي القصيدة الي قالها بدر بن عواد الخويفي والحقيقة القصيدة فيها عبرة  
وفيه حكمة .

## اعمل الخير وجزاك على الله

موضوع السالفة حول الانسان اللي يعمل العمل الطيب والعمل الخير والعمل اللي ان شاء الله فيه ثواب واجر ويلقاه قدامه ان شاء الله من زهاب الاخرة مرة من المرات عندنا في اسرتنا كان عندنا مريض في المستشفى وطلبوا منا قالوا لنا جيبوا ناس يتبرعون بالدم علشان بنسوي له عملية فالحقيقة تلفتنا في ربعنا القرين اللي حولنا لاننا على عجلة ماامدانا نتزهب عاجلونا بالامر لازم بكرة نجيبونهم والى وين تواعدهم وتروح بهم لبنك الدم ومدري ويش وسحب دم وهذا يصلح وهذا مايصلح المهم وادور وادور والى هاك الواحد معنا في العمل رجال خضر مصك متين يالله يدخل مع الباب قلت بيني وبين روجي هذا حبيب وبين حلال ويدور الخير وياخذني معي يتبرع بدمه هذا عز الله يكفي عن ثلاثة انفار الحاصل والله واعلمه اقول له يعني ان كان انك تبي الاجر والثواب تنقذ هالمريض انت ماشاء الله تبارك الله الدم عندك واجد ومتوفر هما جلده اسمر مادري عنه، هما الحين الى شفت الرجال الابيض مصوفر تعرف ان عنده فقر دم من صوفرة وجهه لكن اللي مثلاً نافع الدم في وجهه بين لكن الاسمر ماتعرف مهوب بين مرة، مهوب بالحيل بين.

الحاصل اني حكيت عليه واقنعته وقلت له اغديك تعمل خير قال لا افا عليك ابشر الساعة المباركة متى؟ قلت باكر، والله مصك ومتعافي ماشاء الله تبارك الله عليه جسم قلت هذا بدال مانودي اثنين والا ثلاثة يصير هذا فيه بركة هم يمكن مايبون منا الا شوي جيت واقنعته وقلت مالك الا الاجر والثواب وتنقذ

على قوله القايل مريض تنقذ لك نفس وبعدين ترى يا فلان قال ايه قلت ترا ازين لك الى تبرعت قال كيف ازين لي قلت ايه نعم ازين لك تجدد عندك خلايا الدم بالجسم وتجدد عندك كريات الدم وبعدين تعوضها لكن الى ماتجدد الدم في الجسم يقولون اهل الطب الحديث انه الى ما تجدد كريات الدم انه يصير فيه مثل نوع التخثر الله يكافينا الشر .

الحاصل خذت هالرجال عند بنك الدم ويوم جينا قالوا وين ؟ هما حنا قلنا جب ثلاثة قلت خذوا هذا عن ثلاثة ابد جيبوا مواعينكم وجيبوا اللي عندكم ولاهوب مخالف حبيب ولحية غائمة قال زين يوم قعدوه على الكرسي وقاسوا عنده الضغط ومدرى ويش المهم اثر المسألة مهيب بالكبر والمتن والا نافع الدم في وجهه والا مانقع المسألة شي طبي ماندرى عنه قاسوه وضغطوا اصابعه منا ومنايين يسار يوم دريت والى اللي ينادى قال وين راح اللي مع الرجال قلت نعم نعم خير قال يالله وده ود خويك لايطيح علينا هنا قلت ليش قال هذا من فقراء الدم قال ابد شوي ويصفر خذه خذه وده مايصلح ابد مرة قلت كيف قال هي مهيب بالاجسام هذا شي حنا نعرفه انت جب ثلاثة اربعة خمسة ستة وننقي منهم قلت عجيب قال نعم هذا هو ، الحاصل وانا اطمر والى فيه واحد راعي مؤسسة اعرفه عنده عمال من هالطقة التالية اللي هي شرق اسيا عمال وش حليلهم صغيرين والى قايل لي ترا مهيب بالاجسام قلت عجيب المهم واروح للرجال هذا والى عنده طاقم عمال وناخذ منهم والله يجيلهم ستة سبعة قلت تكفى قال ابشر الساعة المباركة هذولا هم مغير ياكلون وينامون مالهم شغل حتى هاليومين ماعندنا عمل خذهم قلت توكل على الله واخذهم واوديههم انا والاهم ماشاء الله تبارك

الله كل واحد منهم ماغير عروقه وجلده تصدق انك اذا قبصت الواحد مع اصبعه  
انه شوي ويرجع الدم ماشاء الله المهم واودبهم انا يوم وديتهم قالوا حقين الدم ايه  
هالحين مضبوط قلت وشلون قال ابد هذولا كلهم مثل الحمثان بالدم خلاص  
خلهم المهم وياخذون والله كم من كيسه من هذولي فالحقيقة فزعو لنا الله  
يجزاهم خير .

عادهذي حقيقة فيها انقاذ نفس والحين ولله الحمد كل الدول تشجع على  
التبرع بالدم لكن بعض الناس تقل خايف ، ياخوي ازين يتجدد لك الدم وبعدين  
الى اكلت فاكهة ولحم تعوض يومين ثلاثة والا هي متعوضة ولله الحمد فالحقيقة  
بنوك الدم انا ملاحظ انها تعاني من قل الزيارات زيارات المتبرعين مع العلم ان  
الحكومة تشجعهم واللي مثلا يجي يسحب دم ثلاث مرات يعطونه جائزة ذهبية  
وجائزة فضية واوسمة مايقصرون عنهم ويكتبون اسمه في السجل المهم عاد مرة  
من المرات كنا نهرج انا وواحد من الاخوان عن الماموضوع وقال والله ياخي بعد  
لو تاخذ هالابيات قد قلتها عن موضوع التبرع بالدم قلت وش تقول قال اقول :

لاهنت يا شخص تبرعت بالدم  
وانقذت لك نفس على حافة الموت

عساك من ميلات الايام تسلم  
وتلقى جزاها عند من قدر القوت

اسرعت في نجدة مريض تحطم  
ولبيت دعوة طايح يرفع الصوت

اخوانك الي تعتزي بك وتزهم  
وصلت حبل للأمل كان مبتوت  
ومن كان ذا طبعه فلا اظن يندم  
يعوض المفقود كاس من التوت

هذي الايات للشاعر عبدالله السيارى عن موضوع التبرع بالدم حقيقة هذا  
موضوع طيب ونحث اخواننا على العمل الطيب اللي مثل هذا .

ايضا من الاعمال الطيبة اللي الانسان يذكرها هذي سألفة ، مرة من المرات  
فيه واحد من المسلمين من الاجواد اللي يحبون عمل الخير معطيه الله حلال والى  
هاك المسجد قديم وبنائه يعني ضعيف خطر يطيح على اللي يصلون فيه يعني  
متداعي جدا فيه شقوق وصدوع ومر هاك الواحد من المسلمين اللي في الوقت  
الاول الزمان السابق وقام عليه وهذه كله وجهاز بناه كله بيه على حسابه كله من  
اوله الى اخره طبعاً معروف من بنى بيت من بيوت الله بنى له الله قصر في الجنة  
فجواب هاك الواحد مثل ماتقول مقال ووكله والرجال هذا غني وميسر الله عليه  
قال للمقال شف جميع مايتكفل بالمسجد من العود الصغير الى الباب الكبير  
كله ترا انا الي بدفعه انتبه لايجي احد يساعدني فيه انا ابي انا ان شاء الله ابحتظي  
اجر بنين هالمسجد ولا اقبل احد يساعدني وانت تول الموضوع ولا يردك الا  
لسانك كل شي تبنيه من المال ابد احسبه وخذ مرة قال كذا؟ قال نعم وجب  
الكدودية وجب الناس اللي بينون ولا تقصر قال طيب .

والله وهم يقومون ويتجهزون تخبر من اول قبل لاتي السيارات يتجهزون  
بهاك الدواب ويجمعون الطين في جهة ويلبنون في جهة ويصلحون هاك اللين

ويجيون الخشب والجريد ويجهزون البيبان والدرايش والجص وكل شي جميع ما يحتاجه والمما يجهزونه والمحافر والي يشيل الترب على ظهور الدواب المهم كل شي جهزوه جهزه هاللي يشرف على البناء والي كل شي موجود ويقومون ويطقون ساس المسجد ويصلحون منارته ويبدون بينون فيه يلبنون ويصلحون اللبن ويصفونه ويولون التبن الله يكرمكم من اللي يخلطون مع اللبن ومع الطين عشان يمस्क هذا شغل الاولين من اول طين حر اللي مايدخله رمل اللي يدخله رمل الى جا المطر يفتفت ويطيح ويصير خطر الطين اللازج اللي يبنى به البيوت من اول تشوفون هالبيوت اللي بالقرايا بعضها عايش له ثلاثية اربعمية سنة لايزال قائم هذا من قوة الطين وقوة تماسكه مشبع بالتبن وحريصين على شغله .

هاللي بينون المهم بنوا سور هالمسجد وصلحوا لبنه وبنوه بدوا بينونه وكل شي يشتغلون وبعد مدة والاهم ساقفينه وكل يومين ثلاث يشرف عليهم هاه؟ قال ابد كل شي تمام والله يجينا و يمر علينا ناس بيون يساعدون واحد يقول ابجيب لكم خشب والثاني مساعدة قال لالا لا تقبل من احد شي قل كل شي عندنا تام خله كله على حسابي قال طيب ان شاء الله .

المهم يشتغلون ويشتغلون ويلبنون قال يوم جا يوم من الايام والاهك المرة حرمة في بيتها تشتغل تحترف مالها احد مقطوعة من شجرة مالها زوج ولا لها احد تصلح حصرات وتكد على نفسها من شغلها ولاها مصلحة لها زبلان كبار الزبلان اللي يشال فيها التمر لكن الامنه ركب هالزبلان هذي مثلا ليف من برا وقووها بالشغل وصار لها حواف قوية يشال فيها حتى الطين جت هي ونشدت وقالت من هاللي يبنى المسجد قالوا فلان المهم يوم جا يوم من الايام والاه جاية


لها تسعة من هالزبلان مخيطة ليف من برا مقويتهن من اول تبي تروح تبعهن يوم  
درت عن المسجد ودها تشارك في عمل الخير هذا باللي تقدر عليه وتقوم وتجب  
هالزبلان والاهم هاك اليوم في حاجة زبلان وهي تحببها وتجدعها عليهم بامرة  
اوقفي اوقفي راعي المسجد وراعي المكان مايبي احد يجيب شي قالت خذوهن  
بس وانا بعدين اجي اتفاهم انا وياه .

المهم والا المشرف على العمل مهوب فيه جا وعلمه واحد من العمال قال  
وش هالزبلان من جايبهن قال والله جايتهن الحرمة الفلانية وجدعتهن علينا  
وقالت اشتغلوا فيهن وحننا والله صدقة محتاجينهن قال بس انا قايل لكم ماتندرون  
قالوا عادهي اللي جت من هالسوق ويكن بيتها هناك المهم عرفوا بيتها عرفها اللي  
يشرف على العمل وقام وعلم راعي العمل قال الموضوع كذا وكذا وانها جابت  
الزبلان وعطيناها دراهم وعيت تاخذ قيمتهن تقول ابيهن مشاركة مني في  
هامسجد ها شف سبحان الله العظيم حسب الرواية اللي انا سمعت يقولون يوم  
جا عقب يوم او ثلاثة ايام والا المسجد حول مايتم خالص ويرى راع العمل المتبرع  
بالمسجد في المنام هاك القصر مبني له وان هاك القصر الثاني صغير جنبه مبني قال  
منهو له والاه لرعاية هالزبلان راح لمها يبي يعلمها والاه هي رائية هي نفس  
الرؤية يعني شايقة نفس الشوفة اللي شايقة هو شايقة قالت لا تحرمني الاجر انا  
شفت اللي شفته وهذا عطا من رب العالمين يعني تعجبوا كيف الشي هذا  
حاصل ، الله وسبحانه وتعالى حتى لو عملها او مدتها بسطية الله سبحانه وتعالى  
ياجرها ، فعاد عقب فترة قال اللي يشرف على العمل ابيات لانه مشرف على  
القصة وخابرها لامن صاحب العمل ولا من المرة ويقول في الايات :



هني من قدم لنفسه بدنياه  
 المال يفنى والعمل ما يضيء  
 لا صارت النية والاعمال لله  
 لو هو قليل فضل ربي وسعي  
 انظر لفاعل خير يوم انه اخفاه  
 في مرقده بشر بقصر رفيعي  
 حتى المرة وراه مثله وحلياه  
 حيث ان مده قد ماتستطيعي  
 اصل العمل نية على الله مجازاه  
 ومن اخلص النية ثوابه سريعي

هذي هي الايات التي قالها الحقيقة الرجل الذي كان يشرف على بناء المسجد  
 وهي اذا نظرنا عليها فيها عمل صالح وفيها تشجيع على العمل الصالح وفيها ان  
 الانسان اذا مدت يمينه مثلاً ماتدري يسراه وش مقدمه الذي يبي الاجر والثواب ولا  
 يبي احد يدري عنه في شي يعمل الخير والاجر على الله سبحانه وتعالى يكتب له  
 الاجر والثواب خاصة الذي يسعى في ما ينوب المسلمين في بناء مساجدهم واحد  
 مثلاً يحط برادة عند المسجد وفيه اثر يقول من كثرت ذنوبه فليسقي ماء شربة الماء  
 الذي يشربها الرجال باردة او تتخذ من العطش وتغك من العطش فيها اجر  
 وثواب .



## قصيدة المغذي

هذي قصة طريفة صارت لواحد من الشعراء المعاصرين وهو الشاعر فهد بن عبدالعزيز الفايز من النواصر من بني تميم من مواليد الفرعة، بلدة من بلدان محافظة شقراء وهو من بيت شعر أبوه عبدالعزيز الفايز الملقب بـ (رضا) وعمّه ناصر الفايز (أبو علي) من كبار الشعراء بالمملكة، وأنا ترى أبيهراً شوي تعرفون لازم للقصة من زيادة علشان تصير مقبولة للسامع وتزيد طرافتها فمرة من المرات حس الشاعر فهد الفايز بألم في الصدر وزادت ضربات قلبه حس أن قلبه يدق على غير العادة وهو في مكتبه وكان يشتغل في شركة والظاهر أنه مركز هاك اليوم على الشغل ومهتم أكثر من اللازم وتعرفون موظف القطاع الخاص بالشركات يعني يا دافع البلاء يميّصون الواحد مص ولا يرحمون، الدوام ثمان ساعات يعني ثمان ساعات ويمكن هذا اللي سبب له الوجد اللي هو حس المهم أنه راح لاحد المستشفيات الأهلية أخذه واحد من زملاءه وعلى طول وداه للمستشفى كشفوا عليه أول مره قال له الطبيب لازم اسوي لك عدة تحاليل وتخبرون المستشفيات الخاصة الله يجيرك ما يخلون شي ما يسوونه يحللون كل شي حتى إلى جاهم الرجال خطر يحللون له تحليل الحمل وأشعة وتخطيط قلب المهم قال الدكتور لازم ننومك عندنا ليلة.

خطوه في غرفة والى جنبه مريض سلم عليه قال له سلامات وش جابك قال والله رجلي منكسرة وزلقت لي في قشرة موز وانكسرت رجلي وجبروني وجابوني وحطوني في هذا ويوم أخذ شوي ويدخل عليهم واحد جاي يزور

هالرجال المنكسر ولا الرجال الزاير هذا جايب معه موز قال له هالمنكسر هالحين  
انت تدري ما كسرني إلا الموز وتحبيه لي للمستشفى تبي تطيح قشرة وازلق بها  
وانكسر الله يهديك المهم نرجع لشاعرنا فهد الفايز عقب ما سلم على الرجال  
اللي معه في الغرفة وحطوه على السرير قالت له المرضه أن الدكتور واصف لك  
مغذي وحن الحين بنجيب لك المغذي ولا عليك ان شاء الله الا العافية جابوا  
المغذي والاها قارورة كبيرة وفيها محلول مثل الماء والا هكا للي الطويل، حق  
المغذي، أبيض متلوي، جت المرضه وأخذت يده وغرزت فيها هاكالابرة الله  
يجيرك ابرة كبيرة مدبية غرزتها بظهر كفه وشبكته في اللي وفتحت قارورة  
المغذي ورفع راسه وشاف المغذي ينقط على نقطة نقطة نقطة، تضبط عليه  
دقات الساعة، وقالت له اترح ولا عليك ان شاء الله وسكرت الباب وراحت.

خويه اللي معه نام وهو الضعيف بدا يهوجس وجاه ابليس ودلا يوسوس له  
وقال والله يا شي يتخاف منه بيحك اما هبوط بالقلب او انخفاض بالضغط وهذا  
الله يدفع البلا يسبب لك أشياء الله يجيرك منها بس، ويوم الرجال والله هه بدأ  
يذكر الموت واللي بعد الموت الله يدفع البلا المغسلة واللي بوسط المغسلة وش  
ييصيرالي غسلوا الميت والى حطوا له حنوط وعقبه الكفن ثمن يشيلونه على  
التعش ويصلون عليه وعقب الصلاة يودونه للمقبرة يدفونه وقام المسيكين  
يهوجس ويخطط يقول بيصير كذا وكذا شوي والا الباب يفتح والا الدكتور  
جاي وشاف نتايج التحاليل والأشعة وتخطيط القلب قال لا ابشر تظمن ابد ما  
عليك الا العافية وابشر انك مثل الحصان بس بنخليك عندنا وبكره ان شاء الله  
على طول ان شاء الله تروح للمكتب وخذ هالعلاج انا كاتبه لك خذ منه الحين

ملعقة والى رحت عاد خذه معك لا وشف ان كان مافيك نوم ترا عندنا كتب بعد  
ان كانك تحب تقرا ولا فيك نوم برسل مع الممرضه كم كتاب شعر وغيره ولا  
عليك الا العافية ومير شف هالمصحف عند الرجال اقر فيه والى فعلا على  
الكمدية اللي عند الرجال المنكسر مصحف .

عاد الشاعر فهد الفايز قال الأبيات اللي بقولها الحين تصوّر هالموقف اللي مر  
به وهي أبيات طريفة الحقيقة ويقول :

شفت المغذي فوق راسي ينقط  
نقطة ورا نقطة ينقط نقوطي

ليّه يرّوع مثل داب مرقط  
والا مثل كفّ يلوح بسوطي

والإبرة بكفي مثل ريشة الخط  
والا مثل مصّاص في وسط قوطي

مع الهواجس رحت في شيل وحط  
أخاف من قلب يصيبه هبوطي

ذكرت موت قاعد لي على الخط  
والمغسلة فيها الكفن والخنوطي

ومساحة أرض ما رسمها مخطط  
بيلاش لا صك ولا به شروطي

وجاني طبيب وقال كلش مضبط  
ارتح وخذ لك هالعلاج مخلوطي

وانسى الهموم وخلها لا تسلط  
وافتح كتاب الله وشرح السيوطي  
واقر دواوين الشعر كود تنشط  
والا لطفه حسين والمنفلوطي  
ترا حلة العمر ساعة بها بسط  
والله غفور ولا يصيبك قنوطي

وهذي هي قصة المغذي جبتها لطرافتها والإنسان ما يجب أنه يقنط أو ييأس  
أو يخاف، لا الواجب يتكل على الله ولا تلعب عليه الهواجيس في مثل هذا  
الظرف ويتفاءل بالخير ولا يصير خوفاً ولا بد إن الإنسان يمر عليه من الأمور  
اللي تكدر خاطره سواء في صحته أو في غيرها، والواجب انه يحتسب الاجر  
والحمد لله.



## الفهرس

الصفحة	عنوان السالفة
٧	الدبلة
١٣	جلد حرمني كامل الزين مابه
١٧	صفقة القرع
٢٣	بياع الدهن
٢٩	البربري
٣٥	ماجد وجديع
٤١	وجوب الكتمان
٤٧	الرجال مخابر
٥١	شاعر وشعر غزلي خفيف
٥٧	فاجعة بن دويرج
٦٥	عزة النفس
٧١	الريح تنقل الرسالة
٧٧	العطف والاحسان باليتامي
٨٣	الحجة الدامغة
٨٧	بكاء الاب على ابنه
٩٩	وصية الأب لابنه

- ١٠٥ \_\_\_\_\_ نصيحة شاعر لشايب
- ١١٣ \_\_\_\_\_ الحج قديما
- ١٢١ \_\_\_\_\_ فطوم
- ١٢٧ \_\_\_\_\_ قصيدة الفلاحة
- ١٣٩ \_\_\_\_\_ منازل الاحباب
- ١٤٧ \_\_\_\_\_ فراق الاحبة
- ١٥٣ \_\_\_\_\_ وصف الطبيعة والربيع
- ١٦١ \_\_\_\_\_ التشرط في المهر
- ١٦٩ \_\_\_\_\_ رجوى حسن الخاتمة
- ١٧٥ \_\_\_\_\_ قالت نصيبك
- ١٨٣ \_\_\_\_\_ المهتوى طرد المها ماغيبيه
- ١٩١ \_\_\_\_\_ الديك الغالي
- ٢٠٣ \_\_\_\_\_ الميل لراعي المال
- ٢٠٩ \_\_\_\_\_ اعمل خير وجزاك الله خير
- ٢١٧ \_\_\_\_\_ قصيدة المغذي

